

Siunnersuummut nassuiaatit

Nassuiaatit nalinginnaasut

1. Aallarniut

1.1 Tunuliaqutaasut pingaarnerusut

Naammagittaalliuuteqarnissamut taarsiiffigitinnissamullu aaqquissuussinermik katitikkamik nutaamik aalajangersaanikkut peqqinnissaqarfimmi napparsimasut pitsaanerusumik sunniuteqarluarnerusumillu naammagittaalliuuteqarnissamut taarsiiffigitinnissamullu periarfissaqarnissaasa qulakkeernissaannik kissaateqarneq siunnersuummi tunuliaqutaavoq.

1.2 Piareersarnerani immikkoortut pingaarnarit

1999-imi "Kalaallit Nunaanni peqqinnissakkut inatsisit nutarternissaannut aqutsisoqatigiit" nalunaarusiamik "Kalaallit Nunaanni peqqinnissakkut inatsisit nutarterneqarneri" pillugit saqqummiussipput. Kalaallit nunaanni peqqinnissakkut inatsisit nutarternissaasa pisariaqarluinnalernerat aqutsisoqatigiit taakkulu sulinerannut tunuliaqutaavoq. Peqqinnissaqarfimmik 1. januar 1992-imi tigusinermili peqqinnissaqarfimmi suliasaqarfimmi annertuuni malittarisassatigut tunngaviusunik pisariaqartunik nutarterisoqarsimanngilaq. Danmarkimi ministereqarfiit oqartussaasullu attuumassuteqartut allaqatigisareerlugit inatsisit nutarternissaannut suliniummik aallartitsinissamut aqutsisoqatigiinnik pilersitsisoqarnissaa isumaqatigiissutigineqarpoq.

Aqutsisoqatigiit Kalaallit Nunaanni peqqinnissakkut inatsisinik nutarterinissamut siunnersuusioqquneqarput. Peqqinnissakkut inatsisit nutarterneqarnerisa kingorna paasiuminartuullutillu paasissaanissaat kiisalu peqqinnissaqarfiup aaqquissugaaneranut piginnaasaqarnikkullu pissutsinut tulluarsagaasimanissaat siunertaasimavoq. Nutarterilluni sulineq Kalaallit Nunaanni immikkut pissutsit eqqarsaatigalugit ingerlanneqassaaq.

Aqutsisoqatigiit napparsimasut inatsisitigut inassisimanagerat pillugu Inatsisartut peqqussutissaattut siunnersuusiorput aamma napparsimasut sillimmasernissaat pillugu Inatsisartut peqqussutissaattut siunnersuusiorlutik. Tamakku tunngavigalugit Napparsimasut inatsisitigut inassisimanagerat pillugu Inatsisartut peqqussutaat nr. 6, 31. maj 2001-imeersoq akuerineqarpoq. Napparsimasut sillimmasiisarnerat pillugu inatsimmik akuersisoqanngilaq. Taamaalilluni peqqinnissaqarfimmit passunneqarnermut atatillugu ajoqusersimanernut napparsimasut taarsiivigineqarsinnaanerannut tunngatillugu inatsisitigut malittarisassaqsimanngilaq. Peqqussutsumut Naalakkersuisoqarfik manna tikillugu taarsiinissaq pillugu sulianik aalajangersimasunik inatsisitigut tunngaveqanngitsumik suliarinnittarpoq, taamaallaalli peqqinnissamut tunngasutigut sullissisumik

aalajangersimasumik isornartorsiuinissamut Napparsimasut Maalaarutaannik Aalajangiisartut tunngavissaqarsimagaangata sulianik suliarinnittarsimavoq. Suliassat allat eqqartuussivimmi suliarisassatut innersuunneqarput.

Taamaammat aaqqissuunneqarnera nanginneqartartussanngoraangat taarsiivigineqarnissamut apeqqutip misilinneqarnissaa Napparsimasut Maalaarutaannik Aalajangiisartuni misilinneqarnissaa utaqqineqartariaqartarneranik kinguneqartarpoq, taakkulu sulianik kinguarsaasarlutik.

Siuliani allaaserineqartutut peqqinnissamut tunngasutigut katsorsaanerup naammagittaalliutigineqarnissaanut kiisalu taarsiiffigineqarnissaq pillugu qinnuteqarnissamut periarfissat nutarterneqarnissaat inatsisitigullu aalajangersarneqarnissaat pisariaqartinneqangaarsimapput. Tamanna pingaartumik ukiuni kingullerni immikkut pisariaqartinneqalersimavoq, tassani napparsimasunik suliarinnittarnermut suliassa qarfiup paasiuminaannerulerneranik kinguneqarsimalluni.

Kalaallit Nunaanni sulisut akornanni taarseraattoqartupilussuuvoq, tamannalu peqqinnissaqarfiup iluani aamma atuulluni. Katsorsaanerup ingerlaavartuusanninnera assigiissaartuunnginneralu napparsimasup peqqinnissamut tunngasutigut sullissisumik aalajangersimasumik naammagittaalliutigineqartussamik toqqaaniarneranut ajornakusoortitsisarpoq. Tamanna napparsimasoq sullissinermi pitsaassuseq nalinginnaasumik akuerisat malillugu katsorsartissimangikkaluarluni pisut ilaanni uparuaasoqarsinnaannginneranik kinguneqartarpoq. Taamaammat peqqinnissamut tunngasutigut sullissisut ataasiakkaat katsorsaanermi kukkunerisinnaasaat pinnagit ingerlarnganili pingaarnertitsisumik inatsiseqarnissaq pingaaruteqarpoq, taamaaliornikkummi peqqinnissamut tunngasutigut katsorsaanermik uparuaanissamut periarfissaqarnissaq taparserneqassammat. Tamanna peqqinnissaqarfiup naammaginangitsumik katsorsaaneranut pissutaasut ilaannik, assersuutigalugu sulinerup aaqqissuunneranik, aaqqissuusaanikkut pissutsit aningaasaqarnikkulluunniit pissutsit tungiisigut kukkussutigisimasaminnik ilinniuteqarnissaannut periarfissiisaaq.

1.3 Siunnersuut nalinginnaasumik pingaarnersiorlugu

Peqqinnissaqarfimmi peqqinnissamut tunngasutigut sulinermut aamma peqqinnissakkut sullissisut peqqinnissamut tunngasutigut sulinerannut naammagittaalliutit pillugit malittarisassat, peqqinnissaqarfimmi piviusumik sulineq pillugu naammagittaalliutit (sullissineq pillugu naammagittaalliutit) kiisalu napparsimasut ajoquserinerinut taarsiinissamut periarfissat pillugit malittarisassat siunnersuutip imarai.

1.4 Siunnersuutip Inatsisartunut siullermeertumik saqqummiunneqarneraniilli allannguutit

2021-mi Inatsisartut ukiakkut ataatsimiinneranni siunnersuut siullermeertumik saqqummiunneqarpoq, arlallilli pissutigalugit utertinneqarsimalluni. Piffissami tulliuuttumi siunnersuutip matuma saqqummiunneqarnissaata tungaanut siunnersuummi pingaarnertut ukuninnga allannguuteqartoqarsimavoq:

- § 4: Naammagittaalliuutip Napparsimasut Maalaarutaannik Aalajangiisartuni suliarineqarsinnaanera pillugu Nunatsinni Nakorsaaneqarfik aalajangiisinnaassuseqarpoq. Taamaattorli § 3 naapertorlugu naammagittaalliuutip katsorsaaneermik naammagittaalliuuteqarnertut suliarineqarsinnaanera periarfissaajuaannarpoq.
- § 16: Meeqqamik annaasaqarluni taarsiivigineqarsinnaatitaasumik ajoqusernermut atatillugu taarsiissuteqartoqarsinnaanera ilanngunneqarpoq.
- §§ 17, 18 aamma 27 Taarsiissutissanik naatsorsuineq tunniussinerlu pillugit aalajangersakkat ilanngunneqarput.
- § 26: Eqqartuussivimmut suliassanngortitsinissamut piffissaliussaq ilanngunneqarpoq.

2. Siunnersuummi immikkoortut pingaarnertit

2.1 Maannamut pingaarnertigut inatsisitigut inissisimaneq

Kalaallit Nunaanni peqqinnissamut tunngasutigut sullissisut peqqinnissamut tunngasutigut sulinerat pillugu napparsimasuniit naammagittaalliuutit Danmarkimi Napparsimasut Maalaarutaannik Aalajangiisartunut suliassanngortinneqartarput, taakku naammagittaalliummi pineqartoq imaluunniit pineqartut peqqinnissamut tunngasutigut sullissisut piginnaatitaanermut inatsit naapertorlugu pisussaaffinnik unioqqutitsisimanersut isummertarlutik.

Tamatuma saniatigut malittarisassat atuuttut malillugit peqqinnissaqarfiup sullissinera pillugu naammagittaalliuuteqartoqarsinnaavoq, kisianni "pisortat peqqinnissaqarfiannit sullissineq" eqqaassanngikkaanni taaguummumut suut ilaanersut inatsisini erseqqinnerusumik nassuiarneqarsimanani. Taamaalilluni sullissinivik (sullissineq) aamma sulianut tunngatillugu sulineq immikkoortinneqartarput.

Peqqinnissaqarfimmi kukkusumik katsorsarneqarnermut taarsiivigineqarnissamut periarfissat ullumikkut Inatsisartut inatsisaatigut aalajangersarneqarsimanngillat. Taamaattorli 2015-imiit Aningaasanut inatsimmi napparsimasunut taarsiissutitut nammineerluni immikkut aningaasaliisoqartarsimavoq.

2.2 Siunnersuutip pingaarnertut aaqqissuussanera

Siunnersuut kapitalinut sisamanut agguagaavoq.

Siunnersuummi kapitali 1 siunnersuutip atuuffissaa kiisalu immikkoortoq nassuiaaffiusoq pillugit immikkoortumik imaqarpoq.

Peqqinnissaqarfimmi peqqinnissamut tunngasutigut sulinerup aammalu peqqinnissamut tunngasutigut sullissisut peqqinnissamut tunngasutigut sulinerat pillugit naammagittaalliutiginnissaannut periarfissat aamma naammagittaalliutigineqartumik katsorsaavimmik oqaloqateqarnissamut neqerooruteqartumik naammagittaalliutit suliarineqarnerat pillugit malittarisassat siunnersuummi kapitali 2-mi allassimapput. Taakku saniatigut peqqinnissaqarfimmi sullissinermi sulinivimmik naammagittaalliornissamut (sullinneqarnermut naammagittaalliutit) periarfissaqarneq aammalu peqqinnissamut tunngasutigut katsorsaaneremut aalajangersimasumut tunngasuunngitsut, taamaattorli assersuutigalugu katsorsaavimmi illutigut pissutsit, sulisuni pissutsit, nerisaqartitsineq assigisaallu pillugit kapitalimi allassimasoqarpoq. Tamatuma saniatigut naammagittaalliutit tunniunnaannut piffissaliussat allassimapput.

Napparsimasut ajoqusernerinut taarsiivigineqarnissamut periarfissat pillugit malittarisassat, tassunga ilanngullugit taarsiivigineqarnissamut piumasagaatit aamma aningaasat taarsiissutaasussat annertussusilerneru kiisalu taarsiinissaq pillugu suliat qanoq suliarineqarnissaat pillugit siunnersuummi kapitali 3-mi allassimasoqarpoq. Taamatuttaaq napparsimasut ajoqusernerinut taarsiivigineqarnissamut piumasagaatit pisoqalisoorneri pillugit malittarisassanik tunngatillugit kapitalimi allaqqasoqarpoq. Aammattaaq kapitalimiippoq ajoqusernerup taarsiissutaasussap malitsigisaanik 18-inik suli ukioqalernani meeqqap toquneranut tunngasumut angajoqqaatut oqartussaassuseqartunut ajunngitsorsiassat pillugit aalajangersagaq.

Suliat nunatsinni piareersarneqarnerisa kingorna suliat aalajangiiffigineqartussat Danmarkimi oqartussanit naliliiffigineqassasut siunnersuummi aamma siunniunneqarpoq. Innuttaasumut sianiginninnissaq siullertut pissutaavoq, tassami danskit oqartussaasui pineqartut suliassaqarfimmut immikkut ilisimasanik pigisaqarmata Kalaallit Nunaanni angussallugit ajornakusoorsinnaasunik. Taamatut immikkut ilisimasaqarnermi danskit oqartussaasui aalajangiinernik assigiittunik eqqortunilu aalajangiinissaminut, sulianillu suliarinninnerup piffissaliiffigineranut tunngavissaqarluarnerussapput.

Siunertamut naammagittaalliornissamut immersuiffissaq elektroniskiusoq ineriartortinneqarsimavoq, taamaalilluni nunami tamarmi innuttaasut naammagittaalliornissamut suliassartaat pissarsiariuminarnerulerlutik

Siunnersuummi kapitali 4-miippoq atulersitsinissamut aalajangersakkat kiisalu siusinnerusukkut inatsisinut allannguutit.

2.3 Inatsisartut inatsisaata atuuffia

Peqqinnissaqarfimmi peqqinnissamut tunngasutigut sulinermut aammalu peqqinnissamut tunngasuni atorfillit suliaat pillugit naammagittaalliutit aammalu Kalaallit Nunaanni peqqinnissaqarfimmi katsorsaanerup ingerlanera pillugu napparsimasut naammagittaalliornissaannut periarfissiisumik malittarisassanik eqqussinissaq pillugu siunnersuummi ilaqarpoq. Peqqinnissamut tunngasutigut sulineq isornartuusimanersoq imaluunniit Napparsimasut inatsisitigut inissisimanerat pillugu Inatsisartut peqqussutaanni nr. 6, 31. maj 2001-imeersumi kapitali 2-5-imut akerliusumik katsorsaavik iliuseqarsimanersoq pillugu naammagittaalliutit pillugit suliat Danmarkimi Napparsimasut naammagittaalliutaannik Aqutsisoqarfimmit imaluunniit Danmarkimi Napparsimasut Maalaarutaannik Aalajangiisartunit aalajangiiffigineqartassasut siunnersuummi siunniunneqarpoq.

Tamatuma saniatigut siunnersuut peqqinnissaqarfimmi suliarinninnivimmik (sullinneqarnermut naammagittaalliutit) napparsimasup naammagittaalliornissaanut periarfissiisooq, sullissinerup pitsaassusaanut naammagittaalliutinik imaqartoq ingerlateqqinneqarpoq, matumani katsorsaavimmi inini pissutsit, sulisuni pissutsit, nerisaqarneq assigisaaluunniit pillugit apeqquutit ilanngullugit. Siunnersuut malillugu naammagittaalliutit peqqinnissaqarfimmi qullersanit suliarineqassapput katsorsaavik naammagittaalliutitigineqartoq suleqatigalugu.

Peqqinnissaqarfimmi, pisortani oqartussani allani namminersortunilu katsorsartinnermut assigisaanulluunniit atatillugu Kalaallit Nunaanni ajoqusernut napparsimasut ajoqusernerinut napparsimasunut napparsimasulluunniit qimataanut taarsiinissamut periarfissaq pillugu malittarisassanik siunnersuummi nutaatut aalajangersaasoqarpoq. Taarsiinissaq pillugu suliat Danmarkimi Napparsimasunut Taarsiissuteqartarfimmit aalajangiiffigineqartassasut siunnersuummi siunniunneqarpoq.

2.3.1 Inatsisit atuuttut

Peqqinnissamut tunngasutigut naammagittaalliutit

Napparsimasut Maalaarutaannik Aalajangiisartunut maalaaruteqarneq pillugu Namminersorlutik Oqartussat nalunaarutaat nr. 14, 24. september 2012-imeersumi malittarisassat atuuttut malillugit Kalaallit Nunaanni peqqinnissamut tunngasutigut sullissisut peqqinnissamut tunngasutigut sulinerat pillugu napparsimasuniit naammagittaalliutit Danmarkimi Napparsimasut Maalaarutaannik Aalajangiisartunut suliassanngortinneqartarput Inuk inuilluunniit arlallit peqqinnissaqarfimmi sulisuusut naammagittaalliummut ilaatinneqartut nalinginnaasumik suliatigut akuerisaasut maligassat atorlugit iliuseqarsimanersut Peqqinnissaqarfimmi Napparsimasut Maalaarutaannik aalajangiisartut isummerfigisarpaat.

Peqqinnissamat tunngasutigut sullissisut aalajangersimasut pillugit naammagittaalliorsinnaaneq Inatsisartut Inatsisissaanni matumani ingerlateqqinneqarput, aammalu Namminersorlutik Oqartussat nalunaarutaat atorunnaarsinneqassalluni.

Sullinneqarnermut naammagittaalliuutit:

Peqqinnissaqarfiup sullissineranut il.il. naammagittaalliuutit pillugit kaajallaasitaq nr. 13, 19. december 2002-meersoq malillugu peqqinnissaqarfiup suliarinninnivia pillugu naammagittaalliuuteqartoqarsinnaavoq. Immikkut ilisimasatigut sulineq pineqarnani "pisortat suliarinninniviat pisortat peqqinnissaqarfiannit suliarineqartup" saniatigut naammagittaalliuutinut sullissinerni suut pineqarnersut inatsimmi immikkut killilerneqarsimanngillat.

Kaajallaasitami § 3-mi atuarneqarsinnaavoq Dronning Ingridip Napparsimavissuanut naammagittaalliuutit aamma Kalaallit Peqqissartut Angerlarsimaffiannut naammagittaalliuutit Dronning Ingridip Napparsimavissuani Napparsimavimmut Aqutsisunit suliarineqartartut, peqqissaaveqarfinnullu kiisalu kigutigissaaveqarfinnut naammagittaalliuutit Peqqinnissaqarfiup Sinerissami Aqutsisunit suliarineqartartut. Tassunga atatillugu oqaatigineqassaaq Sinerissami Aqutsisut Nunap Immikkoortuani Aqutsisunit taarserneqarsimanerat.

Peqqinnissaqarfimmi sulinivik pillugu naammagittaalliorsinnaaneq ingerlateqqinneqarpoq aamma inatsisartut inatsisaanni matumani erseqqinnerusumik allaaserineqarluni kaajallaasitarlu atorunnaarsinneqarluni.

Napparsimasut ajoqusernerinut taarsiineq:

Kalaallit Nunaanni peqqinnissaqarfimmi napparsimasut ajoqusernerminnik taarsiiffigineqarnissamat qinnuteqarnissaannut periarfissat pillugit erseqqinnerusunik malittarisassanik aalajangersaasoqarsimanngilaq. Peqqissutsimut Naalakkersuisoqarfik 2017-imi taarsiivigineqarnissamat periarfissat pillugit quppersagaaqqanik saqqummersitsivoq, tassani qinnuteqaatip Nunatsinni Nakorsaaneqarfimmut nassiunneqarneratigut taarsiivigineqarnissaq pillugu qinnuteqartoqarsinnaasoq allassimasoqarluni. Peqqinnissamat tunngasutigut katsorsaannermut atatillugu peqqinnissamat tunngasutigut sullissisup kukkusimanera, peqqinnissamat tunngasutigut katsorsaannermi kukkusoqarsimanera pillugu naammagittaalliuuteqarnermi napparsimasup isumaqatigineqarnera aammalu peqqinnissamat tunngasutigut toqqaannartumik kukkusoqarnerata malitsigisaanik napparsimasup inuttut ajoqusersimanera taarsiivigineqarnissaq pillugu qinnuteqarnissamat piumasaqaataasut tassani takuneqarsinnaavoq. 2015-imiit aningaasanut inatsimmi napparsimasunut taarsiissutinut immikkut aningaasaliisoqartarsimavoq.

2.3.2 Matumunnga siunnersuut

Siunnersuummi eqqarsaataavoq Kalaallit Nunaanni naammagittaalliornissamut taarsiiffigitinnissamullu aaqqissuussinermik katitikkamik nutaamik aaqqissuussinikkut Peqqinnissaqarfimmi napparsimasut pitsaanagerusumik sunniuteqarluarnerusumillu naammagittaalliornissamut taarsiiffigitinnissamullu periarfissaqalissasut.

Siunnersuummi matumani pingaartumik erseqqissarneqarput:

- Innuttaasut naammagittaalliuuteqarnissamut taarsiivigineqarnissamullu periarfissaat ataatsimoortinneqassapput.
- Nunatsinni Nakorsaaneqarfiup ataani naammagittaalliuutinik suliaqartumik allattoqarfimmik pilersitsisoqarnissaa siunniunneqarpoq, taamaalilluni innuttaasoq ataatsimik saaffissaqassaaq peqqissutsikkullu paasissutissat naammagittaalliuutip suliarinerani ataasiinnarmi toqqortaatigineqassallutik.
- Katsorsaanerup pitsaasumik ingerlanissaa oqaloqatigiittarnissarlu qitiutinneqarput.
- Ilinniartitsineq pitsaassutsimillu ineriartortitsineq aamma Peqqinnissaqarfiup pitsaanerulernissaa kukkunerillu pinaveersaartinnissaat qitiutinneqarput.
- Suliat imminnut attuumassuteqanngitsutut suliarineqarsinnaapput, taamaalilluni taarsiinissaq pillugu apeqqtut Peqqinnissaqarfimmi Napparsimasut Maalaarutaannik Aalajangiisartut aalajangiisimanersut apeqqutaatinnagu (imaluunniit oqartussaasunit allanit), aamma aalajangiisimanerup inerneru apeqqutaatinnagu suliarineqarsinnaalluni.

Naammagittaalliuuteqarnermut taarsiivigeqqunissamullu tunngatillugit suliat pillugit suliarinninneq Danmarkimi ingerlanneqassasoq siunniunneqarpoq. Taamaammat PISOQALISOORNEQ pillugu inatsit 22. december 1908-meersoq suli Kalaallit Nunaanni atuuttoq aallaavigalugu allaanerusunik pISOQALISOORNISSAMUT piffissaliunneqartut allat atuupput. Napparsimasut naammagittaalliutaannut Aqutsisoqarfiup peqqinnissaqarfimmi peqqinnissatigut suliat pillugit naammagittaalliuutinik suliarinnittuussaaq, Napparsimasut Maalaarutaannik Aalajangiisartut peqqinnissamut tunngasutigut sullissisut pillugit naammagittaalliuutinik suliarinnittuussallutik, aammalu Napparsimasunut Taarsiissuteqartarfiup taarsiinissamut sulianik suliarinnittuussalluni. Tassani inatsisitigut inissisimaffiup allangortinneqarnera pineqanngilaq, sulialli suliarineqartarnerisa aaqqissugaanerut aamma suliaassap suliarineqarnissaanut paasissutissanik pisortatigoortunngorsaanissaaq amerlanernillu pissarsisinnaaneq pineqarlutik. Napparsimasooq eqqarsaatigalugu assigiinngisitsinissaaq suliallu pisariaqanngitsumik siviisuumik suliarineqarnissaat pinngitsoortinniarlugit sulianik suliarinninnermi ingerlaavartumik assigiissaarisumillu suliarinnittoqartariaqartoq naliliisoqarpoq. Taamatut eqqarsaatiginninneq annertuutigut Danmarkimi oqartussanit attuumassuteqartunit akuerineqartussaassaaq, taakku

suliat akuttunngitsumik pisariusut suliarinissaannut nalilersornissaannullu paasisimasaqarmata. Oqartussat taakku ukiut ingerlanerini suliaasaqarfimmi immikkut ilisimasaqaleriartornikuupput, tamannalu maani nunatsinni sulisunik attasiinnarnissamik unammilligassaqarfiusumi angunissaa ajornakusoorpoq. Eqqartuussinermi suliaasinnaasutut pilersinneqarsinnaasuni Naalakkersuisut nukittunerusumik inissisimassasut aammattaq naliliisoqarpoq. Taamaammat ataatsimoortumik isiginninneq aallaavigalugu suliat Danmarkimi suliarisassanngorlugit aalajangiiffigisassanngorlugillu nassiunneqartarnissaat tulluurtuusoq naliliisoqarpoq.

2.3.2.1. Peqqinnissamut tunngasutigut sulineq pillugu Naammagittaalliuut(katsorsaavik ataaseq arlallilluunniit pillugit naammagittaalliuutit)

Peqqinnissaqarfimmi peqqinnissamut tunngasutigut sulineq pillugu napparsimasut naammagittaalliornissamut periarfissaat nutaaq siunnersuummi aalajangersarneqassaaq.

Aalajangersakkap siunnersuutigineqartup kingunerisaanik peqqinnissamut tunngasutigut sullissisumik aalajangersimasumik imaluunniit peqqinnissaqarfimmi sulisunik aalajangersimasunik naammagittaalluiteqanngikkaluarluni peqqinnissaqarfimmi suliatigut sulinerimik naammagittaalliornissaq periarfissaalerpoq. Taamaalillutik napparsimasut suliatigut sulinerup aalajangersimasup tamarmiusup isornartuusimanersoq pillugu nalilersuinissamut periarfissaqalerput. Danmarkimi Napparsimasut Maalaarutaannik Aalajangiisartunut maalaaruteqartarneq pillugu Namminersorlutik Oqartussat nalunaarutaat nr. 14, 24. september 2012-imeersoq malillugu peqqinnissamut tunngasutigut sullissisunik aalajangersimasunik naammagittaalliorsinnaaneq attatiinnarneqassaaq, aammalu Namminersorlutik Oqartussat nalunaarutaat atorunnaarsinneqassalluni.

Siunnersuutip kingunerisaanik napparsimasut peqqinnissamut tunngasutigut sulinerimik naammagittaalliorlut katsorsaavimmik oqaloqateqarnissaq pillugu neqeroorfigineqarnissamik piunasaqalersinnaalissapput.

Siunnersuut malillugu Danmarkimi Napparsimasut naammagittaalliutaannut Aqutsisoqarfik peqqinnissaqarfimmi peqqinnissamut tunngasutigut sulineq pillugu naammagittaalliuutinik aalajangiisapput, aammalu Danmarkimi Napparsimasut Maalaarutaannik Aalajangiisartut peqqinnissamut tunngasutigut suliaqartussat peqqinnissamut tunngasutigut sullissisutut akuerisat pillugit naammagittaalliuutinik aalajangiisassallutik. Napparsimasut naammagittaalliutaannut aqutsisoqarfik aammalu Napparsimasut Maalaarutaannik Aalajangiisartut isornartorsiuinissamut tunngavissaqarnersoq pillugu aalajangiinermi peqqinnissaqarfiup napparsimasumik katsorsaanermini peqqinnissamut tunngatillugu suliatigut sulinerani ataatsimut isigalugu pitsaassuseq nalinginnaasumik akuerisat malinneqarnersoq pillugu isummissapput.

2.3.2.2. Peqqinnissaqarfimmi suliarinninnivimmik naammagittaalliorneq (sullinneqarnermut naammagittaalliuutit)

Peqqinnissaqarfimmi sullissinermi sulinivimmik naammagittaalliuuteqarnissamut napparsimasut periarfissaqarnerat peqqinnissamullu tunngasutigut sulinermik naammagittaalliuuteqarneq siunnersuummi malittarisassani ilaatinneqanngitsoq siunnersuummi ingerlateqqinneqarpoq. Aalajangersakkamut assersuutigalugu ilaassapput sullissinerup qaffasissuaniik naammagittaalliuutit, tassunga ilanngullugit katsorsaavimmi inini pissutsit, sulisut pissusaat, nerisaqartitsineq assigisaallu.

Siunertaq tassaavoq kukkunerit ilinniarfiginissaat katsorsaanermt atasunik napparsimasunut pissutsit pitsaanerulersinnissaat aamma saaffiginnissut katsorsaavimmi ilinniartitsinermt qanoq atorneqarnera pillugu napparsimasunut ilisimatitsineq, taamaalillunilu Peqqinnissaqarfimmut tatiginnineq pilerseqqillugu.

Sullinneqarnermt naammagittaalliuutit katsorsaavimmiunngitsoq immikkoortumilli allamit qulaajarneqarlutillu aalajangiiffigineqartassasut siunnersuutigineqarpoq. Taamaammat siunnersuut malillugu sullinneqarnermt naammagittaalliuut peqqinnissaqarfimmi qullersanit suliarineqassaaq. Tamatuma saniatigut paasisutissiissutigineqassaaq peqqinnissaqarfimmi aqutsisutut qullersat taakuummata sullissinermt naammagittaalliuutinik Nunatsinni Nakorsaaneqarfimmiit tigusisarlutillu kingornalu taakkununga suliarinnittartut. Suliarinninnermt atasumik naammagittaalliuut peqqinnissaqarfimmi aqutsisutut qullersat suliarinniffimmut naammagittaalliuutigineqartumut tusarniaatigalugu nassiuutissavaat. Assersuutigalugu peqqissaavinnut naammagittaalliortoqarsimappat naammagittaalliuut peqqinnissaqarfimmi aqutsisutut qullersat Nunap Immikkoortuinut Aqutsisunut tusarniaatigalugu nassiuutissavaat, taannaavorlu peqqissaaviit qullersaqarfiat.

2.3.2.3. Napparsimasut ajoqusernerinut taarsiineq

Peqqinnissaqarfimmi, pisortani oqartussani allani namminersortunilu katsorsartinnermi assigisaanulluunniit Kalaallit Nunaanni ajoqusernermt napparsimasut imaluunniit napparsimasunut qimataasut siunnersuutikkut taarsiivigineqarnissaat periarfissaalissaaq.

Taamaalillutik katsorsaaviit tamarmik peqqinnissaqarfimmut, Kalaallit Nunaanni oqartussanut allanut imaluunniit Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersoq naapertorlugu namminersortunut atassutillit aalajangersakkamut ilaapput.

Inatsit malillugu ajoqusernerit suut taarsiivigineqarsinnaanersut siunnersuutikkut aalajangersarneqarput. Pisuni sorlerni napparsimasoq imaluunniit – toqusoqarnerani – taassuma qimataa napparsimasup ajoqusernera pillugu taarsiivigineqartussaataitanera aamma aalajangersarneqarpoq. Peqqinnissaqarfimmi Danmarkimi naammagittaalliuteqarsinnaaneq taarsiivigitissinnaanerlu pillugit inatsimmi taarsiviginninnissamut piumasaqaatit assigiipput, taamaattorli Kalaallit Nunaanni pissutsit immikkut ittut atuuttullu nalorninartortaqartillugit.

Siunnersuummi § 11, nr. 1, napparsimasumik misissuinerlut, katsorsaanermut il.il. atatillugu kukkunermut taarsiisoqarnissaanut periarfissiivoq, immikkut ilisimasalimmit allaanerusumik suliarinnissinnaagaluarpat. Tassunga ilaatigut nappaatip kukkusumik suussusersineqarnera pissutigalugu kukkusoqarnera apeqqutaatinnagu imaluunniit nakorsaanikkut isiginninneq aallaaviginagu pissutsilli allat pissutigalugit katsorsaasoqarnera imaluunniit paarlattuanik, nakorsaanikkut isiginninneq aallaavigalugu katsorsaasoqannginnera apeqqutaatinnagu kukkusumik katsorsartinnerit suulluunniit ilaapput. Taakkua saniatigut katsorsaariaatsip imaluunniit katsorsaanermi teknikkip kukkusup atorneqarsimanera kiisalu katsorsaanermi imaluunniit katsorsaanerup kingorna napparsimasumik nakkutilliinermi kukkusoqarnera pissutigalugu ajoqusernerit ilaapput.

Katsorsaanermut il.il. peqqinnissamut tunngasutigut sullissisup aalajangersimasup suli annerusumik sissuerneratigut kukkunermik sumiginnaanermilluunniit pinngitsoortitsisimasinnaagaluartutut pisuutinnissaa piumasaqaataaangilaq.

§ 11, nr. 1 malillugu nakorsaammik pineqartumik kukkulluni tunniussisoqarpat imaluunniit taassuma atorneqarnissaanut ilitsersuut peqqinnissamut tunngasutigut sullissisumit malinneqanngippat nakorsaait ajoqusiinerat taamaallaat taarsiinissamut aaqqissuussinermut ilaapput.

Taakku saniatigut siunnersuummi § 11, nr. 2-4-mi malittarisassat malillugit ajoquserneq taarsiivigineqarsinnaatitaasoq akuerineqarsinnaavoq ajoquserneq misissuinerlut, katsorsaanermut assigisaanulluunniit atatillugu teknikkikkut atortuni, sakkuni allatigulluunniit atortuni atorneqartuni kukkunermik ajutoornermilluunniit peqquteqarpat, ajoquserneq nakorsaanikkut isiginninneq aallaavigalugu napparsimasup nappaataanik katsorsaanissamut taamaaqataanik sunniuteqartoq katsorsaariaaseq imaluunniit katsorsaanermi periaaseq pigineqartoq alla atorlugu pinngitsoortinneqarsinnaasimagaluartoq kingornatigut nalilerneqarpat, imaluunniit misissuinerup malitsigisaanik, tassunga ilanngullugu nappaatip suussusernera, imaluunniit katsorsaanermi ima annertutigisumik napparsimasup naammaginarlutumik sapigaanik annertunerusumik aseruuttoqarluni imaluunniit nappaat nassataqarluni.

§ 15-imut siunnersuut malillugu napparsimasut ajoqusernerinut taarsiissutissat taarsiissuteqarnissamut akisussaaneq pillugu inatsimmi, peqqussutikkut nr. 796, 1. oktober 1993-ikkut kingusinnerusukku allannguuteqartukku Kalaallit Nunaannut atuutilersinneqartumi malittarisassat malillugit annertussusilerneqartarput. Napparsimasumut taarsiineq ajunngitsorsiassallu taarsiissutissaniit ajunngitsorsiassaniillu nammineq akiliutit ilanngaatigeriarlugit tunniunneqartarput. Taarsiinerit ajunngitsorsiassallu suliap piffissamut aalajangiiffigineranut qummut iluarsineqassapput aamma suliap aalajangiiffigineraniit sapaatit akunnerinik tallimanit kingusinnerusumiit aningaasat tunniunneqarpara ernialerneqassallutik. Taanna peqqinnissaqarfiup iluani naammagittaalliuteqarnissamut taarsiivigineqarnissamullu periarfissat pillugit danskit inatsisaanni malittarisassanut naapertuuppoq.

Kalaallit Nunaanni Nunatsinni Nakorsaaneqarfimmit naammagittaalliummik tunniussiffiusumi aallarniutaasumik suliamik piareersaareernerup kingorna Danmarkimi Napparsimasunut Taarsiissuteqartarfik taarsiinissamut nassiutereernerani suliani aalajangiisassasoq siunnersuutigineqarpoq.

2.3.2.4 Taarsiissutaasinnaasumik iliuuseqarnerup malitsigisaanik meeqqap toqunerani ajunngitsorsiassat

Siunnersuummi § 16-imiippoq katsorsartinneqartup taarsiiffigineqartussamik ajoquserneranut atatillugu meeqqamut toqusumut angajoqqaatut oqartussaassuseqartunut ajunngitsorsiassat pillugit aalajangersagaq.

Ajunngitsorsiassap taassuma siunertaraa meeqqamik annaasaqarnermut atassuteqarsinnaasumik nalinginnaasumik aningaasaqarnikkut aningaasartuutitut taarsiinissaq, soorlu napparsimanermik nalunaaruteqarneq imaluunniit tarnip pissusaanik ilisimasalimmit ikiorneqarneq. Taamaattorli aalajangersakkap taassuma meeqqap annaaneqarnera pillugu taarsiinissamik siunertaqanngilaq, taamaattumik "taarsiinermut" taarsiullugu "ajunngitsorsiassaq" atorneqarpoq.

3. Pisortanut aningaasaqarnikkut allaffissornikkullu kingunerisassat

3.1. Naammagittaalliutit pillugit sulianut allattoqarfik

Inatsisissatut siunnersuummi Nunatsinni Nakorsaaneqarfiup ataani naammagittaalliutit pillugit sulianut allattoqarfimmik pilersitsisoqassasoq siunnersuummi siunniunneqarpoq. Taamaalilluni naammagittaalliutit pillugit suliat katersornerisigut assigiiaartumillu suliarinerisigut isumalluutit allamut atugassaalersut sulinermi tassani ilaanissaat siunertaavoq. Naatsorsuutigineqarpoq pilersitsinermut aningaasartuutit tassunga atatillugu ilinniagaqartumik fuldmægtigimut naapertuuttut ukiumut 600.000 kr.-it missaannik akissarsiatigut aningaasartuutaassasut.

3.2. Peqqinnissamut tunngasutigut naammagittaalliutit

Peqqinnissaqarfiup aqunneqarnera, aaqquissuusaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaata allanngortinneqarneranik Inatsisartut inatsisaat nr. 2, 29. maj 2012-imeersumut (Napparsimasut Maalaarutaannik Aalajangiisartunut maalaaruteqarneq) nassuiaatinit takuneqarsinnaavoq 1992-imi peqqinnissaqarfiup tiguneqarnera sioqqullugu Kalaallit Nunaanni peqqinnissamut tunngasutigut napparsimasut naammagittaalliutaannik Danmarkimi oqartussat isumaginnittuusimasut. Taamaalilluni periutsumik pisoqaanerusumik ingerlatitseqqinneq pineqarpoq.

Peqqinnissaqarfiup iluani naammagittaalliuteqarnissamut taarsiiffigitinnissamullu periarfissat pillugit danskit inatsimmik nalunaarutaat nr. 9, 4. januar 2023-imeersumi § 18, imm. 1-imit takuneqarsinnaavoq "Savalimmiuni imaluunniit Kalaallit Nunaanni peqqinnissaqarfimmi katsorsartinnermut tunngasunik suliani aningaasartuutit Savalimmiuni Namminersornerullutik Oqartussat imaluunniit Kalaallit Nunaanni Namminersorlutik Oqartussat isumaqatigiissuteqarfialugit naalagaaffimmit akilernerqartarput." Tamanna siusinnerusukut inatsisinit ingerlatitseqqinneruvoq.

2017-imi naammagittaalliutit suliarineqartarnerannut danskit naalagaaffiata aningaasartuutai suliamut ataatsimut 17.362 kr.-ninet naatsorsuiffigineqarpoq.

3.3. Taarsiinissaq pillugu suliat

Taarsiinissaq pillugu suliat manna tikillugu inatsisunik tunngaveqanngitsumik suliarineqartarsimapput.

Napparsimasunut Taarsiissuteqartarfiup naammagittaalliutit pillugit sulianik suliarinninneq tigujuaraa siunnersuummi tunngavissinneqarpoq. Napparsimasunut Taarsiissuteqartarfiup nalunaarutigaa suliassamik taassuminnga suliagarusullutik. Napparsimasunut Taarsiissuteqartarfiup suliassat 14.919 kr.-nik akilersillugit suliarissallugit naatsorsuutigalugu paasissutissiissutigaa. (2024-mi akit) suliassamut ataatsimut aamma akia momsitaqanngilaq. Akiali ingerlaavartumik nalimmassarneqartarpoq aningaasartuutiwiillu assigalugit.

Tamatuma saniatigut Napparsimasunut Taarsiissuteqartarfimmut Suliareqqitassanngortitanik Aalajangiisarfiup Naammagittaalliutit suliassat taarsiiviginninnermut tunngasut suliarinissaannut siunnersuummi tunngavissinneqarpoq. Tamannali peqqinnissaqarfiup iluani naammagittaalliorsinnaaneq taarsiisinnaanerlu pillugit inatsimmi tunngaveqartariaqarpoq, taamaattumillu Danmarkimi inatsit allanngortinneqartariaqarluni, inatsit tamanna december 2023-mi danskit folketingiani allanngortinneqarpoq aamma tamanna peqqinnissaqarfiup

iluani naammagittaalliuteqarnissamut taarsiiffigitinnissamullu periarfissat pillugit danskit inatsisaanni § 58 b imm. 5-mik nutaamik immikkoortortaqaqerpoq. Inatsisunik allannguinerit saniatigut Napparsimasunut Taarsiissuteqartarfimmu Suliareqqitassanngortitanik Aalajangiisarfimmik Naammagittaalliuut isumaqatigiissuteqartoqassaaq, taakkunannga suliassanik suliarinninnernut assigisaannullu aningaasartuutit allassimassapput. Aningaasartuutip taassuma akilernissaanut Aningaasanut inatsimmi aningaasanik naammattunik aningaasaliisoqarnissaa anguniarneqarpoq. Naatsorsuutigisatut tamanna ajornassappat aningaasartuutit peqqinnissaqarfimmi maannakkut immikkoortinneqareersimasut iluanni qanoq akilerneqarsinnaanersut qulaajarneqassaaq.

Nunat Avannarliit sinnerini naammagittaalliuutit nalinginnaasumik ingerlanneqartarnerattut ingerlatsinissaq ammaanngartussaammat taarsiissutit tunniunneqartut taamaaqataanik qaffassasut naatsorsuutigineqarpoq.

Napparsimasut taarsiiffiginissaannut sulianut aningaasartuutit ulloq manna tikillugu Peqqissutsimut Naalakkersuisoqarfimmiit tunniunneqartarsimapput, sillimmasiisoqarsimanngilarlu, soorluttaarlu Namminersorlutik Oqartussani suliffiup iluanut tunngatillugu sillimmasiisarnermut aaqqissuussisoqanngitsoq. Aningaasartuutaasartut siusinnerusukku 1,5 mio. kr.-nit missaanniittarsimapput, taakkulu napparsimasut taarsiiffigitinnissaannut suliat tunniuttarnerannut aningaasaliissutinut siusinnerusukku inatsisitigut pisussaaffiusunut naapertuupput. Siunnersuut manna aqutigalugu napparsimasut naammagittaalliuutaannut suliassaqarfik annertusineqarpoq, naatsorsuutigineqarporlu taarsiinissanut sulianut aningaasartuutit ukiumut 7 mio. kr.-ninut qaffassasut. Tamakku 2024-mut aningaasanut inatsimmut ukiumullu missingersuusiorfiusunut ilanngunneqarput. Aningaasanut taamaallaat ilaapput taarsiinerit akilernerit taamaalillunilu allaffissornermut suliallu suliarinerinut aningaasartuutaanngitsut.

§ 23, nr 1 aamma 2-mut siunnersuut malillugu pisortat peqqinnissaqarfiata iluani katsorsartinnerup aamma Naalakkersuisut akisussaaffigisaanni pisortani oqartussani allani katsorsartinnerup kingorna ajoqusernerit pillugit taarsiinernut aningaasartuutit Naalakkersuisunit akilerneqassapput, kommuninilu pisortat sullissiviini katsorsartinnerup kingorna ajoqusernerit pillugit taarsiinernut aningaasartuutit kommuninit akilerneqassallutik.

3.4 Meeqqamut toqukku qimaguttumut ataasiarluni akiliineq

§ 16-imut siunnersuut malillugu ajoqusernerup malitsigisaannik suli 18-inik ukioqalersimanngitsumut meeqqamut toqusumut angajoqqaatut oqartussaassuseqartumut imaluunniit oqartussaassuseqartunut ajunngitsorsiasat nalunaarutigineqarput, tak. Kapitali 3. Nalunaarut atuutilerpat aningaasat annertussusaat aaqqiivigineqassapput. Naatsorsuutigineqarpoq aalajangersagaq taanna pisortanut annikitsumik

anigaasartuuteqartitsinermik kinguneqassasoq, qularnaatsumillu ilisimaneqarnissaa ajornaraluartoq ukiut siuliinit oqaluttuat takutippaat suliat taamatut ittut ukiumut ataatsip missaannik amerlassuseqartartut.

4. Inuussutissarsiortunut aningaasaqarnikkut allaffissornikkullu kingunerisassai

Inatsisartut inatsisaat taarsiiffigitinnissamut naammagittaalliuuteqarnissamullu annertunerusumik periarfissiivoq, tamannalu peqqinnissakkut ilinniarsimasunik sulinermik ingerlataqartunut suliffeqarfinnut namminersortunut aningaasartuuteqarnermik kinguneqarsinnaalluni, taarsiilluni akiliinikkut aamma atortussat oqaaseqaatillu oqartussanut naleqquttunut nassiunnerinut isumalluutinik atuinikkut.

§ 23, nr. 3-mut siunnersuut malillugu pisortani peqqinnissaqarfiup avataatigut ingerlanneqarsimasut katsorsaanerit malitsigisaanik ajoqusernerit pillugit katsorsaasarfiit namminersortut taarsiisussaataapput. Taamaattorli suliffeqarfik namminersortoq peqqinnissakkut ilinniarsimasumik sulisoqartoq taarsiilluni akiliinernut matussutissanik sillimmasiisariaqanngilaq. Sulisut kattuffiat Pension og Forskning oqaloqateqatigereerlugu ilisimatitsissutigineqarpoq taamatut sillimmasiinissamut neqeroorummik Kalaallit Nunaanni peqanngitsoq taamaattumillu naliliisoqarluni sillimmasiinissamut pisussaaffiup maannakkut eqqunneqarnera tulluassanngitsoq. Siunnersuummili sillimmasiinissamut piumasagaatit pillugit nalunaarummik nalunaaruteqarnissaata tunngavissinneqarnissaa qulakkeerneqassaaq. Sillimmasiissutit attuumassuteqartut Kalaallit Nunaanni pissarsiarineqarsinnaalerpata aamma tamanna pillugu piumasagaateqarnissaaq attuumassuteqarsorineqarpat tunngavissiineq tamanna atorineqarsinnaavoq.

5. Avatangiisinut, pinngortitamut inuillu peqqissusaannut kingunerisassai

Siunnersuut avatangiisinut pinngortitamullu kinguneqartitsissanngitsoq naliliisoqarpoq, kisianni naammagittaalliuuteqarnissamut periarfissap annertusineratigut ilikkagaqarnissamut annertuumik periarfissaqarpoq taamaalillunilu peqqinnissakkut neqeroorutit pitsaanerulernissaannut tunngavissaqarluni taamaalillunilu innuttaasut peqqinnerulersinnaallutik.

6. Innuttaasunut kingunerisassai

Peqqinnissaqarfiup iluani naammagittaalliuutit taarsiinissallu pillugit sulianik suliarinninnermut atatillugu innuttaasut inatsisitigut isumannaallisaanikkut annertuumik siunnersuummi pitsanngorsaaffigineqarput. Tamatumani siunnersuutikkut peqqinnissaqarfiup peqqinnissamut tunngasutigut sulinera pillugu naammagittaalliuuteqarsinnaanerup,

peqqinnissamut tunngasutigut sullissineq peqqinnissamut ilinniarsimasut akuerisaasut pillugit maalaarsinnaatitaanerup kiisalu napparsimasut ajoqusernertut taarsiivigitinnissamut qinnuteqarsinnaanerup periarfissinneqarnera tunuliaqutarineqarput.

7. Kingunerisinnaasai pingaarnerit allat

Siunnersuut annertuunik allanik kinguneqassanngitsoq naliliisoqarpoq.

8. Oqartussaasunik aamma kattuffinnik il.il. tusarniaaneq

Siunnersuut ullormi 15. maj 2021 www.naalakkersuisut.gl-imi tusarniaanernut nittartagaq aqputigalugu, akissuteqarnissamut 11. juni 2021 killigitillugu tamanut saqqummiunneqarpoq. Tusarniaanermut akissutigineqartut oqaaseqaatinik ilaqartut oqaatsit atorineqartut allanngortinnagit oqaatigeqqinneqarput, siunnersuummullu ilanngussaq 1-imi pisariaqartitsineq naapertorlugu oqaaseqarfigineqarlutik. Tusarniaanermut akissutigineqartunut oqaaseqaatit uingasumik allassimapput.

Siunnersuut maannakkutut isikkoqartillugu piffissami 18. januar 2024-imiit 16. februar 2024-
imut qulaani allaaserineqartoq suleriaaseq malillugu kingumut tusarniutigineqarsimavoq.
Tusarniaanermut akissutit piffissami tassani tiguneqartut ilanngussaq 1-imi suliarineqarput.
Piffissaq tusarniaaffiusoq ilanngussaq 1-imi sammineqarpoq.

Siunnersuummi aalajangersakkanut ataasiakkaanut nassuiaatit*§ 1-imut*

§ 1-imut siunnersuummi Inatsisartut inatsisaata atuuffia aalajangersarneqarpoq.

Imm. 1-imut

Inatsisartut inatsisaatigut Kalaallit Nunaanni peqqinnissaqarfiup iluani naammagittaalliuteqarnissamut taarsiinissamut periarfissaq sunniuteqarluartoq eqqunneqassaaq peqqinnissaqarfimmi peqqinnissamut tunngasutigut sulinerat pillugit, peqqinnissamut tunngasuni atorfillit akuerisat suliaat pillugit, suliarinninnivik pillugu naammagittaalliuteqarnermut (sullinneqarnermut naammagittaalliutit) naammagittaalliutinut, piviusumik sulineq pillugu naammagittaalliutinut kiisalu napparsimasut ajoqusernerinut taarsiinissaq pillugu sulianut ataatsimut maalaartarnermut aaqqissuussinermik pilersitsisoqassaaq.

"Peqqinnissakkut ilinniarsimasutut sulinermut" innersuussinermi eqqarsaatigineqarpoq peqqinnissakkut ilinniarsimasutut katsorsartinnerup sumi ingerlanneqarsinnaanerata annertuunngorlugu paasineqarnissaa. Taamaalilluni naammagittaalliuteqarsinnaaneq taarsiivigineqarsinnaanerlu pisortat napparsimmaviutaanni imaluunniit pisortat kigutileriffiutaanni peqqissutsimik suliallit suliarinninnerannuinaq killeqanngilaq, taamaattorli sumiiffimmut killilerlugu Kalaallit Nunaanniinaq suliarinninnermut taamaallaat ilaatinneqarpoq, taamaattorli § 10, imm. 3 takuuk. Telemedicinikkut Rigshospitalemi oqaloqatiginnittarnerit assersuutigalugu ilaatinneqanngillat, tassami tamakku Danmarkimi ingerlanneqartarmata. Tamanna pillugu suliat danmarkimi malittarisassat malillugit suliarineqarsinnaapput. Naammagittaalliuteqarnissamut taarsiinissamullu periarfissat aamma sumiiffinni allani peqqinnissakkut ilinniarsimasut katsorsaaneqni atuuppoq, peqqinnissaqarfimmi sulisoq katsorsaaneqni suliaqartoq akuersissuteqarpat.

Imm. 2-mut

Aalajangersakkamut siunnersuut malillugu kakiuisartut pinneraallutillu katsorsaasartut inatsimmut ilaanngillat. Kakiuineq imaluunniit pinneraalluni katsorsaaneq inuup pingaarnertut inuussutissarsiutigineeraa, saniatigut inuussutissarsiutigineeraa imaluunniit nuannariinnarlugu ingerlatarineraa matumani apeqqutaatinneqanngilaq. Pinneraalluni katsorsaaneqni, peqqinnissakkut ilinniarsimasut nakorsaaneqni akuersissutillit, Inatsisartut inatsisaannut ilaapput, tamanna imm. 1 aamma 2-mi aallaaveqalersinnaavoq.

Kakiortinneq aallaaviatigut taaguummumut "katsorsaannermut" ilaangilaq. Taamaattorli napparsimasup katsorsarneranut atatillugu kakiuineq, katsorsaaneq pillugu taaguummumut ilaavoq. Nakorsaaniikkut kakiuinissamik pisariaqartitsineq pissutigalugu napparsimasunik katsorsaannermut atatillugu kakiuineq nakorsaaniikkut kakiuineramik taaneqartarpoq. Nakorsaaniikkut kakiuineq napparsimmavissuarni atorneqarnerpaasarpoq. Katsorsaannermut atatillugu kakiuineq assersuutigalugu tassaapput qinnguartaartilluni katsorsaannermi qinnguartaartiffissanik nalunaaqutsiineq aamma qinnguartaammik misissuinermut atatillugu ameraasanik nalunaaqutsiineq. Iluarsaaqqinnermi, assersuutigalugu iviangikkut kræfteqarnermi pilattartinnerup kingorna mulinut assingusunik "nutaamik" kakiuineq imaluunniit napparsimasunik ameri nalinginnaasumi timip qalipaataata milattut ittunik qaortortaqaalersimasunik, taamatut nappaatillit amiinik kajorsaalluni imaluunniit napparsimasunut qallunik katagarnermik kinguneqartitsisumik nappaatilinnik kakiuineq aamma atorneqartarpoq. Tamatuma saniatigut nakorsaaniikkut kakiuineq aamma iluarsiinerni, assersuutigalugu pilatsinnerup kingorna ammip qalipaataa nalinginnaasoq pilerseqqinniarlugu, kiinnami qileqqumik qaortumik kajorsaalluni kakiuineq atorneqartarpoq. Taamaalillutik kakiuisartut, nakorsaaniikkut kakiuineramik suliaqartut Inatsisartut inatsisaannut matumunnga ilaapput.

Pinnerisaalluni suliarinnittarneq iluarsilluni sulinertut nassuiarneqarpoq, tassani pinnerisaanissaq imaluunniit isikkumik allangortitsinissaq pitsanngorsaaniissarlunniit pingaarnertut siunertaralugit katsorsaaniissamut pingaarutilimmik pisariaqartuussallutik. Tassa imaappoq pinnerisaalluni katsorsaannermi pilattaaneq allatigullunniit suliarinninnerit pineqarput, taakkunani pinnerisaanissaq pingaarutilimmik pisariaqartuussalluni aammalu isikkup allangortinnissaa pitsanngorsarnissaaluunniit pingaarnertut siunertarinqassalluni. Tamanna inatsisartut inatsisaanni matumani "katsorsaaneq" pillugu nassuiaammumut naapertuutinnigilaq (§ 2, imm. 1-imut nassuiaatit takukkit). Tamannalu assersuutigalugu isumaqarpoq botox-imut suliaritinnermut ajoquteqalerneramik kinguneqartumut Inatsisartut inatsisaat manna malillugu naammagittaalliuuteqartoqarsinnaassanngitsoq taarsiissutinullunniit qinnuteqartoqarsinnaassanngitsoq.

Pilattaanerit pinnerisaallunilu suliarinninnerit allat, isikkup allangortinnissaanut isikkorissaanissamillu siunertallit, peqqinnissamullu tunngasutigut sullissisumit timikkut tarnikkullu (nakorsaalluni) suliarinninnertut ingerlanneqartut matumani Inatsisartut inatsisaannut ilaapput, tassunga ilanngullugit ilaatigut kræftimik napparsimanagerup kingorna iluarsaassinerit, meeqqat pissusissamisuunngitsumik ajoqutaannik pilattaanerit imaluunniit katsorsarneqarsinnaanngitsumik migrænerternermut botoximik katsorsaanerit.

Imm. 3-mut

Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuuseqartarneq pillugit (Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuuseqartarneq pillugit Inatsisartut Inatsisaat nr. 11, 12. juni 2019-imeersumi) malittarisassat atuuttut malillugit suli sularineqartassapput aamma Inatsisartut inatsisaanni matumani malittarisassanut ilaanatik.

Imm. 4-mut

Nakorsaatit aalajangersimasut piginnaasaannik taamaallaat peqquteqartut ajoqusernerit pillugit taarsiinerit inatsisartut inatsisaanni matumani malittarisassanut ilaanngillat.

Imm. 5-imut

Peqqinnissamut tunngasutigut sullissisut allat inatsisartut inatsisaat manna malillugu nalunaarummi akisussaannermut ilaasinnaanannerannik aalajangersaanissamut aalajangersakkami Naalakkersuisut piginnaatinneqarput. Inatsisartut inatsisaanni siunertap akuerinissanut napparsimasullu naammagittaalliuuteqarnissamut taarsiiffigineqarnissamullu periarfissai eqqarsaatigalugit pisariaqalersoq paasineqarpat piginnaatitsissut atorneqassasoq pingaartumik eqqarsaatigineqarpoq.

§ 2-mut

Nr. 1-imut

"Peqqinnissaqarfik" ima paasineqassaaq peqqinnissaqarfik tamarmiusoq, matumani napparsimmaviit, peqqissaaviit, peqqissaaveqarfiit, nunaqarfinni nakorsiartarfiit il.il. Taamaalluni taaguummi Kalaallit Nunaanni Kigutileriffeqarfiit, kigutileriffiit namminersortut, Nunatta Nakorsaataasivia, nunap immikkoortuini tallimani peqqissaaviit aamma Dronning Ingridip Napparsimmavissua pineqarput. Inatsisartut Inatsisissaat una Pituffiup sakkutooqarfiata iluani Kalaallit Nunaanni peqqinnissaqarfimmit nakorsartinnissamik pisariaqartitsisunik misissuinerunngippat nakorsartinnissamullu innersuussinerunngippat, Pituffiup sakkutooqarfiani peqqinnissakkut sullissisunut atuutinngilaq.

Napparsimmavissuarmut uninnissaq sioqqullugu suliniutit peqqinnissaqarfimmit ingerlanneqartut aamma ilaapput. Namminersorlutik katsorsaasartut aaqqissuussinermut ilaasut ikittuinnaapput. Katsorsaaviit namminersortut allat nutaat peqqinnissamut tunngasutigut suliaqartussat peqqinnissamut tunngasutigut sullissisutut akuerisaappata naammagittaalliuuteqartarnermut aaqqissuussinermi ilaajumaarput.

Nr. 2-mut

”Peqqinnissakkut ilinniarsimasutut sulinermi” suliarinninneq Napparsimasut inatsisitigut inissisimanerat pillugu Inatsisartut peqqussutaanni nr. 6, 31. maj 2001-imeersumi nassuiarneqartutut paasineqassaaq. Katsorsaaneq misissuinertut, nappaammik suussusersiuinertut, nappaammik katsorsaaneq, sungiusaaqqinnertut, peqqinnissamut tunngasutigut paaqqutarinninnertut aamma napparsimasunut ataasiakkaanut tunngatillugu pinaveersaartitsilluni suliniuteqarnertut nassuiarneqarpoq. Katsorsaaneq periarfissat allat ilaanngillat. Katsorsaaneq periarfissat allat ima paasineqassapput katsorsaariaatsit annerusumik peqqinnissaqarfiup avataani atornerqartartut aammalu katsorsaaneq isumaloriaatsinik aalajangersimasunik, assersuutigalugu katsorsaariaatsimik Kinamiut ileqqutoqaanneersumik (traditionel kinesisk medicin), meqqutit atorlugit peqqissaariaatsimik (akupunktur), niaqqup saarnga aallaavigalugu timimik katsorsaaneq (kraniosakral terapi), assaat isikkallu aallaavigalugit timimik katsorsaaneq (zoneterapi) il.il. tunngavillit. Katsorsaariaatsit maannakkut sunniuteqartarneri pillugit nakorsamit uppersarneqarsimanngitsut, assersuutigalugu imerajuttunik katsorsaaneq ilaatinneqanngillat.

Nr. 3-mut

Peqqinnissaqarfimmi sulisut pillugit nassuiaat aalajangersakkami allattorneqarpoq. Litra a aamma b-mi allattuinerit tamakkiisuunngillat taamaattumillu aalajangersakkami allaaserineqareersimasutut maannakkut inuit sulisut aallaavigalugit paasineqassalluni. Litra b aamma c-mi allattuineq tamakkiisumik allaaserinninngilaq.

§ 3-mut

Imm. 1-imut

Siunnersuutip malitsigisaanik peqqinnissaqarfiup peqqinnissamut tunngasutigut sulineranut naammagittaalliuutinik Danmarkimi Napparsimasut naammagittaalliuutaannut Aqutsisoqarfik aalajangiisassaaq. Napparsimasut naammagittaalliuutaannut Aqutsisoqarfik isornartorsiuinissamut tunngavissaqarnerisut pillugu aalajangiinermini peqqinnissaqarfimmi peqqinnissamut tunngatillugu suliatigut sulineq ataatsimut isigalugu sullissinermi pitsaassuseq nalinginnaasumik kalaallit nunaanni akuerisaq malillugu sullissisoqarsimanersut pillugu isummissaaq, sukumiinerusumik imarisaat Napparsimasut naammagittaalliuutaannut Aqutsisoqarfiup sulinerani ineriartortinneqassappata. Taamaalilluni Napparsimasut naammagittaalliuutaannut Aqutsisoqarfik peqqinnissamut tunngasutigut sullissinerup pitsaassusaanik tunngaveqarluni naliliissaaq. Peqqinnissamut tunngasutigut sullissinerup pitsaassusaani tassani kalaallit nunaanni pissutsit katsorsaaneq atukkat

eqqarsaatigineqassapput. Taamaalilluni napparsimasumik katsorsaannermi peqqinnissamut tunngasutigut katsorsaannerut aalajangersimasunut tunngatillugu naammagittaalliuutinik Napparsimasut naammagittaalliuutaannut Aqutsisoqarfik taamaallaat isummertussaassaaq, peqqinnissamut tunngasut pitsaassusaannuunngitsoq.

Napparsimasut naammagittaalliuutaannut Aqutsisoqarfiup aalajangiineri katsorsaavimmut pineqartumut, assersuutigalugu napparsimmavimmut peqqissaavimmulluunniit katsorsaasimasumut maalaarummi pineqartumut nassiunneqassapput. Aalajangiinerit aamma Nunatta Nakorsaaneqarfianut nassiunneqassapput.

§ 3, imm. 1 malillugu peqqinnissaqarfimmi suliatigut sulinermut naammagittaalliuutip assinga Napparsimasut Maalaarutaannik Aalajangiisartunut suliassanngortinneqarsimappat suliatigut sulinerup assinga pillugu naammagittaalliuut suliarineqarsinnaanngilaq. Aalajangersakkap kingunerisaanik Napparsimasut Maalaarutaannik Aalajangiisartut peqqinnissamut tunngasutigut sullissisup suliatigut sulineranut aalajangersimasumut arlallilluunniit sulinerannut tunngatillugu maalaarummik suliaqarpat suliaqarnikuuppalluunniit, suliatigut sulinermut naammagittaalliuutit katsorsaannermi tassani katsorsaanerulluunniit ingerlaneranut peqqinnissaqarfimmi suliatigut sulinermut naammagittaalliuutit Napparsimasut naammagittaalliuutaannut Aqutsisoqarfimmit suliarineqarsinnaanngillat.

Nunatta Nakorsaaneqarfia maalaarummik tigusaqaruni taassuma katsorsaanerup assinga pillugu naammagittaalliuutigineqartumik Napparsimasut Maalaarutaannik Aalajangiisartut suliaqarsimannginnerat suliaqalinnginneralluunniit qulakkeeqqaassagaa aalajangersakkami piunasaqaataavoq, tassami taamaattoqassagaluarpas Nunatta Nakorsaaneqarfianit naammagittaalliuut itigartitsissutigineqassammat.

Imm. 2-mut

Napparsimasut Naammagittaalliuutaannut Aqutsisoqarfiup peqqinnissaqarfimmi peqqinnissamut tunngatillugu suliatigut sulinermut naammagittaalliuutinik aalajangiinerani qisuariarnissamut periarfissai siunnersuummi aalajangersarneqarput. Napparsimasut naammagittaalliuutaannut aqutsisoqarfik peqqinnissaqarfimmi peqqinnissamut tunngatillugu suliatigut sulinermik isornartorsiuinissamut tunngavissaqarneris pillugu aalajangiinermini napparsimasumik katsorsaannermi peqqinnissaqarfimmi suliatigut sulineq (ataatsimut isigalugu taassumaluunniit ilaanik) sullissinermi pitsaassuseq nalinginnaasumik akuerisaq malillugu sullissisoqarsimanersaq pillugu isummissaaq.

Aalajangersagaq malillugu Napparsimasut inatsisitigut inissisimanerat pillugu Inatsisartut peqqussutaanni kapitali 2-5-imiittuni malittarisassanut naammagittaalliuutinut, matumani

paasissutissinneqareernikkut isumaqataalluni akuersineq, napparsimasoq pillugu allattugaatinik takunnissinnaaneq, nipangiussisussaataaneq il.il. pillugit malittarisassanut tunngatillugu Napparsimasut naammagittaalliuutaannut Aqutsisoqarfik aamma isummersinnaavoq. Tassunga atatillugu inatsisit sanioqqunneqarsimanersut pillugit Napparsimasut naammagittaalliuutaannut Aqutsisoqarfik isummissaaq.

Imm. 3-mut

Napparsimasut naammagittaalliuutaannut Aqutsisoqarfimmit aalajangiinerit allaffissornikkut oqartussanut allanut ingerlateqqinneqarsinnaannginnerat aalajangersakkami aalajangersarneqarpoq. Napparsimasut naammagittaalliuutaannut Aqutsisoqarfik aamma suliat aalajangiiffigineranni ingerlatsinermi inatsisitigut malittarisassanik eqqortitsisimanersoq apeqqutaavoq.

Kukkusoqarsimappat imaluunniit suliamut tunngasumik isumaqatigiinngitsoqarpat suliaq qaqqinniaqqinneqassaaq taamaalilluni suliamik nutaamik naliliisoqarluni. Noqqaassut tunuliaqutaralugu suliareqqinnissaannut tunngavissisinnaasunik paasissutissanik nutaanik pingaarutilinnillu takkuttoqarsimanersoq aqutsisoqarfik naliliissaaq. Qaqeqqinneqarnissaanut noqqaaneq napparsimasumit, katsorsaavimmit imaluunniit Nunatsinni Nakorsaaneqarfimmit saqqummiunneqarsinnaavoq.

§ 4-mut

Imm. 1-imut

Siunnersuuteqarnerup kingunerisaanik peqqinnissamut tunngasuni atorfillit akuerisat suliaat pillugit naammagittaalliuutinut tunngatillugit Danmarkimi Napparsimasut Maalaarutaannik Aalajangiisartunit aalajangiisoqartalissaaq.

Peqqinnissamut tunngasuni atorfillit § 2, nr. 3-mut nassuiaatini taaneqartut Napparsimasut Maalaarutaannik Aalajangiisartut suliaasaqarfiinut ilaapput.

Inatsisartut Inatsisissaat una Pituffiup sakkutooqarfiata iluani Kalaallit Nunaanni peqqinnissaqarfimmit nakorsartinnissamik pisariaqartitsisunik misissuinerunngippat nakorsartinnissamullu innersuussinerunngippat, Pituffiup sakkutooqarfiani peqqinnissakkut sullissisunut atuutinngilaq.

Peqqinnissaqarfimmi peqqinnissamut tunngasutigut sulinermut naammagittaalliuutigineqarpat, tak. siunnersuummi § 3, imm. 1, imaluunniit naammagittaalliuut Napparsimasut naammagittaalliuutaannut Aqutsisoqarfimmit

suliarineqarsimappat, taava Napparsimasut Maalaarutaannik Aalajangiisartut naammagittaalliuut suliarisinnaanngilaat.

Imm. 2-mut

Aalajangersagaq malillugu imm. 1-imut ilaasunik sulianik Napparsimasut Maalaarutaannik Aalajangiisartunut naammagittaalliornissamik Nunatsinni Nakorsaaneqarfik suliaasaqarpoq. Nunatsinni Nakorsaaneqarfik sakkortuumik pisoqarsimasoq naliliippat suliat taamaallaat suliaasannngortinneqarsinnaapput. Sakkortuumik pisoqarnera pisarnertut pineqassaaq napparsimasumik katsorsaaneermut atatillugu peqqinnissaqarfimmi sulisup aalajangersimasup pineqartup sulisarneranit ileqquusumit appasinnerusumik iliuuseqarsimanera pillugu maalaarummi allassimasoqarpat. Tamanna assersuutigalugu tassaasinnaavoq:

- Nakorsaq pilattaanermi assak, taleq imaluunniit niu peqqissoq katsorsartinneqartussarlu paarlaassimappagit.
- Anniartumik katsorsaaneermut atatillugu nakorsap peqqissaasulluunniit ingasattumik nakorsaasersuina.
- Napparsimasup nakorsaatiniq sapigaqarneranik uppersarsarneqarsimasumik takunninngitsoornera sapigaqarnermi qisuariarluni.

Taamatut iluseqartut pissutsit sakkortuumik pisuunersut Nunatsinni Nakorsaaneqarfik naliliisussaavoq.

Imm. 3-mut

Aalajangersakkap malitsigisaanik peqqinnissakkut ilinniarsimasutut sulineq § 3-mut ilaappat Napparsimasut Maalaarutaannik Aalajangiisartut suliamik suliarinnissanngillat, tassa katsorsaaneerup ingerlanera pillugu naammagittaalliuutitut suliaq suliarineqarpat.

Imm. 4-mut

Napparsimasut Maalaarutaannik Aalajangiisartut peqqinnissamut tunngasuni atorfillit akuerisat suliaat pillugit naammagittaalliuutiniq aalajangiinerani qisuariarnissamut periarfissaat siunnersuummi aalajangersarneqarput. Napparsimasut Maalaarutaannik Aalajangiisartut peqqinnissamut tunngasuni atorfiluip suliaqarneranik isornartorsiuinissamut tunngavissaqarnerisooq pillugu aalajangiinerminni napparsimasumik katsorsaaneermi peqqinnissaqarfimmi suliatigut sulineq (ataatsimut isigalugu taassumaluunniit ilaanik) sullissinermi pitsaassuseq nalinginnaasumik akuerisaq malillugu sullissisoqarsimanersooq pillugu isummissapput.

Aalajangersagaq malillugu Napparsimasut Maalaarutaannik Aalajangiisartut kapitali 2-5-imiittuni malittarisassanut naammagittaalliuutitut, matumani paasisutissinneqareernikkut isumaqataalluni akuersineq, napparsimasooq pillugu allattugaatinik takunnissinnaaneq,

nipangiussisussaataaneq il.il. pillugit malittarisassanut tunngatillugu Napparsimasut maalaarutaannik Aalajangiisartut isummersinnaapput. Tassunga atatillugu inatsisit saneqqutaarneqarsimanersut pillugit Napparsimasut maalaarutaannik Aalajangiisartut isummissapput.

Imm. 5-imut

Napparsimasut naammagittaalliuutaannut Aqutsisoqarfimmit aalajangiinerit allaffissornikkut oqartussanut allanut ingerlateqqinneqarsinnaannginnerat aalajangersakkami aalajangersarneqarpoq. Napparsimasut naammagittaalliuutaannut Aqutsisoqarfik aamma suliat aalajangiiffigineranni ingerlatsinermi inatsisitigut malittarisassanik eqqortitsisimanerinit apeqqutit aamma ilanngullugit.

Kukkusoqarsimappat imaluunniit suliamut tunngasumik isumaqatigiinngitsoqarpat suliaq qaqqinniaqqinneqassaaq taamaalilluni suliamik nutaamik naliliisoqarluni. Noqqaaneq tunuliaqutaralugu suliareqqinneqarnissanut tunngaviliisinnaasunik paasisutissanik nutaanik annertuunillu takkuttoqarsimanersoq Napparsimasut Maalaarutaannik Aalajangiisartut naliliissapput. Qaqeqqinneqarnissanut noqqaaneq napparsimasumit, katsorsaavimmit aamma Nunatsinni Nakorsaaneqarfimmit saqqummiunneqarsinnaavoq.

Imm. 6-imut

Siunnersuutigineqarpoq Naalackersuisut imm. 1 aamma 2-mut tunngatillugu nalunaarusiornikkut aalajangersaasinnaasut, tassani ilaalluni aalajangersakkat taaneqareertut aamma saneqqunneqarsinnaaneramik.

§ 5-imut

§ 5-imut siunnersuutikkut peqqinnissaqarfimmi peqqinnissamut tunngasutigut sulineq pillugu naammagittaalliuuteqarnissamut napparsimasut nutaamik periarfissaqalerput. Aalajangersagaq malillugu napparsimasumiit taannaluunniit sinnerlugu naammagittaalliuut taamaattoq Nunatta Nakorsaaneqarfianut tunniunneqassaaq. Taanna naammagittaalliuut suliarineqarsinnaanersoq pillugu aallarniutaasumik naliliissaaq, allatigut suliamik piareersaalluni, tassunga ilanngullugit akuersinermik pissarsiniarneq, napparsimasut pillugit allattugaatinik pissarsiniarneq, nutserineq il.il., kiisalu naammagittaalliuut Danmarkimi Napparsimasut naammagittaalliuutaannut Aqutsisoqarfimmi suliarisassanngorlugu aalajangiiffigisassanngorlugulu nassiullugu. Nunatta Nakorsaaneqarfiata suliamik piareersaanera pillugu sukumiinerusumik itisiliinermut § 6-imut nassuiaatinut innersuussisoqarpoq.

Aalajangersagaq Kalaallit Nunaanni katsorsaavik ataaseq arlallilluunniit pillugit naammagittaalliuuteqarnissamut periarfissiivoq.

§ 6-imut

Imm. 1-imut

Naammagittaalliuut suliarineqarsinnaanersoq pillugu Nunatta Nakorsaaneqarfia aallarniutaasumik naliliinermik tigusaqartassasoq aallarniutaasumillu naliliisassasoq siunnersuummi § 6-imi aalajangersarneqarpoq. Naliliinermi matumani Nunatta Nakorsaaneqarfia naammagittaalliuutip imarisaanut isummissanngilaq, taamaallaalli naammagittaalliuut naammagittaalliuuteqartarnermut aqqissuussinermi ilaanersoq, taamaalillunilu inatsisartut inatsisaanni matumani malittarisassat malillugit suliarineqarsinnaanersoq isummissalluni.

Taamaalilluni naammagittaalliuut Peqqinnissaqarfimmi peqqissutsimik ingerlatsisunut tunnganersoq aamma naammagittaalliuut Napparsimasut Maalarutaannut Aqutsisoqarfimmut ingerlateqqinneqassanersoq Nunatsinni Nakorsaaneqarfiup nalilersussavaa naammagittaalliuutit Napparsimasut Maalaarutaannik Aalajangiisartunut ingerlateqqinneqassanersoq imaluunniit naammagittaalliuut itigartitsissutigineqassanersoq Nunatta Nakorsaaneqarfianit aamma nalilersorneqassaaq.

Kikkut maalaarummik tunniussisinnaanerinit tunngatillugu kinaluunniit Kalaallit Nunaanni peqqinnissamut tunngasutigut katsorsartinneqarsimasoq naammagittaalliuuteqarsinnaatitaavoq. Inuit utaqqiisaasumik Kalaallit Nunaanni najugaqartut - assersuutigalugu takornariat - peqqinnissamut tunngasutigut katsorsartinneqartut aamma naammagittaalliuuteqarsinnaatitaapput. Taamatuttaaq napparsimasut Kalaallit Nunaanni katsorsarneqarsimasut peqqinnissaqarfiup peqqinnissakkut ilinniarsimasutut sulinera pillugu Danmarkimi Napparsimasut naammagittaalliuutaannut Aqutsisoqarfimmut toqqaannartumik Naammagittaalliuuteqarsinnaanngitsut allassimavoq.

Imm. 2-mut

Napparsimasup naammagittaalliuutaa Napparsimasut Naammagittaalliuutaannut Aqutsisoqarfimmut imaluunniit Napparsimasut Maalaarutaannik Aalajangiisartunut ingerlateqqinnginnerani Nunatta nakorsaaneqarfia namminersorluni aammalu piareersaalluni sulianik suliarinnissasoq siunnersuutigineqarpoq. Kalaallit Nunaanni peqqinnissaqarfimmut tunngasuni pissutsit pilugit paasissutissanik attuumassuteqartunik, Danmarkimi peqqinnissamut tunngasuni arlalitsigut allaanerussuteqarsinnaasunik, Napparsimasut naammagittaalliuutaannut Aqutsisoqarfiup imaluunniit Napparsimasut Maalaarutaannik Aalajangiisartut pissarsinissaata qulakkeernissaa matumani siunertaavoq. Taamaalilluni

naammagittaalliuutip tigusaqareerneratigut, naammagittaalliuutip ersarissarneqareerneratigut suliallu eqikkarneqareernerata kingorna Nunatta Nakorsaaneqarfiata suliaq piareersarsinnaalissavaa. Nunatta Nakorsaaneqarfiata suliamik suliarinninneratigut, taarsiinissamut Kalaallit Nunaanni suliat Kalaallit Nunaanni pissutsit aallaavigalugit nalilersorneqarnissaat qulakkeerneqassaaq.

Imm. 3-mut

Suliamik piareersaanermi tassani suliap pisoqalisoorsimanissaanut isummerneq aamma ilaavoq. Naammagittaalliuutip pillugit suliat ataasiakkaat allaffissornikkut aningaasartuuteqartitsisinnaanerata killilerniarlugu taamatut siusissukku pisoqalisoorsimanerup isummerfigisinnaanissaanut periarfissaq eqqunneqarpoq. Naammagittaalliuut erseqqissumik pisoqalisoorsimappat taassuma naammagittaalliuutip pisoqalisanera paaseqqinniarlugu Danmarkimut ingerlateqqinneqarnissaa naleqqutinngilaq. Taamaammat pisuni taakkunani Nunatta Nakorsaaneqarfia suliap pisoqalisoorsimanera pillugu aalajangiissaaq. Pisoqalisoorsimanersoq nalornissutigineqarpat tamanna pillugu apeqqut Napparsimasut naammagittaalliuutaannut Aqutsisoqarfimmut imaluunniit Peqqinnissaqarfimmi Napparsimasut Maalaarutaannik aalajangiisartunut nassiunneqartariaqarpoq. Pisoqalisoorsimanera pillugu Nunatta Nakorsaaneqarfiata aalajangiinera naammagittaalliuutigineqarpat tamanna immikkut suliarisassanngorlugu Napparsimasut naammagittaalliuutaannut Aqutsisoqarfimmut imaluunniit Peqqinnissaqarfimmi Napparsimasut Maalaarutaannik Aalajangiisartunut nassiunneqassaaq.

Imm. 4-mut

Taamatuttaaq naammagittaalliuut erseqqilluinnartumik tunngavissaqanngippat, taava Nunatsinni Nakorsaaneqarfiup naammagittaalliuutip suliarinissaanik itigartitsissuteqarsinnaavoq. Tunngavissaqanngippat assersuutigalugu isumaqarpoq katsorsaanermut tunnganngitsunik pissutsinik imaluunniit piviusumut naapertuutinngitsunik katsorsaanermik allaaserinnilluni maalaaruteqarneq. Nunatsinni Nakorsaaneqarfiup aalajangiinera naammagittaalliuutigineqarpat, suliaq immikkut suliarisassanngorlugu Napparsimasut malaarutaannut Aqutsisoqarfimmut imaluunniit Peqqinnissaqarfimmi Napparsimasut Maalaarutaannik aalajangiisartunut immikkut ittumik suliarineqartussanngorlugu nassiunneqassaaq.

Imm. 5-imut

Nunatta Nakorsaaneqarfiani atortussat attuumassuteqartut nutserneqarnissaat qulakkeerneqassapput, tassunga ilanngullugit naammagittaalliuut, journalinut atortussat, suliasamik saqqummiussaq il.il. attuumassuteqarsorineqarpat pisariaqarpalluunniit danskisuumut kalaallisuumulluunniit nutserneqassanersut. Tassunga atasunik

anigaasartuutini Nunatsinni Nakorsaaneqarfik akiliissaaq tamanna inatsisini allani imaluunniit isumaqatigiissummit takuneqarsinnaanngippat.

Imm. 6-imut

Siunnersuutigineqarpoq Naalakkersuisut paragraf manna atorlugu nalunaarusiornikkut aalajangersaasinnaasut. Aalajangersagaq ilaatigut imm. 3 aamma 4 atorlugu aalajangikkanut tunngatillugu naammagittaalliuutinut maleruagassaliornissaanut periarfissiisoqarsinnaavoq.

§ 7-imut

Imm. 1-imut

§ 7, imm. 1-imut siunnersuutip kingunerisaanik napparsimasut Nunatta Nakorsaaneqarfianut naammagittaalliuuteqarnissamut Inatsisartut inatsisitigut piffissaliussat iluanni peqqinnissaqarfiup peqqissutsimut tunngatillugu sulinera pillugu naammagittaalliuuteqartut katsorsaavimmik oqaloqateqarnissamik neqeroorfigineqassapput. Nunatta Nakorsaaneqarfia oqaloqateqarnissamut periarfissaq pillugu napparsimasumut ilisimatitsissaaq.

Peqqinnissamut tunngasutigut sullissinernut, peqqinnissaqarfimmit tamakkiisumik ilaannakuusumilluunniit anigaasartuuteqarfigisaanut tunngasunik naammagittaalliuutinut aalajangersakkat malillugit oqaloqateqarnissamut neqeroorut atuuppoq. Napparsimmavinnut, matumani napparsimmavinni namminersortuni katsorsartinnermut aamma napparsimmavissuarmut uninnissaq sioqqullugu suliniutinut peqqinnissaqarfimmit ingerlanneqartunut tunngasunut naammagittaalliuutit pineqarput. Tamanna aamma kigutileriffinni katsorsartinnermut atuuppoq. Oqaloqatigiinnissaq pillugu neqeroorummut ilaangitsut tassaapput napparsimasut pisinnaatitaaffiitut tunngasut naammagittaalliuutit peqqinnissaqarfimmi peqqissaanermik suliaqarneq, soorlu ilaatigut makkuusinnaasut, peqqinnissaqarfimmi allattukkanik assigisaanillu takunnissinnaatitaanermut itigartitsineq. Taamaattorli oqaloqateqarnissamut neqeroorut Kalaallit Nunaannut killeqartinneqarpoq. Tassa isumaqarpoq Danmarkimi katsorsartissimagaanni Danmarkimi katsorsaavimmik oqaloqateqarnissamik neqeroorfigineqarnissamut napparsimasutut piumasartoqarsinnaanngitsoq. Taamaattorli suliassami aalajangersimasumi attuumassuteqarsorineqarpat Kalaallit Nunaanni Peqqinnissaqarfimmi sulisumik oqaloqateqarnissaq neqeroorutigineqarsinnaavoq. Suliap Danmarkimi Napparsimasut naammagittaalliuutaannut Aqutsisoqarfimmut nassiunnerani Nunatta Nakorsaaneqarfiata suliamik saqqummiussinerani napparsimasup oqaloqatigiinnermi peqataasimanera taassumalu inernerani allanneqarsinnaapput.

Oqaloqatigiinnissaq napparsimasup kissaatigippagu, tamatuminnga aallarniinissamut katsorsaavik aalajangersakkatigut pisussaaffilerneqarpoq. Oqaloqatigiinneq peqqinnissaqarfimmi siunnersortimit imaluunniit piginnaasalimmit allamit aammalu katsorsaavimmi pineqartumi inummit tamakkuninnga suliaqarsinnaatitaasumit ingerlanneqassaaq. Taamaattorli kina oqaloqatigiinnissanersoq katsorsaavimmi nalilersorneqassaaq aamma napparsimasup Peqqinnissaqarfimmi sulisumik aalajangersimasumik oqaloqatigiinninnissani aalajangersinnaanngilaa. Napparsimasup kissaatai kina peqataasussatut tulluarneranik naliliinermi ilaatinneqartariaqarpoq.

Najukkami oqaloqatigeeriaatsip aqunneqarnissaa katsorsaaviup nammineerluni aaqqissuussinnaavaa, soorluttaaq pissutsit aalajangersimasut eqqarsaatigalugit oqaloqatigiinnerup qanoq ingerlanissaa, matumani oqaloqatigiinnernik ataasiarluni arlaleriarluniluunniit neqerooruteqarnissaaq aamma oqaloqatigiinneq skypekkut teknologimilluunniit aaqqiissut alla atorlugu ingerlanneqassanersoq pillugu nalilersuissasoq. Katsorsaavik ilaatigut peqqinnissaqarfimmi siunnersortimik ataatsimeeqateqarnissamut napparsimasumik aggersaasinnaavoq, soorluttaaq napparsimasumik ataatsimeeqateqarnermi peqqinnissaqarfimmi tunngasutigut sullissisut akuusimasut peqataanissaannut katsorsaavik aggersaasinnaassasoq. Oqaloqatigiinnerup qanoq ingerlanneqarnissaanik katsorsaaviup aaqqissuussinerani napparsimasup oqaloqatigiinnissap ilusissaanut kissaatai sapinngisamik katsorsaavimmit eqqarsaatigineqartariaqarput.

Napparsimasumik oqaloqateqarnermi atorfinitsitsinermi inatsisitigut pisussaaffiit qaangerlugit peqqinnissamut tunngasutigut sullissisut katsorsaanermi ilaasimasut peqataanissaannut aalajangersakkatigut katsorsaavik peqqusisinnaatitaanngilaq.

Imm. 2-mut

Oqaloqatigiinnerup kingorna napparsimasup naammagittaalliuutimi suliarineqarnissaa kissaatiginnigippagu tamanna pillugu katsorsaavik Nunatta Nakorsaaneqarfianut nalunaaruteqassaaq tamatumalu kingorna naammagittaalliuut naammassineqartutut isigineqassaaq. Oqaloqatigiinnerup kingorna napparsimasup naammagittaalliuutimi suli suliarineqarnissaa kissaatigippagu suliامي paasissutissat attuumassuteqartut tamaasa suliarineqaaqqinnissaanut atugassanngorlugit katsorsaaviup Nunatta Nakorsaaneqarfianut nassiutissavai. Suliap suliareqqinneqarnissaanut paasissutissat ilaatigut tulluartut tassaapput napparsimasoq pillugu allattukkat, timikkut peqqissuuneq pillugu paasissutissat, oqaloqatigiinnermiit inerniliussat kiisalu peqqinnissaqarfimmi sulisumit attuumassuteqartumiit imaluunniit katsorsaaviup pisortaaniiit oqaaseqaataasinnaasut.

Imm. 3-mut

Aalajangersakkap napparsimasoq oqaloqatigiinnermi illersuisoqarsinnaatilerpaa.

Imm. 4-mut

Aalajangersakkap ersarissumik imm.1-imi saneqqunneqarsinnaanngitsunut aalajangersaanissamut ammaassivoq. Immikkoortup Naalakkersuisut imm. 1 pillugu ersarinnerusumik maleruagassiorsinnaatippaa, tassunga ilaalluni assersuutigalugu oqaloqatiginnissamut killiliussaq sapaatip akunneranut marlunnut apparneqarsinnaalluni imaluunniit sapaatip akunneranut arfinilinnut sivitsorneqarsinnaalluni tamanna naleqquttutut imaluunniit pisariaqartinneqartut nalilernerqarpat. Taamatuttaaq peqqinnissaqarfimmi oqaloqatiginnissamut sukumiisumik malittarisassiortoqarnissaanut pilersitsivoq.

§ 8-mut**Imm. 1-imut**

§ 5 malillugu peqqinnissaqarfiup peqqissutsimut tunngatillugu sulinera pillugu naammagittaalliuteqarnissamut ukiunik marlunnik piffissaliussaq § 5-imut siunnersuummi aalajangiunneqarpoq. Ukiunik marlunnik piffissaliineq piffissamiit naammagittaalliuteqartup pissutsinik naammagittaalliutigineqarsinnaasunik ilisimasaqalerneraniit imaluunniit ilisimasaqarfigilersimasussaagaluaniiit naatsorsorneqassaaq.

Imm. 2-mut

Aammattaaq naammagittaalliutip tunniunneqarnissaanut ukiunik tallimarluinnarnik piffissaliisoqarpoq, taannalu pissutsip naammagittaalliutigineqartup ullormi pineraniit naatsorsorneqarluni. Taamaalilluni ukiunik tallimanik piffissaliineq napparsimasup pissutsinik naammagittaalliutigineqartunik qanoq ilinerani ilisimasaqalerneranut attuumassuteqanngilaq.

Imm. 3-mut

Naammagittaalliuteqarnissamut piffissaliussatut taaneqartut saneqqunneqarsinnaanngillat.

§ 9-mut**Imm. 1-imut**

Peqqinnissaqarfiup kiffartuussineranut il.il. naammagittaalliutit pillugit kaajallaasitaq nr. 13, 19. december 2002-meersoq malillugu “kiffartuunneqarneq pillugu naammagittaalliutit”-nik taaneqartoq periarfissaareersoq § 9-mik siunnersuutikkut ingerlateqqinneqarpoq.

Peqqinnissaqarfimmi sulinivik (sullissineq) aamma § 5-imut siunnersuummi ilaanngitsoq pillugu napparsimasut maalaarsinnaanerannut siunnersuut periarfissiiivoq. Peqqinnissamut

tunngasutigut suliarinninnermut aalajangersimasumut tunngasut naammagittaalliuutit pinnagit, taamaattorli suliarinniffimmik ataatsimut isigalugu naammagisimaarinninnginnermik ersersitsiffiunerusut pineqarlutik. Assersuutigalugu sullissinerup pitsaassusaa, matumani assersuutigalugu najukkami pissutsit, nerisaqarneq aamma eqqiaaneq imaluunniit peqqinnissamut tunngasutigut sullissisut pissusilersornerat pillugit naammagittaalliuuteqarnerit aalajangersakkami ilaapput.

Katsorsaavimmi nalinginnaasumik utaqqisarnerit pillugit naammagittaalliuutit aallaaviatigut "sullinneqarnermut naammagittaalliuutinut" ilaapput. Taamaattorli § 5-imut siunnersuut malillugu Nunatta Nakorsaaneqarfia naliliinermini katsorsaanerup ingerlanerani utaqqinerit namminermit peqqinnissamut tunngasutigut sunniuteqarsimanersut imaluunniit sunniuteqarsimasinnaagaluarnersut tamatumalu malitsigisaanik peqqinnissaqarfimmi peqqinnissamut tunngatillugu suliatigut sulinermit pitsaassuseq nalinginnaasumik akuerisaq malinneqarsimanersoq pillugu isummersinnaavoq. Suliani ataasiakkaani tamatigut aalajangersimasumik naliliisoqartassaaq.

Katsorsaariaatsimut aalajangersimasumut neqeroorutigineqannginneq ajortumut naammagittaalliuutit nalinginnaasunut aamma sullissinerup pitsaassusaanut politikikkut aalajangersarneqarsimasumut tunngassuteqarput taamaattumillu taaguummumut "sullinneqarnermut naammagittaalliuutit"-nut ilaanatik. Katsorsaariaaseq Kalaallit Nunaanni neqeroorutigineqanngippat napparsimasorli Danmarkimi katsorsartinnissamut innersuunneqarsimasussaagaluarluni, taava § 5-imut siunnersuut malillugu katsorsaanerup ingerlarnga aalajangersimasooq pillugu maalaarummik Nunatta Nakorsaaneqarfiani naliliinermini tamanna namminermit peqqinnissamut tunngasutigut sunniuteqarsimanersoq imaluunniit sunniuteqarsimasinnaagaluarnersoq tamatumalu malitsigisaanik peqqinnissaqarfimmi peqqinnissamut tunngatillugu suliatigut sulinermit ataatsimut isigalugu pitsaassuseq nalinginnaasumik akuerisaq malinneqarsimanersoq pillugu isummersinnaavoq. Suliani ataasiakkaani tamatigut aalajangersimasumik naliliisoqartassaaq.

Imm. 2-mut

Naammagittaalliuut peqqinnissaqarfimmi qullersatut aqutsisunut nassiunneqartoq allassimappat tamanna aqutsisut akisussaattillugit naammagittaalliuutip suliarineranut takussutissaavoq, soorunami aamma peqqinnissaqarfiup iluani suliaq suliarineqarsinnaalluni. Maannakkut peqqinnissaqarfiup aqqissugaanerani sullissineq pillugu naammagittaalliuutit Peqqissutsimut Aqutsisoqarfimmi Peqqissutsimut qullersanut nassiunneqartussaassaaq.

Imm. 3-mut

Sullinneqarnermut naammagittaalliuutit ilaatigut suliamut attuumassuteqannginnissamut isumaliutersuutit kingunerisaannik immikkoortumut arlaannaannulluunniit

attuumassuteqanngitsumut tunniunneqartarnissaat naleqqunnerpaassasoq nalilerneqarpoq. Taamaattumik sullinneqarnermut naammagittaalliutit Nunatsinni Nakorsaaneqarfimmut, suliap ilisimatitsissutiginnissaanut peqqinnissaqarfimmi qullersanit suliarisassanngorlugu nassiunnissaanut isumaginnittussamut tunniunneqartarnissaat siunnersuutigineqarpoq. Ilumut sullissineq pillugu naammagittaalliut pillugu aamma naliliisoqarnersoq sullissineq pillugu naammagittaalliutit tamarmik aallarniutaasumik Nunatsinni Nakorsaaneqarfimmit naliliiffigineqartariaqarput.

Imm. 4-mut

Taamaalisukkut suliamik suliarinninnissap qaammatinik pingasunik piffissalernerneqarnissaa siunnersuutigineqarpoq. Suliarinninnerit tassaasinnaapput allakkatigut akissutissiornerit imaluunniit oqarasuaatikkut naammagittaalliuteqartumik oqaloqatiginninnerit. Naammagittaalliut pinngitsoorani qaammatit taakku pingasut iluanni naammassineqartariaqanngilaq. Piffissaliusseq piffissami naammagittaalliutip peqqinnissaqarfimmi aqutsisunit qullersaasunit tiguneqarneraniit naatsorsorneqassaaq, tak. imm. 2.

§ 10-mut

Imm. 1-imut

Siunnersuummi § 10, imm. 1 aqutugalugu peqqinnissaqarfimmi peqqinnissamik suliaqartunit imaluunniit sulisunit allanit imaluunniit pisortat oqartussaaffini allani namminersortuniluunniit suliarinninnermut atatillugu ajoqusernerit Kalaallit Nunaanni pilersunut napparsimasut napparsimasunulluunniit qimatai taarsiiffigineqarnissaat periarfissaaleroq. "Qimatani" eqqarsaatigineqarput ilaqqat qaninnerpaat, tassunga ilanngullugit aamma aapparisaat nalunaarsugaasut allaluunniit ilaqqat taarsiinissamut noqqaassutip suliarineranut inatsisitigut soqutiginnittut, assersuutigalugu kingornussisussat ilaqaanngitsut.

Assersuutigalugu inuup napparsimmavimmi, kigutileriffimmi, peqqinnissamut tunngasutigut sullissisumi namminersortumi imaluunniit napparsimmavik imaluunniit peqqinnissamut tunngasutigut sullissisoq namminersortoq sinnerlugu ajorunnaarsitsiniarluni iliuseqartoqarsimanissaa taarsiiffigineqarnissamut tunngaviumik piumasqaataavoq.

Taamaalillutik katsorsaaviit tamarmik apeqqutaatinnagu peqqinnissaqarfiup ataani inissisimanersut, oqartussat allat ataanut inissisimanersut namminersortuunersulluunniit taakku aalajangersakkamut ilaapput. Najugaqarfik paaqqinniffiusumi aamma peqqinnissaqarfiup avataani isumaginninnermi paaqqinniffinni inissisimasut siunnersuummi katsorsaavittut aamma ilaatinneqarput, tamatumani najugaqarfiit paaqqinniffiusuni

imaluunniit isumaginninnermi paaqqinniffinniittumi peqqinnissamut sullissisumit misissuisoqarpat imaluunniit katsorsaasoqarpat.

Napparsimasunik ataasiakkaanik misissuinerit, katsorsaanerit assigisaaluunniit tamarmik, matumani pinaveersaartitsilluni iliuuseqarnerit, assersuutigalugu akiuussutissanik kapitinnerit ajorunnaarsitsiniarluni iliuuseqarnermut ilaapput. Katsorsarneqarsinnaanatik toqulersunik anniaateqartunik il.il. katsorsaanerit inatsimmi ilaapput, naak katsorsaaneq tamanna ajorunnaarsitsiunnanngikkaluartoq. Misissortinnissaq, katsorsartinnissaq assigisaanilluunniit ikiorneqarnissaq anguniarlugit inuup napparsimmavimmut, peqqinnissamut tunngasutigut sullissisumut il.il. saaffiginnissimanera aalajangersakkami ilaanissamut naammappoq.

Inuit najugaqarfik paaqqinniffiusuniittut imaluunniit peqqinnissaqarfiup avataani isumaginninnermi paaqqinniffimmiittut imaaliallaannaq inatsisartut inatsisaanni ilaanngillat. Taamaattorli najugaqarnerup nalaani peqqinnissamut tunngasutigut sullissisumit, assersuutigalugu nakorsamit namminersortumit misissuinerit imaluunniit katsorsaanerit il.il. atatillugu ajoqusernerit ilaapput.

Ajoqusernerit nakorsanut allanulluunniit paaqqutarinnittunut eqquisut Inatsisartut inatsisaata atuuffissaannut ilaatinneqanngillat. Napparsimasup ajoquserneranut atatillugu annaasaqartariaqarsimasoq inuk alla taarsiivigineqarnani napparsimasoq taassumaluunniit qimatai taamaallaat taarsiiffigineqarsinnaapput. Taaguummi napparsimasumi naartut aamma pineqarput, taamaalillutik naartunerup nalaani erninerulluunniit nalaani ajoqusernerit taarsiiffigitinnissamut pisinnaatitaasoqarluni, inatsimmi taarsiiffigineqarsinnaatitaanermut piomasagaatit nalinginnaasut naammassineqarsimanissaat piomasagaataapput. § 16 malillugu ajoqusernerup taarsiiffigineqartussap malitsigisaanik meeqqamut toqungalluni erniusumut angajoqqaajusunut ajunngitsorsiassaqaartitsisoqassaaq, naartuneq sivikinnerpaamik sapaatit akunnerini 22-ni ingerlasimappat.

Aalajangersagaq taarsiissuteqarnissamut akisussaaneq pillugu inatsimmi § 1 kunngip peqqussutaatigut nr. 796, 1. oktober 1993-imi Kalaallit Nunaanni atuutilersumi kingusinnerusukkut allannguuteqartumi taaguut "inuup ajoqusernera" naapertorlugu aalajangersagaq paasineqassaaq. Timikkut tarnikkullu ajoqusernerit, tassa imaappoq ajoqusernerit timikkut ajoqusernermut atatillugu pinngunngitsut aalajangersakkami ilaapput. Pigisat ajoquserneri pisuussutigullu annaasat (tassa imaappoq inuup ajoqusernerata kingunerinnigisaanik aningaasatigut annaasat) ilaanngillat. Napparsimasup inuttut innarligassaanninneranik kanngunarsaaneq inuup ajoquserneranik kinguneqanngitsut aamma ilaanngillat.

Siunnersuummi § 11-mi malittarisassat erseqqinnerusut malillugit katsorsaanerit il.il. malitsigisaanut taamaallaat taarsiisoqassaaq, kisianni napparsimanerup katsorsarneqartup kingunerisaanuunngitsoq ("tunngaviusumik nappaat"). § 11, nr. 1-3-mut siunnersuutip kingunerisaanik misissuinerup katsorsaanerulluunniit allatut ingerlanneqarsimaneratigut pinngitsoortinneqarsimasinnaasunut ajoqusernertut taamaallaat tunngaviatigut taarsiisoqarsinnaavoq. Tunngaviusumik nappaatip kingunerisai taamaaliornikkut pinngitsoortinneqarsinnaasimappata tamatumunnga taarsiisoqarsinnaavoq. Taamaalilluni assersuutigalugu § 11-mi, tak. § 12, imm. 1, tunngaviit malillugit nappaat eqqortumik - imaluunniit sukkanerusequmik - suussusianik aalajangiisoqarsimasinnaappat napparsimasup nappaataannik kukkusumik imaluunniit kingusinaartumik suussusersinerata malitsigisaanut taarsiisoqarsinnaavoq. Taamaattoqartillugu kukkusumik kingusinaartumilluunniit nappaatip suussusersinerata kingunerisaanik "ajoqusernerup annertusineranut" taarsiisoqassaaq, assersuutigalugu tunngaviusumik nappaatip ajorseriarnera imaluunniit taassuma atuunnerata sivitsornera imaluunniit tassannga katsorsaaneq annertunerulerluni.

Tunngaviit aamma taakku malitsigisaannik iluatsinngitsumik katsorsaasoqarpat, tassa imaappoq nalinginnaasumik naatsorsuutigineqartumik ajorunnaariartorneranik kinguneqanngitsumik katsorsaasoqarsimappat tamatumunnga pisumut taarsiisoqarsinnaangilaq.

Imm. 2-mut

Inuit misileraaffigineqartut - taakku peqqissuunersut imaluunniit nappaateqarnersut apeqqutaanani - misiliinermut atatillugu ajoquserpata ajoqusernerit taakku aalajangersakkamut tassunga ilaapput. Tamanna assersuutigalugu tassaavoq misileraaneq inuup nappaataanik suussusersineranik katsorsaanermulluunniit pingaaruteqanngitsoq.

Inummik misissuinermi katsorsaanermiluunniit (nappasimasut misileraaffigineqartut) misileraasoqartillugu tamanna imm. 1 malillugu napparsimasunik nalinginnaasumik matussusiinermi ilaavoq.

Suliniut ilisimatusarnikkut siunertaqarpat, tassa nutaanik ilisimasaqalernissaq siunertaralugu aaqqissugaasumik paasissutissanik katersisoqarpat taamaallaat aalajangersagaq malillugu misileraanertut nalilerneqarsinnaavoq. Misileraaneq imm. 1-imi pineqartuni napparsimmavimmi, nakorsami namminersortumi il.il. imaluunniit katsorsaavinni allani ingerlanneqarsimanagera apeqqutaangilaq. Napparsimmavimmit, universitetimit imaluunniit peqqinnissamut tunngasutigut sullissisumit namminersortumit akuerisaasumit toqqaannartumik akisussaaffigineqarluni misileraaneq suliffeqarfimmi namminersortumi, peqatigiiffimmi assigisaaniluunniit ingerlanneqarpat taanna ilaassaaq.

Taarsiinissaq eqqarsaatigalugu inuit misileraaffigineqartut napparsimasunit periarfissaqarnerupput, tak. § 13 (ajoqusernerit tamanut taarsiisoqassaaq, aamma pissutaasut ataqatigiinnerannut annikinnerusunik piumasaqaateqartoqartarpoq), aamma § 15, imm. 3 (Inatsisartut inatsisaanni ikinnerpaaffissatut killiliussaq nalinginnaasoq inunntut misileraaffigineqartunut timillu pisataanik tunisisunut atuutinngilaq). § 1, imm. 4 malillugu nakorsaatit sunniutaannik pissuteqartunik misileraanermi ajoqusernerit taarsiivigineqarneq ajorput.

Aamma ajoqusernerit inunnik misileraataasunik eqquisut sulisilluni ajoqusernissanut sillimmasiissutinut inatsimmit matussuserneqartarput (Kalaallit Nunaanni sulisilluni ajoqusernissanut sillimmasiissutit pillugit inatsimmik nalunaarut). Napparsimasumut taarsiissutigineqartut matumunnga tapertaapput, tassami sulisilluni ajoqusernermut sillimmatip sillimasinngisaanut annaasanut taarsiisoqartarmat.

Tartumik aamma paternik peersinermit ajoqusernermut taamaallaat aalajangersakkami pineqanngillat, taamaattorli inunnit uumasunit timip pisataanik taarsersuinerit allat ineriartortinneqarsinnaasut aamma pineqarput, inuup timaanit ipiutaasanik il.il. peersinerit pillugit inatsit nr. 246, 9. juni 1967-imeersoq kunnigip peqqussutaatigut 22. august 1968-imeersukkut Kalaallit Nunaanni atulersinneqartoq takuuk.

Aalajangersagaq aamma aalersuutit aaversittartunut, ameraasanik tunniussisartunut aamma sananeqaatsikkut atortussanik allanik tunniussisartunut tunngapput. Timip pisataasa tunniunneqarsimasut sillimmasernerat aamma inuit peqqissut misileraaffigineqartut sillimmasernerat assigiipput.

Imm. 3-mut

Aalajangersakkap kingunerisaanik napparsimasut ajoqusernerinut taarsiinissaq pillugu malittarisassat atuutissapput, napparsimasut peqqinnissaqarfimmit akeqanngitsumik katsorsartittussatut innersuunneqarunik imaluunniit Kalaallit Nunaata avataani napparsimmavinni, klinikini il.il. katsorsartinnissamut peqqinnissaqarfimmit tapiiffigineqarunik, Peqqinnissaqarfiup sullissineri il.il. pillugit Inatsisartut peqqussutaat nr. 15, 6. november 1997-imeersoq takuuk. Inatsit alla malillugu katsorsaavimmi pineqartumi taarsiiffigineqarnissaq periarfissaassanngitsoq piumasaqaataavoq.

Oqaasertalerneqatigut “akeqanngitsumik katsorsartippoq” innuttaasut nunani allaniikkallartut, assersuutigalugu feeriartut Inatsisartut inatsisaat manna malillugu suliarineqarnerminni ajoqusersimasut taarsiiffigineqarnissaminnut qinnuteqarsinnaanngillat.

Imm. 4-mut

§ 10, imm. 4-mut siunnersuutikkut suliaasaqarfiit sorliit peqqinnissaqarfimmiittut siunnersuummut ilaanersut pillugit nalunaarummi erseqqinnerusunik malittarisassiornissamut Naalakkersuisut piginnaatinneqarput.

§ 11-mut

Inatsisartut inatsisaat malillugu ajoqusernerit suut taarsiiffigineqarsinnaatitaanersut § 11-mut siunnersuutikkut aalajangersarneqarput.

Inatsit malillugu ajoquserneq taanna ajoqusernertut akuerineqassappat katsorsaanerup il.il. aamma ajoqusernerup akornanni pissutaasut ataqatigiinnerinut uppersaanissamut suut piunasaqaataanersut aallarniutaasumik aalajangersakkami aalajangersarneqarpoq. Nr. 1- 4-mi takuneqarsinnaavoq ajoquserneq misissuinnermut, katsorsaanerup il.il. atatillugu pisimassasoq. Aalajangersakkami aamma aalajangersarneqarpoq qanoq ilisoqarnerani napparsimasoq - imaluunniit toqusoqarnerani - taassuma qimatai napparsimasup ajoquserneranut taarsiivigineqarsinnaanersut. § 12-imi erseqqissaanernik killiliinernillu arlalinnik aalajangersagaq ilaneqarsimavoq.

Ajoqusernerup napparsimasullu misissorneqarnerata, katsorsarneqarnerata il.il. akornanni pissutaasunik pisariaqartumik ataqatigiittoqarneranik naliliinermi ajoqusernerup taamatut pilersinneqarsimasinnaanera ilimanavippat naammappoq. Tunngaviusumik nappaatip nalinginnaasumik - imaluunniit nalinginnaasuunngitsumik - ingerlanera pinnagu ajoquserneq ajorunnaarsitsiniarluni aaqqiiniarnernut tunngatinneqarsinnaaneranik naliliinermi, kisianni aamma § 11, nr. 1-3-mi pisut taaneqartut nalaanni ajoquserneqarsimasinnaaneranik naliliinermi, imaluunniit § 11, nr. 4-mi nappaatit kingunerisaannik taaneqartut nalaanni ajoqusernerup pisimaneranik naliliinermi tamanna aamma atuuppoq.

Tassa imaappoq tunngaviusumik nappaatip ingerlaneranut atatillugu kingunerlutsitsineq pissutigineq ilimanavissumilli katsorsaaneq (imaluunniit taassuma amigaataanera) pissutigalugu napparsimasup ajoqusersimanera pineqarpoq. Pissutaasut ataqatigiittussaammata katsorsarneqarnerup ajoqusernerullu akornanni piffissatigut ataqatigiinneq attuumassuteqassapput, katsorsaanerli apeqqutaatinnagu kingunerlutsitsinerit ineriartorsimasut attuumassuteqarnaviangillat.

Ajoqusernermut pissutaasoqarsimanersoq qularnaatsumik aalajangerneqarsinnaanngippat ajoqusernermut pissutaasinnaasut ilimanaateqarneri nalilersorneqassapput imminnullu oqimaatigiissillugit. Tamatuma kingorna naatsorsuutigisariaqarpoq taamaaqataanik ilimanartoq katsorsartinnermut attuumassuteqanngitsumik ajoquserneq pilersimasoq

imaluunniit ajoqusernermut pissutaasinnaasut ilimanarsinnaaneri
oqaatigineqarsinnaanngippata napparsimasoq (taarsiiffiusinnaasumik)
ajoqusersimassanngilaq.

Taamaattorli nalinginnaasumik kisitsisitigut paasissutissatigut misilittakkat kisiisa
tunngavigalugit nalornisoorfiusut qaqutigoortumik aalajangiiffigineqarsinnaallutik. Taamatut
pisoqarnerani naliliinermi pissutsit allat naleqqukkaangat ilanngunneqarsinnaanerat
oqaasertaliinermi mattusimaneqanngilaq. Assersuutigalugu paasineqarpat ajoqusernermut
aalajangersimasumut pissutaasinnaasumik napparsimasup katsorsarnerani erseqqissumik
kukkusoqarsimappat pissutaasut piviusumik ataqatigiinneri pillugit nalornisoqarnera
napparsimasumut iluaqutaasussaassaaq.

Inunnut misileraaffigineqartuni timillu pisataanik tunisisuni ajoqusernerit eqqarsaatigalugit
pissutaasut ataqatigiinnerinut tunngatillugu § 13 malillugu ataatsimut isigalugu
sakkukinnerusumik uppernarsaanissaq atuuppoq. § 10, imm, 5-imi ima allassimasoqarpoq:

§ 11-mi ajoqusernerit taarsiivigineqarsinnaasut killilerneru pinngitsoorneqarsinnaaneri
annertusiartuaartillugit aaqqissugaapput. Atorneqartumit allaanerumik
misissuisoqarneratigut, katsorsaasoqarneratigut il.il. ingerlatsisoqarneratigut ajoqusernertut
pinngitsoortinneqarsimasinnaagaluartunut taamaallaat taarsiisoqarsinnaanera aallaaviuvoq.
Tamanna tunngaviatigut ajoqusernertut nr. 1-3-ni pineqartunut atuuppoq. Taakku
aalajangersakkat nr. 4-mi malittarisassamik ilaneqarput, taanna malillugu pisuni
aalajangersimasuni ajoqusernertut taarsiisoqarsinnaavoq, naak taakku
pinngitsoortinneqarsinnaanngikkaluartut. Napparsimasup ajoqusernera
taarsiivigineqarsinnaanersoq pillugu nalilersuineru aalajangersakkami killiliinerit
tulleriarlugit misissorneqartariaqarput.

Napparsimasoq suliamut tunngasutigut immikkut ilisimasalimmit misissorneqarnermigut,
katsorsarneqarnermigut il.il. ajoquserneq pinngitsoorneqarsimasinnaagaluarnera tamannalu
piviusumit aallartinneqartumit allaanerumik misissuisoqarlunilu katsorsaasoqarnissaanik
il.il. naliliisoqarsimassagaluarnerusoq nr. 1 malillugu siullertut apeqqutaapput. Kalaallit
Nunaanni pissutsinik immikkut ittunik eqqarsaatiginninnerit nalilersuinerut
ilanngunneqassapput. Akissut angerneruppat nr. 1 malillugu taarsiisoqassaaq. Immikkut
ilisimasalik misilittagalik tassaavoq inuk suliassaqarfimmi pineqartumi naammattumik
suliatigut ilinniagaqarsimasutut nalinginnaasumik isigineqarsinnaasoq. Suliassaqarfimmi
nakorsap immikkut ilinniagaqarsimasutut akuerisaasimanissaa pinngitsoorani
naatsorsuutigineqanngilaq, naak tassani nakorsani amerlanertigut taamaattaraluartoq.

Nr. 1-imut akissut naaggaarneruppat apeqquut nr. 2 malillugu misissuinermit imaluunniit katsorsaanermit atorreqartuni atortuni il.il. kukkunernut imaluunniit ajoqutitut tunngatinneqarsinnaanersoq apeqqutaalerpoq, taamaalilluni atortut pissusissamittut ajoquteqarsimanngikkaluarpata ajoquserneq pinngitsoorneqarsimasinnaagaluarluni. Akissut angerneruppat immikkut ilisimasalik misilittagalik atortup kukkussuteqarsimaneramik imaluunniit ajoquteqarsimaneramik pasitsaassaqaarsimanngikkaluarpalluunniit nr. 2 malillugu taarsiisoqassaaq.

Nr. 2-mut akissut naaggaarneruppat nr. 3 malillugu apeqqutigineqassaaq katsorsaanermit teknikki katsorsaariaaserluunniit alla atorlugu ajoquserneq pinngitsoorneqarsimasinnaagaluarnerpoq, naak immikkut ilisimasalik misilittagalik teknikkimik katsorsaariaatsimilluunniit allamik toqqaasimanissaa aalajangersarneqarsinnaanngikkaluartoq. Akissut angerneruppat nr. 3 malillugu taarsiisoqassaaq.

Nr. 3-mut akissut naaggaarneruppat apeqquut 4 malillugu apeqqutigineqassaaq piumasqaatit erseqqinnerusut aallaavigalugit napparsimasup naammaginartumik naammagiinnarsinnaasaanit annerusumik nappaatip nassataanik ajoqusertoqarnerpoq. Taamaattoqarsimappat ajoquserneq katsorsaanermit teknikki imaluunniit katsorsaariaaseq alla atorlugu pinngitsoorneqarsinnaanngikkaluartoq nr. 4 malillugu taarsiisoqassaaq.

Nr. 4-mut akissut naaggaarneruppat taarsiisoqarsinnaanngilaq, ajoqusertoq inuit misileraaffigineqartut timillu pisataanik tunisisut pillugit § 10, imm. 2-mi malittarisassanut ilaangippat.

Aalajangersakkami normunut ataasiakkaanut uku oqaatigineqassapput:

Nr. 1-imut

Nr. 1-imi malittarisassami napparsimasumik misissuinermit, katsorsaanermit il.il. atatillugu kinaassusersiunngitsumik kukkunerit tamarmik pineqarput. Kukkuneq sumik kinguneqarsimanersoq apeqqutaanngilaq. Taamaalillutik kukkusumik nappaammik suussusersineq imaluunniit allamik peqquteqarluni nakorsaanikkut isiginninnermik aallaaveqanngitsumik katsorsaasoqarsimanera pissutigalugu kukkusoqarsimanersoq apeqqutaatinnagu ilaatigut kukkusumik katsorsaanerit sulluunniit ilaatinneqarput. Pisut paarlattuat, tassa nakorsaanikkut isiginninneq aallaavigalugu katsorsaasoqarsimannginneramik pisoqarsimanera aamma ilaavoq. Katsorsaariaaseq teknikkiluunniit alla kukkusoq atorreqarsimappat imaluunniit napparsimasumik nakkutiginninnermik ingerlatsinermit

imaluunniit katsorsaanerup nalaani il.il. kukkusoqarsimappat tamanna aamma ilaatinneqarpoq.

Katsorsaaneq il.il. eqqarsaatigalugit peqqinnissamut tunngasutigut sullissisup aalajangersimasup kukkusutut imaluunniit sumiginnaasutut pisuutinneqarnissaa piunasaqaataanngilaq, annertunerusumik sissuernikkut pinngitsoorneqarsimasinnaalluni, tassa imaappoq ajoquserneq pinngitsoorneqarsimasinnaagaluarluni.

Suliassaqarfimmi pineqartumi immikkut ittumik ilisimasalik misilittagalik Kalaallit Nunaanni pissutsini allani pineqartuni sunik ilimagineqartunik aallartitsisimanissaa nalilersuinermit uuttuutaavoq.

Taamaalilluni misissuineq, katsorsaaneq il.il. alla tulluarnerusimasinnaasoq nassuerutiginiarlugu peqqinnissamut tungasutigut sullissisup inuttut tunuliaqutaa piginnaasaalu isiginiarneqassanngilluinnarput. Akerlianik misissuinermit imaluunniit katsorsaanermit pisoq aalajangersimasoq eqqarsaatigineqassaaq, matumani avataatigut atortut atorneqarsimasut, tassanngaannartumik pilattaanerup pisariaqarnerani piffissaq il.il. Piffissami katsorsaanermit pissutsit aalajangersimasut naliliinermit aallaavigineqassapput, kisianni nakorsaq aalajangersimasoq immikkut misilittagalimmit taarserneqarsimasinnaanera eqqarsaataasinnaalluni. Pisuni taakkunani piviusumik katsorsaanermit allaanerusumik immikkut ilisimasalik allaanerusumik iliorsimagaluarpat taamaalilluni ajoqusernerup pinngitsoorneqarsimasinnaagaluarnera imaluunniit annikinnerusimasinnaagaluarnera naatsorsuutigineqarpat napparsimasoq taarsiivigineqarsinnaavoq.

Immikkut misilittagalik allaanerusumik iliorsimasinnaanersoq nalornissutigineqarsinnaavoq, tassami assersuutigalugu katsorsaanermit aalajangiineq nalorninartumik tunngaveqarsinnaammat imaluunniit immikkut ilisimasallit akornanni katsorsaanerup pitsaanerpaap suuneranik isumaqatigiinngitsoqarsinnaammat. Nalinginnaasumik taarsiinissamut piunasaqaataavoq ajoqusernerup pissutsini taarsiinissamut tunngavissiisuni pisimanerata ilimanagerluinnarnissaa. Taamaalilluni ajoquserneq pinngitsoortinneqarsimasinnaagaluarnerasoq pillugu nr. 1 malillugu naliliinermit tamanna aamma atuuppoq. Katsorsaanermit teknikkiniq katsorsaariaatsinilluunniit toqqaaneq pillugu aperisoqarpat pisumi tassani nalorninartumik pisoqarnerani nr. 3-mi malittarisassaq tunngavigalugu aalajangiisoqarnissaa pissusissamisuussaaq, tassani teknikkip imaluunniit katsorsaariaatsip sorliup immikkut misilittagalimmit toqqarneqarnissaa naatsorsuutigineqassanersoq pingaaruteqanngimmat.

§ 11, nr. 1 malillugu nalilersuinermit Kalaallit Nunaanni pissutsit atugaasut eqqarsaatigalugit katsorsaanermit pitsaassutsit akuerisaasut pissarsiarineqarsinnaasullu eqqarsaatigineqassapput.

Nr. 2-mut

Kinaassusersiunngitsumik kukkunerit allat, tassa ajoqusernermut pissutaasoq kukkuneruppat imaluunniit atortoq sakkuluunniit allap misissuinermit, katsorsaanermit il.il. atatillugu atorneqartoq ajoquteqarpat taakku nr. 2-mi malittarisassami ilaapput. Nr. 1-imi malittarisassaq malillugu atortumi kukkuneq imaluunniit ajoqut napparsimasup ajoquserneranut pissutaasimanersoq apeqqutaanngilaq. Assersuutigalugu teknikkikkut atortuni ajoquteqarnerit malitsigisaanik misissuinermi inernerit kukkuneqarsinnaapput, tamannalu pissutigalugu kukkusumik nappaat suussuserneqarluni. Aamma sinitsitsinermi imaluunniit pilattaanermit atatillugu atorneqartut atortut sakkuluunniit ajoquteqarsinnaapput, kukkusumik atorneqarsinnaapput, isasoorsinnaapput assigisaanilluunniit ajoqusernermik kinguneqartitsinnaallutik. Aammattaaq apeqqutaanngilaq atortup sakkuluunniit ajoquteqalerneranut pissutaasoq aaqqissugaanerata imaluunniit sananeqaataani kukkusoqarsimanagera imaluunniit taassuma atornissaanut naammangitsumik ilitsersuuteqarnera, aserfallatsaaliorneqarsimannginnera allaluunniit. Kukkuneq napparsimmavimmi sulisuniit imaluunniit taamatut isumaginnittuniit allaniit, imaluunniit atortup aalajangersimasumik atorneqarneranut nakorsaanermit sullissisumiit nalinginnaasumik imaluunniit immikkut ittumik nakkutilliinermit atatillugu paasineqarsimanersoq imaluunniit paasineqartariaqarsimagaluarnersoq taarsiivigitinnissamut aamma apeqqutaanngillat.

Misissuinermit, katsorsaanermit assigisaaniluunniit atorneqartut atortut, sakkut il.il. atorneqartut taamaallaat malittarisassami ilaapput. Atortuni imaluunniit aaqqissuussinermit allani, assersuutigalugu nalinginnaasumik illup aaqqissugaanerani, elevatorimi il.il. kukkunerup imaluunniit ajoquteqarnerup malitsigisaanik ajoqusertoqarpat nr. 2 malillugu taarsiisoqarsinnaanngilaq. Taamatulli ajutoornerit § 12, imm. 2-mi malittarisassaq naapertorlugu pisut ilaat taarsiivigineqarsinnaapput.

Tunisassiamut akisussaaneq pillugu malittarisassat malillugit arlaata akisussaatinneqarsinnaaneranut tunngatillugu nr. 2 malillugu taarsiivigineqarsinnaanermit apeqqutaanngilaq.

Nr. 3-mut

Nr. 3-mi malittarisassani ilaapput ajoquserneq peqqinnissamut tunngasutigut sullissisunut imaluunniit atortuni atorneqartunut tunngatinneqarsinnaanngippat tamatuma kingorna tassa imaappoq katsorsaanerup naammassereerneratigut ajoqusertoqarneranilu paasineqarsinnaamat katsorsaanermit teknikki imaluunniit katsorsaaseriaaseq alla atorneqarsimagaluarpat tamanna pinngitsoortinneqarsimasinnaagaluarluni. Tamanna

isumaqarpoq katsorsaannermi teknikki imaluunniit katsorsaariaaseq alla nakorsaanikkut isigininneq aallaavigalugu taamatoqqinnaaq sunniuteqartussaasoq. Taamaalilluni malittarisassaq nr. 1-imi malittarisassamit ingerlaqqinneruvoq, tassami immikkut ilisimasalik misilittagalik pisumi aalajangersimasumi teknikkimik katsorsaariaatsimilluunniit allamik toqqaasimasinnaagaluarnerata naatsorsuutiginnissaa piumasagaataangimmat.

Malittarisassaq taanna malillugu taarsiisoqarnissaanut piumasagaatit tassaapput:

- 1) Piffissami katsorsaannerup aallartinnerani katsorsaannermi teknikkimik katsorsaariaatsimillu allamik peqarnissaa, taassumalu napparsimasup immikkut ilisimasalimmut imaluunniit nunatsinni napparsimmavimmi immikkut suliarinnittarfimmut (allamut) innersuunneqarneratigut katsorsaannermi aalajangersimasumi atorineqarsinnaasimanissaa piumasagaataapput. Taamaalilluni piffissap katsorsaaffiusup kingorna aatsaat atorineqalersut katsorsaanissamut periarfissat eqqarsaatigineqarsinnaangillat, imaluunniit pisumi aalajangersimasumi atorineqarsinnaasutut pissarsiarineqarsinnaanatik, napparsimasup innersuunneqarneranut imaluunniit nuunneqarnerani.
- 2) Katsorsaannermi teknikki katsorsaariaaserluunniit alla toqqarneqartumut naligiittutut isigineqarsinnaassasoq, tassa imaappoq nakorsaanikkut naliliineq aallaavigalugu teknikki katsorsaariaaserluunniit piviusumik toqqarneqartoq assigalugu minnerpaamik taamatut kinguneqarluartumik katsorsaasinnaassasoq piumasagaataavortaaq. Tamatuminnga naliliineq nakorsaanikut ilisimatusarnermik aamma piffissami katsorsaannermi misilittakkanik tunngaveqassaaq. Nr. 1-imi malittarisassamut nassuiaatit malillugit immikkoortumi tassani immikkut ilisimasallip misilittagallip naliliinera naliliinermi tunngavigineqassaaq. Immikkut ilisimasalik misilittagalik teknikkip katsorsaariaatsilluunniit allap pitsaanerujussuusussaanera pissutigalugu taassuminnga toqqaasimassagaluarpat, taava tamanna nr. 1 –imi malittarisassani ilaavoq. Paarlattuanilli naliliisoqarpat, tassa malittarisassaq manna malillugu katsorsaannermi teknikki katsorsaariaaserluunniit siumut naliliinermi ajornerusutut isigineqartoq toqqarneqarsimappat taarsiisoqarsinnaangilaq. Taamaalilluni taamatut naliliinermi ajoquserneq piviusumik pisimasoq eqqarsaatigineqassanngilaq. Allatut oqaatigalugu nakorsap katsorsaannermi atortumik imaluunniit periutsumik allamik atuinnginnissaaq eqqortumik toqqarsimappagu taarsiisoqassanngilaq, misilittakkat naapertorlugit napparsimasup nappaataanik katsorsaanissamut sunniuteqannginnerussammat, naak - kingusinnerusukkut piviusumik ajoqusernermut ilisimalikkat - oqaatigineqarsinnaagaluartut teknikkimik katsorsaariaatsimilluunniit allamik toqqaaneq napparsimasumut aalajangersimasumut pitsaanerussagaaluartoq.

- 3) Aammattaaq piumasaqaataavoq piffissami pineqartumi, taarsiinissaq pillugu suliap aalajangiiffigisassaani, katsorsaanerup ingerlanera pillugu ilisimasat atorlugit paasineqarsinnaavoq katsorsaanermi teknikki katsorsaariaaserluunniit alla - taamaaqataa - taarsiullugu atorneqarsimasuuppat ajoqusernerup pinngitsoorsimasinnaagaluarnera ilimanarluarsinnaasoq. Ajoqusernerup pinngitsoortissimanissaanik kingornatigut naliliinermi ilaatigut napparsimasup nappaataa, allatigut ajorunnaarnissaanut pissutsit il.il. katsorsaanerup pilersinneqartup kingunerisai pillugit ilisimasat eqqarsaatigineqassapput. Pissutsit taakku piffissami katsorsaanermi teknikkimik katsorsaariaatsimilluunniit toqqaanissaq pillugu aalajangiinermi allat immikkut ilisimasalimmit misilittagalimmit nassuerutigineqarsinnaaneri apeqqutaatinnagit atuupput.

Katsorsaanerup aalajangersimasup (»katsorsaanermi teknikkip«),ingerlannissaanut assigiinngitsut, naligiittut periutsit akornanni toqqaasoqarnera imaluunniit katsorsaanermi tunngaviit assigiinngisitaartut akornanni, assersuutigalugu nakorsaanikkut imaluunniit pilattaanikkut (»katsorsaariaatsimik«) toqqaasoqarnera allaanerutitsinavianngitsoq matumani takuneqarsinnaavoq.

Malittarisassap ilaatigut kingunerisaanik katsorsaariaatsimik misileraasoqarneranut atatillugu ajoqusertoqarpat, naak maannamut katsorsaariaatsit pitsaanerpaat atorneqartut atorneqarsimagaluarpata ajoqusernerit pisimasussaanngikkaluartut, taava napparsimasut misileraaffigineqartut taarsiivigineqarsinnaatitaassapput. Piffissami katsorsaanermi katsorsaariaatsit nalinginnaasut katsorsaariaatsimi misileraatigineqartutulli issasut (minnerpaamik) matumani piumasaqaataavoq. Katsorsaariaatsinik teknikkinnillu nutaanik pisoqqanillu toqqaanissamut tunngatillugu malittarisassatigut killiliisoqanngilaq.

Ajoqusernerit suut katsorsaanermi teknikkimut imaluunniit katsorsaariaatsimilluunniit tunngatinneqarsinnaanerinik nalilersuineri teknikkit katsorsaariaatsilluunniit allat atorneqarsinnaasut malitsigisinnaasaattut ilimagisat eqqarsaatigineqartariaqarput. Naatsorsuutigineqartariaqarpat teknikkit imaluunniit katsorsaariaaseq alla aamma napparsimasumik tamakkiisumik ajorunnaarsitsisinnaanngitsoq tassunga atatillugu ajoquserneq teknikkip katsorsaariaatsilluunniit toqqarneqartup kingunerisaanik taamaallaat ajorunnaarnissamut ajornerulernermik kinguneqaannassaaq.

Eqqortumik nappaammik suussusersinnginnerup kingunerisaanik ajoqusernerit nr. 3-mi malittarisassami ilaannginnerat oqaatigineqassaaq. Nappaammik suussusersiineq amerlasuutigut ingerlaavartumik suliarineqartarmat nappaammik suussusersinerup kingorna nalilersornissaa tulluanngitsoq nalilerneqarpoq.

Nr. 4-mut

Nr. 4-mi malittarisassaq malillugu kingornatigut nalilersuisoqareeraluartorluunniit misissuinermi katsorsaanermilu ajoqusernerit assigiinngitsut pinngitsoortinneqarsinnaanngitsut nr. 3-mi malittarisassami ilaapput. Malittarisassami siunertaavoq nr. 1-3-mi malittarisassani ilaasinnaanngitsunik napparsimasut ajoqusernerannik paasisaqarnissaq, taamaattorli napparsimasup taarsiiffiqineqarnani ajoqusernerminik naammaginniinnarnissaanik naammaginnartinneqarnani. Siullermik ajoqusernerup ilungersunartuunerata aappatigullu napparsimasup tunngaviusumik nappaataata ilungersunartuunerata aamma tunngaviusumik nappaatip misissornerata, katsorsaaneqarnerata pissusissamisoortumik naatsorsuutigineqarsinnaasullu malitsigisaasa akornanni naapertuuttoqannginnera.

Nappaatip nassatai suusinnaasulluunniit, matumani aseruuttoornerit, ilimanarluinnartumik misissuinerminik katsorsaanernilluunniit peqquteqartut aalajangersakkami ilaapput. Nappaatip nassatai, tassunga ilanngullugit aseruuttoornerit tunngaviusumik nappaammik taassumalu atugaaneramik pissuteqartut misissuineranut katsorsaanernulluunniit attuumassuteqanngitsut taarsiivigitinnissamut pisinnaatitaaffeqanngillat, taakku nr. 1-3-mi malittarisassani ilaanngippata.

Aalajangersakkap atuuffiani killiliinermi pingaaruteqartumi nappaatip nassataata ilungersunartuunera napparsimasup naammagiinnarsinnaasaanit annertunerussasoq piunasaqaataavoq. Nappaatip nassataa namminerminik napparsimasumut ilungersunartuunera naammangilaq. Nappaatip nassataata ilungersunartuunera napparsimasup tunngaviusumik nappaataata qanoq ittuuneranut, ilungersunartuuneranut allatigullu peqqinnikkut qanoq inissisimaneranut sanilliunneqassaaq. Tunngaviusumik nappaat katsorsarneqarnani annertuumik innarluuteqalersitsisinnaappat imaluunniit napparsimasoq toqusinnaalluni aamma taassuma katsorsarneranut atatillugu nappaatip nassatarisinnaasai ilungersunartuusinnaaneri aamma akuerineqartariaqarput. Tunngaviusumik nappaat katsorsarneqarnani annertuumik innarluuteqalersitsisinnaappat imaluunniit napparsimasoq toqusinnaappat taassuma katsorsarneranut atatillugu nappaatip nassatarisinnaasaasa ilungersunartuusinnaanerat aamma akuerineqartariaqarput. Nappaatip nassatarisinnaasai napparsimasup suut akuerineqartariaqarnerisut pillugit naliliinerminik misissuineranut katsorsaanermullu tunngatillugu pissutsit erseqqinnerusut, matumani ilaatigut piffissaq pissutigalugu nalinginnaasumit annertunerusumik ilungersunartorsiortariaqalersinnaaneq eqqarsaatigineqassapput.

Tunngaviusumik nappaatip ilungersunartuunerata nappaatillu nassataata imminnut naapertuutinnginnerat suussusersiniarluni pilattaanermut (misissuilluni pilattaanernut) atatillugu erseqqissuusinnaapput, taamaammallu aalajangersakkami erseqqissumik

nassuiarneqarlutik. Assersuutigalugu napparsimasup qaratsamigut tinuneqarneranik pasitsaassaarneq pissutigalugu qalipaata erseqqissusaat iluaqutigalugu tarrarsuilluni misissuinissaq pisariaqarsinnaavoq. Ilaannikkut taamatut misissuineq qaratsakkut annertuumik ajoqusernermik aammalu napparsimasup qaratsamigut tinuneqannginneranik paasisaqarnermik kinguneqartarpoq. Taamatut ajoquserneq nr. 1-3-mi malittarisassani ilaatinneqassanngilaq, pisumili tassani taanna napparsimasup naammagisinnaasaanit annerussiaaq, taamaammallu napparsimasoq nr. 4-mi malittarisassaq malillugu taarsiivigineqarnissamut pisinnaatitaalluni.

Taamaaqataanik napparsimasoq pinaveersaartitsilluni iliuuseqarnernut, assersuutigalugu akiuussutissanik kapitinnernut atatillugu taarsiivigitinnissamut nalinginnaasumik pisinnaatitaassaaq. Tassunga tunngatillugu kingunerluutit ajoqutaalersutut isigineqanngitsut erseqqissaatigineqassaaq.

§ 11 nr. 4-mut atasoq alla nappaatip nassataa qanoq akulikitsigisumik nalinginnaasumik atuutilersinnaaneranut tunngasuuvoq, pisut ataasiakkaat nappaatip nassataa qanoq annertutigisumik atuutilersinnaaneranut ataqatigiissillugu isigineqassaaq. Misissuinermi katsorsaaneramiluunniit aalajangersimasumi nappaatip nassataa pineqartoq nalinginnaasumik aarlerinartuunerata annertusiartornera naapertorlugu napparsimasup taarsiivigineqarnani naammagiinnarsinnaasariaqassavaat. Nappaatip nassatarisinnaasaanut pineqartumut tunngatillugu nakorsap ilisimatitsisimanera apeqqutaanngilaq, taamaattorli nakorsap ilisimatitsisussaataitanerani ilaanngitsut, tassa nappaatip nassatarisinnaasai qaqutigoorluinnartut aalajangersakkami nappaatip nassatarisai taamaattut ilaakkajuttarput. Nappaatip nassataa pineqartoq qaqutigoorloq pillugu kisitsisitigut paasisutissat tunngavigalugit aalajangersimasunik killiliisoqarsinnaanngilaq, napparsimasulli suna naammagiinnarsinnaanera pillugu naliliinermi akulikissuseq ilaassaaq, tassami aarlerinartuunera ima annikitsigisutut isigineqartariaqassaaq taassuma eqqarsaatiginissaanut tunngavissaqarnani.

Tamatumunnga pissutaavoq naliliinermi immikkoortut taakku marluk - nappaatip nassataa ilungersunartoq taassumalu qaqutigoorluunera allatigulluunniit naatsorsuutiginnngisamik iluseqarnera - ajoqusernerup napparsimasup naammagiinnarsinnaasaanit annertunerunera pillugu naliliinermi nalinginnaasumik ataatsimoortumik nalilerneqassammat. Tunngaviusumik nappaatip nappaatillu nassataata akornanni annertuumik naapertuuttoqanngippat taassuma qaqutigoorluunissaanut piumasaqaat sakkukillisinneqarsinnaavoq. Assersuutigalugu nappaammik suussusersiniarluni pilattaanermit taaneqartumut taama pisoqarsinnaavoq, taamaattorli katsorsaanermit ajoqusernerit, tassani nalinginnaasumik pilattaanerit annertooujussuarmik ajoqusiinermit kinguneqartut eqqarsaatigineqarsinnaapput. Paarlattuanik qaqutigoorluinnartoq, immaqalu

manna tikillugu ilisimaneqanngitsoq nappaatip nassataa pineqarpat nappaatip nassataata ilungersunartuunissaanut piumasaqaat sakkukillisinneqarsinnaavoq.

§ 12-imut

§ 12-imut siunnersuummi § 11-mi ajoqusernerit taarsiivigineqarsinnaasut killilersornerinut tunngatillugu arlalinnik erseqqissaasoqarlunilu killiliisoqarpoq.

Kukkusumik nappaammik suussusersiineq imm. 1-imi pineqarpoq ajutoornerillu imm. 2-mi pineqarlutik.

Imm. 1-imut

Napparsimasup nappaataa eqqortumik suussusersineqarsimannginnera pissutigalugu ajoqusersimaneranut § 11 nr. 3-mi malittarisassaq atorineqannginnissaa pillugu § 12, imm. 1-imut siunnersuummi aalajangersarnissaa siunertaavoq. Nappaammik suussusersiineri kukkuneq taarsiivigitinnissamut pisinnaatitaaffiuvoq, immikkut ilisimasalik misilittagalik eqqortumik nappaammik suussusersiisinnaasutut naatsorsuutigineqarsinnaappat imaluunniit pissutsini atugaasuni piffissami siusinnerusukkut taamaaliorinnaasimappat. Taamaaqataanik atuutissaaq teknikkikkut atortuni il.il. misissuineri atorineqartuni kukkunerit ajutoornerilluunniit malitsigisaanik kukkusumik misissuineri inernerit assigisaaluunniit pissutigalugit kukkusumik nappaammik suussusersisoqarpat. Pisuni taakkunani eqqortumik nappaammik suussusersiisoqannginnerata imaluunniit piffissaagallartillugu suussusersineqannginnerata malitsigisaanik taarsiisoqassaaq, tamanna tunngaviusumik nappaat ajorseriarpat imaluunniit katsorsaanerup ingerlanera sivitsorpat imaluunniit pisariunerulerpat. ”Piffissaq eqqorlugumi” nappaatip tunngaviusumik ineriartornerani pissutsit eqqarsaatigineqarput.

Akerlianilli nappaatip suussusersinerata kingornatigut naliliiffigineqarnissaa aalajangersakkami mattunneqanngilaq. Katsorsaanerup aallartinneqareernerata naammassineqareernerataluunniit kingorna, assersuutigalugu pilattaareernermi – allaat immikkut ilisimasalik misilittagalik – eqqortumik nappaammik suussusersisimaguni, taava siusinnerusukkut nappaatip suussusersineqarsimannginneranut taarsiisoqassanngilaq.

§ 11, nr. 4-mi malittarisassaq kukkusumik nappaammik suussusersiineri mut attuumassuteqanngilaq. Suussusersineqartup malitsigisai ilaanngillat, akerlianilli ilaatigut suussusersinissaq siunertaralugu pilattaanerimi ajoqusertoqarpat.

Imm. 2-mut

Imm. 2-mi malittarisassami ajoqusernerit § 11, imm. 2 naapertorlugu taarsiiffigineqarsinnaasut ilaatigut erseqqissaaffiginissaat siunertaavoq.

Atortutigut ajutoorneq assigisaalluunniit pissutaanngikkaluartut ajutoortoqarsinnaavoq, assersuutigalugu napparsimasoq uffarnermini quaannermigut uppinnermigullu imaluunniit siniffimmit nallavimminit nakkarnermigut ajoqusersinnaavoq. Ajoqusernerit taamatut ittut matussusiinissamit nalinginnaasumik ilaatinneqarneq ajorput, parlattuanilli § 11, imm. 2-mut ilaasunut ajoqusernerna aalajangersagaq malillugu taarsiisoqarsinnaavoq, nalinginnaasumik taarsiisoqarnissaanut piomasagaatit naammassineqarsimappata, ajoqusernerlu katsorsaannermut nammineq atassuteqarpat.

Ajutoornerit katsorsaannermut atasumik pinngitsut, assersuutigalugu uffarfimmi upperneq assigisaaluunniit, nalinginnaasumik taarsiinissamut malittarisassat malillugit suliarineqassapput, taamaattumillu Inatsisartut inatsisaannut matumunnga ilaanatik.

§ 13-imut

Malittarisassap kingunerisaanik inuit misileraaffigineqartut timillu pisataanik tunisisut taarsiivigitinnissamut pisinnaatitaapput, § 11-mi piomasagaatit naammassineqanngikkaluarpataluunniit. Taamaalilluni ajoqusernernut pinngitsoorneqarsinnaanngitsunut aamma taarsiisoqassaaq, § 11, nr. 4-mi piomasagaatit naammassineqanngikkaluarpataluunniit. § 15, imm. 3 malillugu aamma ajoqusernerna taakkunani nammineq akileeqataanissaq pillugu inatsimmi malittarisassat atuutinngillat. Taamaattorli minnerpaamik iluseqartut ajoqusernerit, soorlu aaversinnerup kingorna tilluusat, ullualuit qaangiuppata tammartussat, Nunatta Nakorsaaneqarfianut innersuussinermi itigartinneqartarput.

Taamaalilluni misileraanerup ajoqusernerullu akornanni pissutaasut ataqatigiinnerinut uppersaanissamut piomasagaat § 11-mi nalinginnaasumik piomasagaatinut naleqqiullugu sakkukinnerulerpoq. Ajoquserneq misileraanermik pissuteqarpat tassani pissutaasumut ataqatigiinnerit aalajangersimasut pillugit nalornissutaasut suulluunniit ajoqusernumut iluaqutaassapput. Taamaalilluni ajoquserneq nammineq pissutsinik allanik peqquteqarsinnaappat imaluunniit ajoqusernermut pissutaasinnaasut ilimanarsinnaaneriniq naliliinissaq ajornarpat taarsiivigitinnissamut pisinnaatitaaffeqarpoq.

§ 14-imut

§ 14-imut siunnersuummi inatsit malillugu taarsiivigitinnissamut pisinnaatitaaneq pillugu napparsimasunut paasisutissiinissamut pisussaaffik eqqunneqarpoq. Pisussaaffik

peqqinnissamut tunngasutigut sullissisunut tamanut, sulinerminni ajoqusernernik, inatsit malillugu taarsiivigineqarnissamut pisinnaatitaaffilittut naatsorsuutigineqartunik ilisimasaqalersunut atuuppoq.

Ajoquserneqartunut pineqartunut paasissutissiineq misissuiffiusumik imaluunniit katsorsaanerup ingerlanneqarfianik il.il., inatsit malillugu taarsiivigineqarnissamut pisinnaatitaaffeqartumik ajoqusertoqarsimaneranik paasisaqarfiusumik nalilersueqqissaarnermik tunngaveqartariaqassaaq. Paasissutissiinerup qanoq iluseqarnissaanut piunasaqaateqanngilaq, kisianni allakkatigut pinissaa naleqquttut nalilerneqarpoq. Paasissutissiinissamut pisussaaffik naammassineqarsimassanngilaq paasissutissiineq misissuineq, katsorsaaneq assigisaaluunniit aalajangersimasoq sioqqullugu tunniunneqarpat.

§ 14-mi pisussaaffiup kingunerisaanik assersuutigalugu nakorsatut peqqissaasutulluunniit akuerisaaneq tunuliaqutaralugu kinaluunniit peqqinnissakkut ilinniarsimasutut sulisoq naammagittaalliuteqarnissamut taarsiinissamullu periarfissaq pillugu ilisimatitsissaaq.

Paasissutissiinissamut pisussaaffimmik unioqquitsineq pillaanermik kinguneqartinneqarsinnaavoq aammalu Peqqinnissaqarfimmi napparsimasut naammagittaalliuteqarfianut imaluunniit Peqqinnissaqarfimmi Aalajangiisartunut suliassanngortinneqarsinnaalluni.

Imm. 2-mut

Aalajangersagaq paasissutissiinissamut pisussaaffik pillugu malittarisassanik erseqqinnerusunik Naalakkersuisut aalajangersaasinnaanerannut, tassunga ilanngullugu sulisunut assigiinngitsunut akisussaaffiit immikkoortiterinissaannut periarfissivoq.

§ 15-imut

§ 15-imut siunnersuut malillugu napparsimasut ajoqusernerinut taarsiissutissat taarsiissuteqarnissamut akisussaaneq pillugu inatsimmi, peqqussutikkut nr. 796, 1. oktober 1993-ikkut kingusinnerusukku allannguuteqartukku Kalaallit Nunaannut atuutilersinneqartumi malittarisassat malillugit annertussusilerneqartarput. Tunngavik taanna nammineq akiliummik aalajangersaanikkut iluarsineqassaaq, tak. imm. 2, 3 aamma 7, akilersimasanut piunasaqarneq matussuserneqarsimanngippat, tak. imm. 4, meeqqap toqunerani angajoqqaanut taarsiissuteqartoqassasoq, tak. § 16, aningaasallu suliap naammassineqarneraniit sapaatit akunnerinik tallimanik kingusinnerusumik tunniunneqarpata taarsiinermi ajunngitsorsiassallu aningaasartai suliap aalajangiiffiginerani iluarsineqarlutillu ernialerneqassasut, tak. §§ 17-18.

Imm. 1-imut

Imm. 1-mi malittarisassami taarsiinerup aamma inuup ajoquserneranut ajunngitsorsiassanik imaluunniit pilersuisumik annaasaqarnermut il.il. aalajangersaanermi Danmarkimi taarsiinissamut akisussaaneq pillugu inatsimmi malittarisassat atorpeqassapput. Danmarkimi taarsiinissamut akisussaaneq pillugu inatsit kunngip peqqussutaatigut nr. 796, 1. oktober 1993-imeersukkut, kingusinnerusukkut allannguuteqartukkut Kalaallit Nunaannut atulersinneqarpoq.

Taamaalilluni taarsiinerit assigiinngitsunullu ajunngitsorsiassat, tassa ajorunnaarnissamut aningaasartuutit allallu annaasat, sulinermi iluanaarutissat annaaneqarneri, anniarneq, ataavartussamik ajoquteqalerneq, inuussutissarsiorsinnaanerup annaaneqarnera, pilersuisumik annaasaqarneq ilisinermilu aningaasartuutit annertussusilerneru pillugit malittarisassat siullertut atuupput.

Tulliatut taarsiinissamut akisussaaffik pillugu inatsimmi innersuussinerup malitsigisaanik, taarsiinerit allatigullu taarsiinerit ataqatigiissinnissaat pillugu malittarisassat, assersuutigalugu isumaginninnikkut pisartakkat inuttullu sillimmasiinerit, taamaaqataanik napparsimasup ajoqusernera pillugu taarsiinissamut annertussusilernerani atorpeqassapput.

Tamatuma saniatigut § 10-mi ajoquserneq pillugu taaguutip malitsigisaanik napparsimasup ajoqusernerata kingorna inissisimanera napparsimanerup ingerlarnganut nalinginnaasumut, tassunga ilanngullugit pisarialimmik katsorsarneqarnerup nalinginnaasumik kingunerisaanut tamatigut sanilliunneqartassapput. Ajoquserneq - taamaalillunilu aamma taarsiineq - taakku taamaallaat akornanni nikingassutaasuvoq. Assersuutigalugu napparsimasup ajoqusernerata kingorna napparsimasup inuussutissarsiorsinnaassusia 75 pct.-imik apparsimappat, kisiannili napparsimanerup katsorsaanerullu pisariaqartup nalinginnaasumik malitsigisaanik inuussutissarsiorsinnaassutsip 50 pct.-imik apparsimanissaa naatsorsuutigineqarpat taamaallaat napparsimasup ajutoortup inuussutissarsiorsinnaassutsimut annaasaanut 25 pct.-iusumut taarsiisoqassaaq.

Imm. 2-mut

§ 15, imm. 2-mi siunnersuutigineqarpoq taarsiineq ajunngitsorsiassallu akilerneqassasut, namminneq akiliutip ilanngaatigereernerata kingorna akilerneqassasut, nalunaarummi erseqqinnerusumik aalajangersarneqartumi iluarsineqarluni. Nammineq akiliut taanna 8.305 kr.-nik annertussuseqassasoq naatsorsuutigineqarpoq (2023-mi akit) taarsiinerup imaluunniit ajunngitsorsiassap aningaasartaanit ilanngaatigineqartoq. Nammineq akiliutit suliani tamani ilanngaatigineqartarput, matumani taarsigassat ajunngitsorsiassallu 8.305 kr.-usarlutik amerlaneruserlutilluunniit, taamaattorli § 15, imm. 3 takuuk.

Qulaani allaaserineqartutut nalunaarut atulersinneqassappat taarsiinissamut suliap ingerlannissaanut assersuut:

Napparsimasoq 5.000 kr.-nik taarsiiffigineqarpat napparsimasoq taarsiissutisiassani tigussangilai, tassa taarsiineq tamarmiusoq nammineq akiliutinit 8.305 kr.-init annikinnerummat.

Napparsimasoq 12.000 kr.-nik taarsiiffigitittussanngoruni ajunngitsorsiassanilluunniit tunineqartussanngoruni taamaallaat 3.695 kr.-t tigussavai. (taarsiissutit 12.000 kr.-t, nammineq akiliutit ilanngaatigineqartut 8.305 kr.-t, katillugit 3.695 kr.)

Nammineq akiliutit suliami ataatsimi ataasiaannarlutik ilanngaatigineqassapput namminerlu akiliutit 8.305 kr.-t qaangernerini taarsiissutit siulliit tunniunnerini ilanngaatigineqassallutik. (2023-mi akit).

Imm. 3-mut

Imm. 3-mi malittarisassaq peqqinnissamut ilisimatusarnermi, misileraaffiusuni, misileraaneq inummut pineqartumut misissuinermi imaluunniit katsorsaanerme ajoqusernemi nammineq akiliutit pillugit piumasaqaat ilaatitsinnigilaq. Taamaalilluni pisuni taakkunani taarsiinissamut akisussaaneq pillugu inatsimmi malittarisassat malillugit tamakkiisumik taarsiinissaq ajunngitsorsiassallu uuttorneqassapput.

Imm. 4-mut

Imm. 4-mi malittarisassami erseqqissarneqarpoq napparsimasunut taakkulu qimataannut taamaallaat taarsiisoqarsinnaasoq, nalinginnaasumilli taarsiinissamut inatsisini malittarisassat malillugit napparsimasup ajoqusernera pissutigalugu piumasaqaateqarsinnaasunuunngitsaq. Ullormusiassat imaluunniit napparsimanersiutit akilerneqarnerinut sulisitsisumut akiliisimanermut ajunngitsorsiassat pillugit malittarisassat pingaartumik malittarisassamut pingaaruteqarput. Taamaalillutik piumasaqaatit taamaattut matussuserneqanngillat.

Imm. 5-imut

Imm. 5-imi malittarisassami aalajangerneqarpoq taarsiissutissani nammineq akiliut ilanngaatigineqarpat, taava Napparsimasunut Taarsiissuteqartarfiup aalajangiinerani piffissami atuuttumik aningaasanik iluarsisarneq atorneqassaaq, tak. § 25, imm. 4. Taamaalilluni nammineq akiliutip ukiukkaartumik iluarsineqartarnissaa sillimaffigineqarpoq, aamma nammineq akiliutip annertussusianut Napparsimasunut Taarsiissuteqartarfiup aalajangiinerani piffissaq aalajangiisuusoq erseqqissarneqarluni.

Imm. 6-imut

Aalajangersakkatigut sulinermit isertitassaraluanik taarsiivigitinnissamut aammalu sulisinnaajunnaarneq pissutigalugu anniarnermut ajunngitsorsiassat tunniunnissaanut piffissamik sivikinnerpaaffissaliinissamut, sivisunerpaamilli qaammatinik pingasunik piffissaliinissamut Naalakkersuisut piginnaatinneqarput.

Assersuutigalugu qaammatinik marlunnik sivikinnerpaamik killiliisoqarnissaa aalajangersaaffigineqarpat anniarnerni sulitilluni aningaasarsianut annaasanut ajunngitsorsianullu taarsiissuteqartoqarsinnaanngilaq, matumani ajoquserneq piffissami qaammatinik marlunnik sivikinnerusumi sulisinnaajunnaarnermik napparsimanermilluunniit kinguneqarsimappat.

Imm. 7-imut

Nammineq akiliut erseqqissumik allanneqarluni malittarisassanik Naalakkersuisut malittarisassaliussapput, matuma allannerani 8.305 kr,-inik annertussuseqartut. (2023-mi akit) ukiukkaartumik iluarsineqartartussa. Taanna suliassaqarfimmi ilisimasat pissarsiarineqartarneri naapertorlugit pissutsinut tulluarsarsinnaanera eqqarsaatigalugu nalunaarummi malittarisassaliorneqassaaq.

§ 16-imut**Imm. 1-imut.**

§ 16-imi aalajangersakkami qulakkeerneqarpoq misissuinermit, katsorsaanermit assigisaataluunniit katsorsaaffiup akisussaaffigisaanut atatillugu ajoqusernerup malitsigisaanik meeqqamik 18-it inorlugit ukiulimmik annaasaqartut angajoqqaat tamatuma malitsigisaanik ajunngitsorsiassanik tunineqarsinnaasut. Ajunngitsorsiassat meeqqamut angajoqqaatut oqartussaasumut imaluunniit oqartussaasunut tunniunneqassapput. Ajunngitsorsiassanut pisinnaatitaaffik pisuni toquneq napparsimasup ajoquserneratut akuerineqartillugu, aamma toquneq siusinnerusukkut napparsimasup ajoqusersimanerata malitsigisaatut akuerineqarpat.

Ajunngitsorsiassanut pisinnaatitaaffimmut piumasaqaataavoq inatsimmi kapitali 3-mut ilaasumik ajoqusertoqarsimanissaa.

Imm. 2-mut

Aalajangersakkami nassuiarneqarpoq meeqqami paasineqartoq meeraq uumalluni erniusoq kiisalu meeraq toqungalluni erniusoq, naartuneq sivikinnerpaamik sapaatit akunnerinik 22-nik sivisussuseqarsimappat. Aalajangersakkami oqaaseqatigiit aappaasa qulakkeerpaat meeraq toqungalluni erniuppat ajunngitsorsiassaqaartitsisoqarsinnaasoq, assersuutigalugu iltimik

amigaateqarnera takunngitsoorneqarsimappat taamaattumillu meeraq piffissaagallartillugu anillassimanani. Naartuneq sapaatit akunnerinik 22-inik sivikinnerusimappat naartumik katatsineq pineqassaaq, tamannalu aalajangersagaq taanna malillugu ajunngitsorsiaqarnissaanut pisinnaatitaaffiunani.

Imm. 3-mut.

Imm. 2-mi siunnersuutigineqarpoq ajunngitsorsiassat aataasiaannarlugit tunniunneqartarnissaat aalajangerneqassasoq. Angajoqqaatut oqartussaassuseqarneq ataatsimoorunneqarpat ajunngitsorsiannut tamarmik immikkut affaanik tunineqassapput. Angajoqqaq ataasiinnaq angajoqqaatut oqartussaaffeqarpat ajunngitsorsiassat tamarmiusut tassunga tunniunneqassapput.

Imm. 4-mut

Imm. 1-imi aalajangersagaq imm. 1-imi siunnersuutigineqartutut ukiumut ataasiarluni iluarsineqartassaaq, tak. Procenti aaqiissutissaaq aamma maannakkorpiaq aningaasarsiat pillugit Inatsisartut inatsisaat. Tamatuma kingorna aningaasat 500-mik koruunit aningaasartaanik agguarneqarsinnaasumut qaninnerpaamut akunnaallineqassapput. Iluarsineq akunnaaliliinissaaq sioqqullugu piffissami iluarsiinissamut atuuttut tunuliaqutaralugit pissaaq.

Aalajangersakkap kingunerisaanik § 16 malillugu ajunngitsorsiassat allatigut taarsiinermi ajunngitsorsiassani aningaasat pillugit Inatsisartut inatsisaanni tunngaviit assingi malillugit iluarsineqassapput.

§ 17-imut

§§ 17-18-imi aalajangersakkat iluarsiinissaaq aamma taarsiinissami ajunngitsorsiassanilu aningaasat ernialersorneri pillugit malittarisassanik aalajangersaapput, taakku danmarkimi malittarisassanut naapertuupput. Taarsiinissamut suliat Napparsimasunut Taarsiissuteqartarfimmi suliarineqartarnissai eqqarsaatigalugu danmarkimi aqqiissuussinermi malittarisassat assingi atorneqarput. Erseqqissarneqassaaq aalajangersakkat siunnersuutigineqartut taamaallaat peqqinnissaqarfiup iluani napparsimasut naammagittaalliutaat taarsiiffigitinnissamullu periarfissat pillugit Inatsisartut inatsisaanni malittarisassat malillugit aalajangiiffigineqartunut ajunngitsorsiassanut taarsiinissanullu pingaaruteqarmata. Aalajangersakkat taamaalillutik akisussaaffinni allani ajunngitsorsiassanik taarsiisarnernillu aalajangersaanernut pingaaruteqartussaanaatik.

Imm. 1-imut

§ 17, imm. 1-imi siunnersuutigineqarpoq § 3, § 4, imm. 1, § 6, imm. 2, § 8, § 13, imm. 1, oqaaseqaatigiit aappaanni taarsiinermi ajunngitsorsiassanilu aningaasat aamma kapitali 3-mi

malittarisassat malillugit taarsiinissamut akisussaaffik pillugu inatsimmi § 14 a taarsiinissamut akisussaaneq pillugu inatsimmi § 15, imm. 1-imi malittarisassat malillugit iluarsineqartassasut aamma piffissami aalajangiiffiusumi atuuttut aningaasat iluarsineqarsimasut tunngavigalugit aalajangersarneqartassasut.

Aalajangersagaq siunnersuutigineqartoq anniarnermut, ataavartumik ajoqusernermut, inuussutissarsiorsinnaanerup annaaneqarnerata naatsorsornerani ukiumut aningaasarsiat pillugit qaffasinnerpaamik killiliussamut, inunnut ajoqusernermi 15-inik ukioqalersimangitsunut inuussutissarsiorsinnaanerup annaanera pillugu taarsiinissamut, aapparisaamik inooqataasumulluunniit pilersuisumik annaasaqarnermut minnerpaamik taarsiinissamut aamma aapparisaamut inooqatigisamulluunniit qimataasumut ikaarsaarnermi aningaasanut pingaaruteqassapput.

Aalajangersakkami siunnersuutigineqartumi qulaani allassimasut ajunngitsorsiassat taarsiinissallu ukiukkaartumik ulloq 1. januarimi 2,0 pct.-imik iluarsineqartussaassapput, ukiumi aningaasaliiffiusumi tulluarsaanissamut procenti ilanngullugu, soorlu aamma tamatuma kingorna aningaasat pissarsiarineqartut koruunit aningaasartaanik 500-nik agguarneqarsinnaasunut qaninnermut akunnaallineqassasut, § 3, oqaaseqatigiinni siullerni aningaasanut eqqaaneqartunut taamaattoq koruunit aningaasartaanik 6-imik agguarneqarsinnaasumut qaninnermut.

Qulaani allassimasut ajunngitsorsiassat taarsiinerillu piffissami aalajangiiffiusumi atuuttoq taarsiinissamut akisussaaneq pillugu inatsimmi § 15, imm. 1-imi malillugu iluarsineqartut aningaasat tunngavigalugit aalajangersarneqassapput. Taamaalilluni suliap ingerlanerani ajoquser tup taarsiiffigitinnissamut ajunngitsorsiassanullu piunasaqarnerata naliisa isumannaarneri ajorseriannginnissaallu qulakkeer neqassapput.

Tamanna assersuutigalugu isumaqassaaq Napparsimasunut Taarsiissuteqartarfik juli 2024-mi ajoqusernermut ataavartumut ajunngitsorsiassanik aalajangiippat, tak. taarsiinissamut akisussaaffik pillugu inatsimmi § 4, taava ajunngitsorsiassat taarsiinissamut akisussaaffik pillugu inatsimmi § 15, imm. 1 malillugu 2024-mi ataavartumik ajoqusernermut ajunngitsorsiassanut aningaasanut aalajangersarneqassallutik.

Suliaq aalajangiinermik atuutilersussamik Napparsimasunut Taarsiissuteqartarfimmut Suliareqqitassanngortitanik Aalajangiisartunut naammagittaalliutigineqarpat Napparsimasunut Taarsiissuteqartarfiup aalajangiinerani piffissami akigititaasut suli atuuttussaassapput. Aalajangiineq Napparsimasunut Taarsiissuteqartarfimmut Suliareqqitassanngortitanik Aalajangiisartunit allannngortinneqarpat ajunngitsorsiassat ukiumi

allannguiffiusumi ajunngitsorsiassat tunniunneqarnerini akigitat tunngavigalugit aalajangersarneqartussanngussapput.

Imm. 2-mut

§ 17, imm. 2-mi siunnersuutigineqarpoq taarsiinissamut akisussaaneq pillugu inatsimmi § 7 malillugu ukiumut aningaasarsiat aamma kapitali 3-mi malittarisassat malillugit tunniunneqartussanngortut taarsiinissamut akisussaaneq pillugu inatsimmi § 13 malillugu taarsiinissaq ajoqusernermiit piffissamilu aalajangiinerup akornanni piffissami taarsiinissamut akisussaaneq pillugu inatsimmi § 15, imm. 1-imi malittarisassat malillugit iluarsineqassapput.

Aningaasat ukiukkaartumik ulloq 1. januarimi 2,0 pct.-imik iluarsineqartussaassapput, ukiumi aningaasaliiffiusumi tulluarsaanissamut procenti ilanngullugu, soorlu aamma tamatuma kingorna aningaasat pissarsiarineqartut koruunit aningaasartaanik 500-nik agguarneqarsinnaasunut qaninnermut akunnaallineqarlutik.

Siunnersuummi qulakkeerneqassaaq taarsiinissamut akisussaaffik pillugu inatsimmi § 7 malillugu ukiumut aningaasarsiat aamma napparsimasumut taarsiisarnermik aaqqissuussinermi aalajangerneqartut taarsiinissamut akisussaaneq pillugu inatsimmi § 14 malillugu meeqqamut pilersuisumik annaasaqarnermi taarsiinissap nalinga suliap ingerlanerani isummannaarneqassaaq, soorlu imm. 1-imi siunnersuutigineqartutut ajunngitsorsiassat taarsiinermilu aningaasat aamma taamaasineqartut.

Imm. 3-mut.

§ 17, imm. 3, oqaaseqatigiinni siullerni siunnersuutigineqarpoq taarsiinissamut akisussaaneq pillugu inatsimmi §§ 1, 2 aamma 5 malillugu taarsiinissamut ajunngitsorsiassanilu aningaasat, kapitali 3-mi malittarisassat malillugit tunniunneqartussaasut, taarsiinissamut akisussaaneq pillugu inatsimmi § 15, imm. 1, oqaaseqatigiit siulliit aappaannilu malittarisassat malillugit iluarsineqartassasut, aamma piffissami aalajangiuffiusumi atuuttut aningaasat iluarsisimasat tunngavigalugit aalajangersarneqassasut.

Aalajangersagaq siunnersuutigineqartoq peqqissinissamut aningaasartuutitut, allatigit annaasaqarnermut, sulinermi ajunngitsorsiassanik annaasaqarnermut aamma naammaginatut ilisinermi aningaasartuutitut, taarsiinissamut akisussaaneq pillugu inatsimmi § 12 malillugu pingaaruteqarsinnaapput.

Tamanna isumaqarpoq aningaasat pineqartut, tassunga ilanngullugit aningaasartuutit annaasallu, ajunngitsorsiassatut taarsiissutissatullu tunniunneqartut, ukiukkaartumik 1. januarimi 2,0 pct.-imik iluarsineqartassasut ukiumilu aningaasaliiffiusumi atuuttumik tulluarsaanermut procentimi ilaneqartassasut, tak. procenti aaqqiissutissaq pillugu inatsit.

Maluginiarneqassaaq siunissami peqqissinissamut aningaasartuutit imaluunniit anniarnermut, innarlerneqarnermut ajunngitsorsiassat aamma taarsiinissamut akisussaaneq pillugu inatsimmi §§ 1a, 26 aamma § 26 a malillugu qimataasunut ajunngitsorsiassat pillugit taarsiisarnerp iluarsineqarnissaa siunnersuutigineqanngimmat, tassa taarsiisarnerni ajunngitsorsiassanilu taakkunani aalajangersimasumik akigititaqarnanilu tunngaviusunik aningaasaqanngimmata, piffissami aalajangiiffiusumi qummut iluarsivigineqartussanik.

Napparsimasumut taarsiisarnikkut aaqquissuussinermi tunniunneqartussat ajunngitsorsiassat taarsiinissallu naatsorsorneri pillugit piumasaqaatit attuumassuteqartut piffissami aalajangiiffiusumi aaqquissuussinerup siunnersuutigineqartup taamaalilluni qulakkiissavaa suliap suliarinerata nalaani ajoquserutumut taarsiinissap ajunngitsorsiassallu naliisa isumannaarneqarneri ajorseriarnatillu.

§ 17, imm. 3, oqaaseqatigiit aappaanni siunnersuutigineqarpoq aningaasat iluarsineqartut koruunini aningaasartai 5-imik agguarneqarsinnaasumut qaninnerpaamik akunnaallisinneqassasut. Tamanna isumaqarpoq taarsiinissamut akisussaaneq pillugu inatsimmi § 15, imm. 1, oqaaseqatigiit siulliit malillugit iluarsinerup kingorna 5-mik agguarsineqarsinnaasumut qaninnermut koruunit aningaasartaanut qaninnernut akunnaalliisoqassasoq.

Imm. 4-mut

§ 17, imm. 4 siunnersuutigineqarpoq § 16 malillugu ajunngitsorsiassat piffissami aalajangiiffiusumi atuuttut § 16, imm. 4 malillugu aningaasat tunualiaqutaralugit aalajangersarneqassasut.

Aalajangersagaq siunnersuutigineqartoq isumaqarpoq § 16 malillugu immikkut ittumik ajunngitsorsiassatut aningaasat 18-inik ukioqalernatik toqusunut meeqqanut angajoqqaatut oqartussaaffeqartunut tunniunneqartussat piffissami aalajangiiffiusumi atuuttut § 16, imm. 4-mi aningaasat tunngavigalugit aalajangersarneqartussaapput.

Tamanna isumaqarpoq Napparsimasunut Taarsiissuteqartarfik juli 2024-mi § 16 malillugu angajoqqaanut ajunngitsorsiassanik aalajangiisimappat taava 2024-mi akigititanut ajunngitsorsiassat aalajangersarneqartussaassapput.

Suliaq aalajangiinermik atuutilersussamik Napparsimasunut Taarsiissuteqartarfik Naammagittaalliteqarfimmut naammagittaalliuutigineqarpat Napparsimasunut Taarsiissuteqartarfiup aalajangiinerani piffissami akigititaasut sulii atuuttussaassapput. Aalajangiineq Napparsimasunut Taarsiissuteqartarfimmut Suliareqqitassanngortitanik

Aalajangiisartunit allanngortinneqarpat ajunngitsorsiassat ukiumi allannguiffiusumi ajunngitsorsiassat tunniunneqarnerini akigititat tunngavigalugit aalajangersarneqartussanngussapput.

§ 18-imut

§ 18-mi siunnersuutigineqarpoq taarsiinissamik ajunngitsorsiassanillu tunniussinissaq pillugu aalajangiinermiit piffissap sapaatip akunnerisa tallimanik kingusinnerusumik taarsiinissaq ajunngitsorsiassallu tunniunneqassappata ernialersuineq pillugu inatsimmi § 5 naapertorlugu erniamut naapertuuttumik tunniussassat ukiumut ernialersorneqassasut.

Aalajangersagaq danmarkimi napparsimasunut taarsiisarnermik aaqqissuussinermi malittarisassanut naapertuuppoq siunertaallunilu nalornilernissamik pissutissaqartitsinngitsumik paasinartumik kinaassusersiunngitsumillu piffissami ernialersuineramik aalajangersaasoqassasoq.

Sapaatit akunneri tallimat siunnersuutigineqartut Napparsimasunut Taarsiissuteqartarfiup aalajangiinerata Napparsimasunut Taarsiissuteqartarfimmut Suliareqqitassanngortitanik Aalajangiisartunut naammagittaalliuutigineqarnissaat piffissaliussap qaammatip ataasiuneranut atatillugu isigineqassaaq, tak. § 25, imm. 6. Naammagittaalliuut kinguartitsisinnaavoq, taava aalajangiineq naammagittaalliuutigineqarpat maalaartarfiup aalajangiinissaata tungaanut akiliinissamut pisussaaffik atorunnaartussaassalluni.

Sapaatit akunnerini tallimani - akiliinissamut naammagittaalliuuteqarnissamut piffissaliussamiit sapaatip akunneranik ataatsimik sivisunerusumi - qulakkeerneqassaaq ernialersuinnessamut aamma akiliinissamut naammagittaalliuuteqarnissamullu piffissat qaleriinnginnissaat. Ullut qaleriissimappata ernianik akilersuinnessap pinngitsoortinnissaa oqartussanut akiliisussanut ajornarsisissaaq, taarsiineq ajunngitsorsiassallu piffissap maalaarfiussap naanerani ullormi toqqaannartumik akilerneqarsinnaanngimmata. Tamatumunnga pissutaavoq aalajangiineq pillugu naammagittaalliuutigineqarnissaanut piffissamiit tamatumunnga oqartussat nalunaarsuinnessaanut qisuariarnissamullu piffissaqassammat.

Siunnersuutikkut naammagittaalliuuteqarsinnaatitaasut aalajangiineq pillugu naammagittaalliuuteqarsinnaanersut, aningaasat ernialersunngikkaluarlugit, ilisimaneqarneralerneranut taarsiinerit ajunngitsorsiassallu tunniussinissap kinguartinnissaanut oqartussat periarfissaqalissammata.

Siunnersuutip kingunerisaanik Napparsimasunut Taarsiissuteqartarfik ulloq 1. september 2024-mi aalajangiinikkut taarsiinissamut naatsorsorpasuk, taava piffissap taassuma kingorna kingusinnerpaamik sapaatit akunneri tallimat qaangiutsinnagit, tassa imaappoq 6. november 2024-mi, taarsiinermik oqartussat taarsiisussaataitaasut akiliinngippata ernialersuisoqalissammat. Taamaattoqarpat piffissami aalajangiiffiusumiit 1. september 2024-miit akiliinissap tuugaanut erniat naatsorsorneqalissapput.

Suliaq Napparsimasunut Taarsiissuteqartarfimmut Suliareqqitassanngortitanik Aalajangiisartunut Naammagittaalliuut napparsimasumiit imaluunniit oqartussanit taarsiisussaataitaasunit naammagittaalliuutigineqarpat suliame naammagittaalliuutigineqartumi aalajangiisoqarnissaata tungaanut taarsiinissaq uninngatinneqassaaq.

Taarsiinissaq pillugu aalajangiinermut maalaartarfik akuersippat aningaasat septembarip aallaqqaataaniit 2024-miit ernialersorneqalissapput. Akerlianilli taarsiinissaq maalaartarfimmit qaffanneqarpat ukiumi allannguiffiusumi akigitat tunngavigalugit qaffaaneq annertussusilerneqassaaq, taarsiinermillu qaffaaneq maalaartarfiup aalajangiinerani piffissamiit ernialersorneqalertussaalluni, tamatuma kingorna sapaatit akunnerini tallimanik kingusinnerusumit taarsiineq tunniunneqassappat. Taarsiinissaq maalaartarfimmit appartinneqarpat Napparsimasunut Taarsiissuteqartarfiup aalajangiinerani piffissamut ernialersuinissaq inissinneqassaaq, tassa imaappoq 1. september 2024.

Erniat siunnersuutigineqarpoq erniat pillugit inatsimmi § 5 malillugu ernianut aalajangersarneqassasut, tassaasoq pisortat taarsigassarsinerni erniarititaat, Nationalbankenimit ukiut tamaasa ulloq 1. januarimi aamma ulloq 1., julimi 7 pct.-imik tapilerneqarluni aalajangersarneqartartoq.

§ 19-imut

Malittarisassami nammineq pisuuneq aamma ajoqusernerup pineranut napparsimasup allatigut pisoqataanera pissutigalugu taarsiissutissanik appartitsinissaq pineqarpoq. Malittarisassaq nalinginnaasumik taarsiinissamut inatsimmi malittarisassanit allaassutaasumik imaqarpoq, tassa napparsimasup mianersuaalliornera pissutaalluni nammineq pisuussutigisaanik taarsiissutissat appartinneqarsinnaapput. Oqaatsimut "pisoqataaneq"-mut ilaapput nammineq pisuuneq aamma aarlerinartumik akuersineq, kisiannili aarlerinartumik akuersineq pisuni taakkunani nalinginnaasumik pingaaruteqarneq ajorpoq, tassa katsorsaanerup naammassineqarnissaanut napparsimasumiit erseqqissumik akuersineq namminermi napparsimasup ajoqusernerani taarsiinissamut pisussaaffeqarnera pillugu naliliinermut pingaaruteqanngimmat.

Napparsimasup Peqqinnissaqarfimmi sulisut sungiusaqqinnissamik, suliaritinnissamut piareersarnissalluunniit pillugit innersuussutaat malissimangippagit tamanna peqataanertut taaneqarsinnaavoq, imaluunniit naak tamakku pillugit paasisutissiisoqaraluartoq nakorsaaitit eqqortumik atorneqarsimangippata.

Napparsimasoq piaaraluni ajoqusersimappat matumani napparsimasup ajoqusersimaneratut nalinginnaasumik oqartoqarsinnaassanngilaq. Immikkut illuinnartumik pisoqartillugu napparsimasoq piaaraluni pisoqataanikkut ajoqusersimappat, malittarisassap atornerata nalinginnaasumik kingunerisaanik taarsiisoqartussaajunnaassaaq, malittarisassamili immikkut pisuni taarsiinissap paarlattuanik ilaatigut appartinneqarsinnaanera mattunneqanngilaq.

§ 20-mut

Aalajangersakkami pineqarput Inatsisartut inatsisaanni taarsiinissamut aqqissuussinerup aamma nalinginnaasumik taarsiinissamut inatsimmi malittarisassat malillugit taarsiivigitinnissamut piumasaqaateqarsinnaanerup akornanni ataqatigiissaarineq. Aalajangersakkatigut taarsiinissamut aqqissuussaq taarsiinissamut tunngatillugu pingaarnertut inissinneqarpoq, taamaalilluni napparsimasoq taassumaluunniit qimatai, taarsiinissamut aqqissuussaq atorlugu taarsiisoqarsinnaatillugu, nalinginnaasumik taarsiinissamut inatsimmi malittarisassat malillugit, taarsiivigineqarnissamut piumasaqarsinnaajunnaarsinneqarput, taamaattorli siunnersuummi tunisassiamut akisussaaneq pillugu § 22 takku. Tassani taarsiisussatut piumaffigineqartoq peqqinnissamut tunngasutigut sullissisuunersoq imaluunniit taassuma sulisitsisorineraa imaluunniit ajoquusiisoq avataaneersuunersoq pingaaruteqanngilaq.

§ 21-mut

Aalajangersagaq, napparsimasumut taassumaluunniit qimataanut oqartussat akiliisut imaluunniit sillimmasiisarfik akiliisoq taarsiisutinit qanoq annertutigisunik, nalinginnaasumik taarsiinissamut inatsisini malittarisassat malillugit napparsimasup ajoquserneranut taarsiinissamut akisussaasup utertitsilluni akiliinissaanik piumasaqarsinnaanerannut tunngatillugu apeqqummut malittarisassaqaqtitsivoq.

Malittarisassap kingunerisaanik akilersimasanik utertitsisoqarnissaanik § 10-mut taamaallaat ilaasunut piumasaqartoqarsinnaavoq. Mianersuaalliornikkut inuit taakkua ajoquusiisut, nalinginnaasumik taarsiinissamut inatsisini malittarisassat atuuttut malillugit akilersimasanik utertitsinissamik piumasaqaateqarnissamut tunngavissaqassanngillat. Tamatumunnga tunuliaqutaasoq tassaavoq, taarsiinissamik aqqissuussinerup ingerlanissaanut peqqinnissamut

tunngasutigut sullissisoq katsorsaasoq ajoqusiilluni iliuseqarneq pillugu ilitersuinermi paasissutissiinermilu peqataanissaanut akornusiinnginnissap pingaaruteqarnera.

Napparsimasup ajoqusernera, taarsiisoqarnissaanik inunnut § 10, imm. 1-imi taaneqartut saniatigut piumasaqarnissamut kinguneqarsinnaasumik pisimappat, akilersimasat taarserneqarnissaannut periarfissaq pillugu apeqqut nalinginnaasumik taarsiinissamut inatsisini malittarisassat malillugit tamanna aalajangerneqartariaqassaaq.

Napparsimasup taarsiivigineqarnissamut piumasaqarsinnaanera § 20-imi malittarisassamit malittarisassaqartinneqarnera erseqqissaatigineqassaaq, taanna malillugu napparsimasooq amerlanertigut ajoqusiinermut akisussaasumut toqqaannartumik taarsiivigineqarnissamut piumasaqaateqarsinnaanngilaq.

§ 22-mut

Malittarisassaq ajoqusernernerut pingaartumik napparsimmavimmi atortunik ajoqutilinnik peqquteqartunut pingaaruteqarpoq. Tamatumani napparsimasup § 11, nr. 2 malillugu taarsiivigineqarnissani toqqarsinnaavaa, imaluunniit tunisassianut akisussaaneq pillugu inatsisip Kalaallit Nunaannut atuutilersinneqarnissaa pillugu peqqussummi nr. 900, 30. august 2004-meersumi malittarisassat malillugit tunisassiortumut aamma/imaluunniit akunnermiliulluni niueruteqartumut taarsiivigitinnissani peqqussutigisinnaavaa. Napparsimasup taarsiisussaataasumut piumasaqaateqarnissani toqqassappagu taarsiisussaataasooq tunisassiortumut pineqartumut il.il. akisilluni piumasaqaateqarsinnaavoq. Taamaalilluni aalajangersakkami taarsiivigitinnissamik piumasaqaat inunnut inatsit alla naapertorlugu taarsiisussaataanermut akisussaalersimasumut tutsinneqarsinnaajunnaarlugu ilanngutinngitsuusoqarpoq, Inatsisartut inatsisaanni tassani malittarisassat naapertorlugit taarsiivigitinnissamik piumasaqaateqartoqarsinnaappat.

§ 23-mut

Siunnersuummi § 23, nr. 1 malillugu pisortani peqqinnissaqarfimmi katsorsartinnerup aamma pisortani oqartussani allani katsorsartinnerup kingorna ajoqusernernerut taarsiinissamut aningaasartuutitut Naalakkersuisut akiliuteqassapput. Tamanna aamma ulloq unnuarlu paaqqinnittarfinnut atuuppoq, peqqinnissakkut ilinniarsimasunik katsorsaarnernik suliaqartunut aamma Naalakkersuisunit ingerlanneqartunut.

§ 23, nr. 2-mut siunnersuut malillugu kommunii sullissivinni katsorsartinnerup kingorna ajoqusernernerut aningaasartuutitut kommuni akiliisarput, assersuutigalugu kommunit ulloq unnuarlu paaqqinniffii.

§ 23, nr. 3-mut siunnersuut malillugu pisortani peqqinnissaqarfiup avataatigut ingerlanneqarsimasut katsorsaanerit malitsigisaanik ajoqusernerit pillugit katsorsaasarfiit namminersortut taarsiisussaataapput.

Malugeqquneqassaaq akiliisussaataaneq katsorsaanermit akisussaasumut malinneqarmat, assersuutigalugu kommunini ulloq unnuarlu angerlarsimaffinni peqqinnissakkut ilinniarsimasutut sulinermit ajoqusertoqarpat, akiliisussaataaneq katsorsartinnissamut inniminniisumiimmat.

”Katsorsaaviit” imatut paasineqassapput, tamakkunani pingaarnertuunngitsoq katsorsaaviusimasut, assersuutigalugu illut paaqqtarinniffiit imaluunniit ulloq unnuarlu angerlarsimaffiit katsorsaaviusimasut, tassani § 1, imm. 1 pillugu nassuiaatini allaaserinnineq naapertorlugu.

§ 24-mut

§ 24-mut siunnersuut iluaqutigalugu Inatsisartut inatsisaat manna naapertorlugu taarsiivigitinnissamut piumasaqaat sillimmasiisarfimmi sillimmasernermit matussuserneqarsimassasoq Naalakkersuisut taarsiivigitinnissaq pillugu nalunaarummik nalunaaruteqarsinnaataapput.

§ 25-mut

Imm. 1-imut

§ 25, imm. 1-imut siunnersuummi aalajangersarneqarpoq Nunatsinni Nakorsaaneqarfik suliamik tigusissasoq.

Qinnuteqaat Napparsimasunut Taarsiissuteqartarfimmut nassiunneqarpat Napparsimasunut Taarsiissuteqartarfiup qinnuteqaat Nunatsinni Nakorsaaneqarfimmut ingerlateqqissavaa.

Imm. 2-mut

Siunnersuummi § 25, imm. 2-mi napparsimasut taarsiivigitinnissaq pillugu suliap Napparsimasunut Taarsiissuteqartarfimmi aalajangiiffigisassanngorlugu nassiunneqartinnagu Nunatta Nakorsaaneqarfia nammineerluni suliap suliarinissanut piareersaanermik isumaginnissasoq aalajangersarneqarpoq. Matumani taamaalilluni Napparsimasunut Taarsiissuteqartarfiup Kalaallit Nunaanni peqqissutsimut suliasaqarfiup iluani pissutsit pillugit paasissutissanik attuumassutilinnik pissarsisarnissaata qulakkeerqarnissaa siunertaavoq, tamannalu arlalippassuartigut danskit peqqissutsimut suliasaqarfiani pissutsinit

allaanerusinnaavoq. Taamaalilluni Nunatsinni Nakorsaaneqarfiup naammagittaalliuut tigoreerpagu allakkallu kalaallisut qallunaatullu nutserneqareerpata suliap suliarinissaanut piareersaassaaq suliamilu paasiniaalluni suliamik saqqummiussillunilu eqikkaassaaq. Nunatta Nakorsaaneqarfiata suliamik suliarinninneratigut, taarsiinissamut Kalaallit Nunaanni suliat Kalaallit Nunaanni pissutsit aallaavigalugit nalilersorneqarnissaat qulakkeerneqassaaq.

Imm. 3-mut.

Piareersarluni sulianik suliarinninnermut aamma ilaavoq angajoqqaanut aamma naammagittaalliuut Inatsisartut inatsisaata atuuffiata iluaniinnersoq pillugu isummerneq. Taarsiinissaq pillugu suliat ataasiakkaat allaffissornikkut aningaasartuuteqarfiusarneri eqqarsaatigalugit pisoqalisoorsimanissaanut isummernissamut periarfissaq siusissukkut eqqunneqarpoq. Taarsiinissaq pillugu suliaq erseqqissumik pisoqalisimappat imaluunniit Inatsisartut inatsisaata atuuffiani avataaniippat suliap Danmarkimut nassiunneqarnissaa tulluassanngilaq - kingumullu - tassani paasineqarluni suliaq pisoqalisoorsimasoq allatigulluunniit suliarineqarsinnaanngitsoq. Nunatsinni Nakorsaaneqarfiup aalajangiinera naammagittaalliuutigineqarpat suliaq Napparsimasunut Taarsiissuteqartarfimmut suliassanngorlugu nassiunneqassaaq.

Naliliinermi tassani Nunatta Nakorsaaneqarfia naammagittaalliuutip imarisaanut isummissanngilaq, taamaallaalli naammagittaalliuut Inatsisartut inatsisaanni matumani ilaatinneqarnerisooq isummerfigineqassaaq. Nalilersuineri Nunatta Nakorsaaneqarfiani ajoquserneq Inatsisartut inatsisaata atuutilernerata kingorna katsorsaanerit tunngatinneqarsinnaanersooq isummerfigineqassaaq, § 32, imm. 3 takuuk.

Imm. 4-mut

Siunnersuummi § 25, imm. 4-p malitsigisaanik Inatsisartut inatsisaat manna naapertorlugu Danmarkimi Napparsimasunut Taarsiissuteqartarfiup taarsiinissaq pillugu suliat aalajangiiffigissavai. Tamatuma malitsigisaanik suliaq akuerineqassanersooq imaluunniit itigartinneqassanersooq Napparsimasunut Taarsiissuteqartarfimmit isummerfigineqassaaq. Suliaq akuerineqarpat taarsiinissaq annertussusissaanik Napparsimasunut Taarsiissuteqartarfik aalajangersaassaaq.

Napparsimasunut Taarsiissuteqartarfiup aalajangiinerit tamaasa Nunatsinni Nakorsaaneqarfimmut nassiutissavai, tassanilu nutserneqassalluni aamma suliameq qataasunut nassiunneqarluni, tassunga ilanngullugu oqartussat taarsiinissamut akisussaasut, tak. § 23. Suliani taarsiinermi aamma/imaluunniit ajunngitsorsiassanik tunniussiffiusussani piffissap naammagittaalliuuteqarfiusussap naanerata kinguninngua aningaasat aalajangerneqarsimasut akilissavai. Napparsimasunut Taarsiissuteqartarfiup aalajangiinera Napparsimasunut Taarsiissuteqartarfimmut Suliareqqitassanngortitanik Aalajangiisartunut

Naammagittaalliuut naammagittaalliuutigineqarsimappat tamanna atuutissanngilaq. Naammagittaalliuuteqarnissamut piffissaq tassaavoq qaammat ataaseq, tak. § 25, imm. 6, oqaaseqatigiit siulliit.

Napparsimasunut Taarsiissuteqartarfiup aalajangiinera peqataasumit ataatsimit marluusunilluunniit naammagittaalliuutigineqarpat naammagittaalliuut kinguartitsinermik sunniuteqassaaq, tak. § 25, imm. 6, oqaaseqatigiit siulliit. Suliani taakkunani napparsimasoq imaluunniit napparsimasumit qimataasut taarsiinermik kiisalu ernianik akilerneqassappat - napparsimasoq imaluunniit napparsimasumit qimataasut - maalaartarfiup aalajangiinerata kingorna - suli tassunga pisinnaatitaappata.

Imm. 5-imut

Aalajangiinerit Naammagittaalliuutiginnissaat pillugu noqqaanerit, tak. imm. 4, Napparsimasunut Taarsiissuteqartarfimmuut Suliareqqitassanngortitanik Aalajangiisarfirmuut Naammagittaalliuut suliakkiutigineqarsinnaapput. Noqqaaneq naammagittaalliuuteqartumit, katsorsaavimmit, naalakkersuisoqarfimmit akisussaasumit imaluunniit Nunatsinni Nakorsaaneqarfimmit saqqummiunneqarsinnaavoq.

Tamatuma kingorna Napparsimasunut Taarsiissuteqartarfimmuut Suliareqqitassanngortitanik Aalajangiisarfiup suliaq suliarissavaa. Napparsimasunut Taarsiissuteqartarfimmuut Suliareqqitassanngortitanik matuma kingorna aalajangiineq aalajangersarsinnaavaa, atorunnaarsillugu imaluunniit allanngortillugu.

Napparsimasunut Taarsiissuteqartarfimmuut Suliareqqitassanngortitanik Aalajangiisarfiup aalajangiineri inaarutaapput oqartussanullu allanut suliassanngortinneqarsinnaanatik.

Imm. 6-imut

Napparsimasunut Taarsiissuteqartarfimmuut Suliareqqitassanngortitanik Aalajangiisarfiup naammagittaalliuut pillugu noqqaaneq naammagittaalliuuteqartup aalajangiineq pillugu nalunaarfigineqarnerminiit qaammat ataaseq naatinngu tunniutissavaa, naammagittaalliuut pillugu noqqaanerit Nunatsinni Nakorsaaneqarfimmut tunniunneqassapput taakku nutsertinnissai isumagalugit aamma Napparsimasunut Taarsiissuteqartarfimmuut Suliareqqitassanngortitanik Aalajangiisarfirmuut nassiullugit. Piffissaliussamik qaangiisimasut noqqaaneri Nunatsinni Nakorsaaneqarfimmit itigartinneqarsinnaapput.

Naammagittaalliuut ingerlaannartumik kinguartitsisumik sunniuteqartarpoq. Tamanna isumaqarpoq napparsimasoq imaluunniit napparsimasumit qimataasoq Napparsimasunut Taarsiissuteqartarfiup aalajangiinera naammagittaalliuutigineqarpat piffissap

naammagittaalliuuteqarfiup naanerata kingorna taarsiissutinik pissarsisinnaanngitsoq. Suliani napparsimasoq imaluunnit napparsimasumit qimataasut maalaartarfiup aalajangiinera kingorna taarsiiffiqineqassapput ernianillu pissarsillutik - napparsimasoq imaluunniit napparsimasumit qimataasut sulit tassunga pisinnaatitaappata.

Imm. 7-imut

Immikkorluinnaq pissutsit tamatumunnga pissutissaqartitsippata imm. 6-imi piffissaliussaq Nunatsinni Nakorsaaneqarfimmit soqutigineqanngissinnaavoq, assersuutigalugu napparsimasut timikkut peqqissusiata piffissaliussamik eqqortitsinissaq sapernartissimappagu.

§ 26-mut

Imm. 1-imut

Napparsimasut Taarsiissuteqartarfimmut Maalaartarfiup aalajangiinera allaffissornikkut oqartussanit allanit suliarineqarsinnaanngilaq, kisianni eqqartuussivimmi misilinneqarsinnaalluni. Kukkusoeqarsimappat imaluunniit suliamut tunngasumik isumaqatigiinngitsoqarpat suliaq qaqinniaqqinneqassaaq taamaalilluni suliamik nutaamik naliliisoqarluni. Noqqaaneq tunuliaqutaralugu suliareqqinneqarnissaanut tunngaviliisinnaasunik paasissutissanik nutaanik annertuunillu takkuttoqarsimanersoq Napparsimasunut Taarsiissuteqartarfimmut Suliareqqitassanngortitanik Aalajangiisarfimmi naliliissapput. Qaqeqinneqarnissaanut noqqaaneq napparsimasumit, katsorsaavimmit imaluunniit Naalakkersuisunit saqqummiunneqarsinnaavoq.

Imm. 2-mut

Imm. 1 malillugu aalajangiinerup eqqartuussivimmut suliassanngortinnissaanut piffissaliussaq tassaavoq aalajangiinerup naammagittaalliuuteqartumut nalunaarutigineraniit qaammatit arfinillit qaangiutsinnagit.

§ 27-mut

Imm. 1-imut

§ 27, imm. 1-imi siunnersuutigineqarpoq § 25, imm. 4 malillugu akilerneqartut taarsiineq ajunngitsorsiassallu utertinneqarneqarsinnaanngitsut imaluunniit piumasaqaatini ajunngitsorsiassaniluunniit allani ilanngaatigineqarsinnaanngitsut.

Tamatuma kingunerisaanik aalajangiineq naammagittaalliuutigineqarpat, naammagittaalliuuteqarfillu isumaqarluni napparsimasoq taarsiinissamut pisussaaffiliisumik ajoqusersimanngitsoq, aamma napparsimasumut imaluunniit napparsimasup qimataanut iluaqutaanngitsumik Napparsimasunut Taarsiissuteqartarfiup aalajangiinera allanngortillugu, suliami tassani siusinnerusukkat tunniunneqarsimasut taarsiinerit ajunngitsorsiallu utertillugit

akilerneqarnissaat taarsiisussatut pisussaaffeqartup piumasarisinnaanngilaa. Taamaalilluni taarsiineq akilerneqarsimasoq suneqarsinnaanngilaq.

Imm. 2-mut

§ 27, imm. 2-mi aalajangersagaq malillugu peqquserlunnermi atuutinngilaq. Napparsimasoq imaluunniit napparsimasumit qimataasut nalunnigikkaluarlugu paasissutissanik tunniussisimangippata imaluunniit paasissutissanik eqqunngitsunik tunniussisimappata, aamma paasissutissat pigineqarlutik Napparsimasunut Taarsiissuteqartarfiup imaluunniit maalaartarfiup aalajangiineranit allaanerusumik paasissutissat amigaataasut imaluunniit kukkusut allamik aalajangiinermik kinguneqarsimappata taava Napparsimasunut Taarsiissuteqartarfiup maalaartarfilluunniit nutaamik aalajangiissaaq.

Imm. 3-mut.

Aalajangiineq nutaaq tunuliaqutaralugu taarsiinissamut pisussaaffeqartup, § 25, imm. 4 malillugu tunniunneqarsimasut taarsigassarsiat aamma ajunngitsorsiassat utertinneqarnissaat piumasarisinnaavai. Utertillugit akilerneqarnissaannik piunasaqaat taamaallaat atuutissaaq paasissutissat pineqartut aalajangiinerup inerneranut pingaaruteqartumik aalajangiisimappata.

Taarsiinissamut pisussaaffeqartoq taamaalilluni siusinnerusukkut taarsiisimanerup imaluunniit ajunngitsorsiassanik tunniussisimanerup utertillugit akilerneqarnissaat noqqaassutigisinnaavai, nalunaaruteqarneq - taamaalillunilu akiliisimaneq - napparsimasumit imaluunniit napparsimasumit qimataasut peqquserlussimappata. Assersuutitut eqqaaneqarsinnaavoq katissimanermut uppernarsaat salloqittaataasoq tunuliaqutaralugu pilersuisumik annasaqarnermut taarsiiffigitinnissamut qinnuteqarsimapput taarsiiffigitissimalluni.

§ 28-mut

Imm. 1-imut

§ 28, imm. 1-imi aalajangersakkamiippoq Nunatsinni Nakorsaaneqarfimmut paasissutissanik nassiussinissamut pisussaaffik. Malittarisassap kingunerisaanik oqartussat pineqartut aamma pisortat sullissivii il.il. nipangiussisussaataaneq pillugu malittarisassanik unioqqutitsinatik paasissutissanik Nunatsinni Nakorsaaneqarfimmut ingerlatitseqqissinnaapput. Nunatsinni Nakorsaaneqarfimmut nassiunneqartunik paasissutissanut akileeqquisoqarsinnaanngilaq.

Imm. 2-mut

Ullunik 30-nik piffissaliineq sukkasuumik eqaatsumillu sullissinissaq siuarsarniarlugu qulakkeerniarlugulu ikkunneqarpoq, tamannalu napparsimasunut iluaqutaasussaalluni.

Paasissutissani nassiussinissamut pisussaaffimik eqqortitsinnginneq § 30 malillugu akiliisitsinermik pineqaatissiisutaasinnaavoq.

Imm. 3-mut.

§ 25, imm. 4 aamma 5 naapertorlugit suliat suliarisinnaanissaannut tunngatillugu paasissutissanik pisarialinnik ingerlatitseqqinnissamut Nunatsinni Nakorsaaneqarfik Napparsimasunut Taarsiissuteqartarfimmut kiisalu Napparsimasunut Taarsiissuteqartarfimmut Suliareqqitassanngortitanik Aalajangiisarfiimmut pisussaaffeqarpoq.

Paasissutissat suut pisariaqartinneqarnersut Nunatsinni Nakorsaaneqarfiup aamma Napparsimasunut Taarsiissuteqartarfimmut Suliareqqitassanngortitanik Aalajangiisarfiup akornanni eqqartuinikkut qulaajarneqassaaq.

§ 29-mut

Kapitali 3 taarsiinissamut pisinnaatitaasup ilisimasaanit imaluunniit ilisimasariaqagaanit kingusinnerpaamik ukiut pingasut qaangiutsinnagit Nunatsinni Nakorsaaneqarfimmut nalunaarutigineqarsimassasoq § 29-mut siunnersuummi aalajangersarneqarpoq. Piffissaliusaaq atorunnaarsinneqassaaq taarsiivigineqarnissamut pisinnaatitaaffiusumik ajoqusersimanermik napparsimasooq ilisimasaqanngippat imaluunniit ilisimasaqartussaagalarpat. Taamaattorli taarsiivigineqarnissamik piumasaqaat ajoqusernerup pineraniit kingusinnerpaamik ukiut qulit qaangiuppata nalunaarutigineqarsimassaaq. Ukiunik qulinik piffissaliineq aalajangersimasuuvoq, taannalu qanorluunniit immikkut ittumik atorunnaarsinneqarsinnaanani. Ajoqusernerup malitsigisai ajoqusernermiit ukiut qulit kingorna aatsaat takkukkaluarpata Inatsisartut inatsisaat malillugu piumasaqaateqartoqarsinnaanngilaq.

§ 30-mut

Imm. 1-mut

§ 30-mut siunnersuummi peqqinnissakkut sulisup taarsiinissamut suliap suliarinerani atugassanik Nunatsinni Nakorsaaneqarfimmut paasissutissanik nassiussinissamut § 28-mi pisussaaffimik eqqortitsinngippat akiliisitsinikkut pillateqartitsinissamut tunngavissiivoq.

Imm. 2-mut

Imm.1 tunngavigalugu pineqaatissiinermik akiliisitsineq nunatta karsianik pisassanngortinneqassapput.

§ 31-mut

62

§ 31-mut siunnersuummi Inatsisartut inatsisaat naapertorlugu atulersinneqartunik najoqqutassanik eqqortitsinnginneq akiliisitsinertut ittumik pineqaatissiinermik kinguneqarsinnaasoq aalajangersarneqarpoq. Pineqaatissiinerit Kalaallit Nunaanni Pinerluttulerinermut Inatsimmi malittarisassat naapertorlugit aalajangersarneqarput.

§ 32-mut

Imm. 1-imut

Inatsisartut inatsisaat nalunaaruteqarnikkut atuutilersinneqassasoq siunnersuutigineqarpoq. Napparsimasunut taarsiissutinik aamma Napparsimasunut Taarsiissuteqartarfimmut Suliareqqitassanngortitanik Aalajangiisarfirmmik attuumassuteqartunik isumaqatigiissuteqartoqareerpat aamma suliassanik suliarinninnissanut Danmarkimi inatsimmi naammattumik tunngavissat qulakkeerreqareerata nalunaarut saqqummiunneqassaaq.

Imm. 2-mut

Imm. 2-mi siunnersuutigineqarpoq peqqinnissakkut ilinniarsimasutut sulineq pillugu naammagittaalliuuteqarneq pillugu Inatsisartut inatsisaanni kapitali 2 inatsisip atuutilernerata kingorna ingerlanneqartunut katsorsaanernut atuuttusoq. Paarlattuanik Inatsisartut inatsisaata atulersinnissaa sioqqullugu katsorsaanermut atatillugu pisimasut ajoqusernerit taamanikkut malittarisassat atuuttut malillugit suliarineqassapput.

Imm. 3-mut.

Imm. 1-imi siunnersuutigineqarpoq napparsimasut ajoqusernerinut taarsiinissaq pillugu inatsisartut inatsisaani kapitali 3 Inatsisartut inatsisaata atuutilernerata kingorna pisunut ajoqusernertut atuuttoq. Ajoquserneq tassaavoq piffissami taarsiinissamut tunngavissaqartitsisumik pisumik tunngaveqartoq. Inatsisartut inatsisaat taamaalilluni taamaallaat ajoqusernertut, misissuineq imaluunniit katsorsaaneq il.il., taarsiinissamik piunasaqarnissamik tunngavissiisoq piffissap atuutilernerata kingorna pisimasuussaaq. Piffissami pisumi assersuutigalugu tassaavoq piffissaq katsorsaaffiusoq imaluunniit nakorsap eqqortumik nappaatip suussusernissanut piffissaq.

Piffissaq atuutilerfiussaq sioqqullugu ajoqusernertut tunngasut taarsiiffigitinnissamut piunasaqaat taamanikkut malittarisassat malillugit suliarineqassaaq. Ajoquserneq aatsaat piffissap atuutilerfiusup kingorna aatsaat paasineqaraluarpuunniit tamanna atuutissaaq, aamma taarsiinissaq pillugu noqqaaneq piffissaq atuutilerfiussaq sioqqullugu kingornatigulluunniit nassiunneqarsimanersoq apeqquaatinnagu.

§ 33-mut

Inatsisartut Inatsisaata atortussanngortinnera tunngavigalugu Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaanni nr. 27, 18. november 2010-meersumi aammalu Inatsisartut inatsisaatigut nr. 2, 29. maj 2012-imeersukkut allanngortinneqartumi kiisalu Napparsimasut inatsisitigut inissisimanerat pillugu Inatsisartut peqqussutaat allannguutinik suliaqartoqarpoq.

Tamatuma saniatigut Napparsimasut Maalaarutaannik Aalajangiisartunut maalaaruteqartarnek pillugu Namminersorlutik Oqartussat nalunaarutaat nr. 14, 24. september 2012-imeersoq Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit inatsisartut inatsisaanni nr. 27, 18. november 2010-meersumi § 11 a tunngavigalugu aalajangersarneqartoq atorunnaarpoq.

Ilanngussaq 1**Tusarniaassut pillugu allakkiaq piffissami 14. maj 2021-miit 11. juni 2021-p tungaanut tusarniaanermi ilisimatitsissut**

Siunnersuut ukununga tusarniutigalugu nassiunneqarsimavoq: Naalakkersuisut Siulittaasuata Naalakkersuisoqarfia, Aningaasaqarnermut Nunamullu Namminermit Naalakkersuisoqarfik, Ineqarnermut, Attaveqatigiinnermut Naligiissitaanermullu Naalakkersuisoqarfik, Aatsitassanut Naalakkersuisoqarfik, Nunalerinnermut, Imminut Pilersornermut, Nukissiutinut Avatangiisinullu Naalakkersuisoqarfik, Isumaginninnermut Sulisoqarnermullu Naalakkersuisoqarfik, Meeqqanut, Inuusuttunut, Ilaqutariinnut Inatsisillu Atuutsinneqarnerannut Naalakkersuisoqarfik, Inuussutissarsiornermut, Niuernermit, Nunanut Allanut Silallu Pissusaata Allanngoriartorneranut Naalakkersuisoqarfik, Peqqissutsimut Pitsaaliuinnermullu Aqutsisoqarfik aammalu Nunatsinni Nakorsaaneqarfik.

Taakku saniatigut siunnersuut Naalakkersuisut tusarniaassutigisaminnut nittartagaanni piffissami tassani pissarsiarineqarsinnaasimavoq.

Tusarniaanermi akissutit arfineq-marluk tiguneqarput, taakkunanga uku oqaaseqaateqarsimanatik: Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Aalisarnermut Piniarnermullu Naalakkersuisoqarfik aammalu Meeqqanut, Inuusuttunut, Ilaqutariinnut Inatsisillu Atuutsinneqarnerannut Naalakkersuisoqarfik.

Tusarniaaffigineqartut uku siunnersuummut oqaaseqaateqarput:

1) Naalakkersuisut Siulittaasuata Naalakkersuisoqarfia

Naalakkersuisut Siulittaasuata Naalakkersuisoqarfia matumuuna Napparsimasut peqqinnissaqarfimmut atatillugu naammagittaalliuteqarnissamut taarsiivigineqarnissamullu periarfissaat pillugit Inatsisartut Inatsisissaattut siunnersuummut oqaaseqaatini tunniuppai.

Siunnersuummut nalinginnaasumik nassuiaatinit atuarneqarsinnaasutut peqqinnissaqarfimmit passunneqarnermut atatillugu ajoqusersimanernut napparsimasut taarsiivigineqarsinnaanerannut tunngatillugu inatsisitigut malittarisassaqaarsimannginnerata aaqiivigineqarnissaata naapertuutinnera Naalakkersuisut Siulittaasuata Naalakkersuisoqarfiata siullertut nalunaarsorpaa.

.
.
Naalakkersuisut Siulittaasuata Naalakkersuisoqarfiata maluginiarpaa, naammagittaalliuutit 'peqqinnissaqarfimmi aqutsisunut' nassiunneqartarneri § 7, imm. 2-mi aammalu 3-mi kiisalu nassuiaatit nalinginnaasuni (2.3) aammalu siunnersuummi immikkoortunut ataasiakkaanut oqaaseqaatini (§7-imi) nassuiarneqarsimasut".

Kikkut pineqarnersut matumuuna takujuminaatsinneqarpoq; 'peqqinnissaqarfimmi aqutsisut' tassaappat Peqqissutsimut Pitsaaliuinernullu Aqutsisoqarfik, peqqinnissaqarfimmik aqutsisut imaluunniit najukkani nakorsatut aqutsisut?

Akissut: Maalaartarfik eqqortoq erseqqissarniarlugu siunnersuummi § 9-mi kiisalu nassuiaatini nalinginnaasuni (2.3.2.2-mi) aammalu siunnersuummut nassuiaatini § 9-mi 'peqqinnissaqarfimmi aqutsisut'-mik allaqqasut peqqinnissaqarfimmi qullersat'-mut allanngortinneqarput. Peqqinnissaqarfimmik aqutsisut Peqqissutsimut Pitsaaliuinernullu Aqutsisoqarfimmiippat, taamaammat peqqinnissaqarfimmi qullersat tassaappat peqqinnissaqarfimmik aqutsisut.

Naammagittaalliuutinik suliaqartumik allattoqarfimmik pilersitsisoqarnissaata siunniunneqarnera Naalakkersuisut Siulittaasuata Naalakkersuisoqarfiata nalunaarsorpaa

Inatsimmut siunnersuummi arlalitsigut taaneqarpoq (assersuutigalugu § 3, imm. 1, aamma § 7, imm. 1) Nunatsinni Nakorsaaneqarfik naammagittaalliuutinik tiguisarlunilu nassiussisartoq, tassani ilimagineqarluni allattoqarfik Nunatsinni Nakorsaaneqarfimmi inissinneqarsinnaasoq.

Akissut: Siunnersuummi nassuiaatini nalinginnaasuni (3.1-imi) ilanngunneqarpoq. Naammagittaalliuutit pillugit sulianut allattoqarfik aaqqissuussaannikkut Nunatsinni Nakorsaaneqarfimmut inissinneqassaaq.

Tamatuma saniatigut ilinniagartuutut fuldmægtigimut naapertuuttumik pilersitsinermi aningaasartuuteqarnissaq naatsorsuutigineqartoq nassuiarneqarpoq, akerlianilli ingerlatsinermut aningaasartuutissat, taakkununga ilanngullugit sulisut aqutsisullu amerlassusissaattut naatsorsuutigisat, nassuiarneqarsimanatik.

Akissut: Naammagittaalliuutit pillugit sulianut allattoqarfik Nunatsinnik Nakorsaaneqarfimmit sulisunik kiisalu ilinniagartuutut fuldmægtigimik sulisoqassaaq. Naammagittaalliuutit pillugit sulianut allattoqarfik napparsimavinni napparsimasunut ilitsersuisunik il.il. qanimut suleqateqarnikkut ingerlanneqassaaq. Naammagittaalliuutit pillugit sulianut allattoqarfik Nunatsinni Nakorsaaneq qullersarissavaa.

2) Ineqarnermut, Attaveqatigiinnermut Naligiissitaanermullu Naalakkersuisoqarfik

IIAN-ip 'Kalaallit Nunaannii peqqinnissakkut katsorsaanerup iluani napparsimasut naammagittaalliuteqarnissamut taarsiivigineqarnissamullu periarfissaqarnerat pillugu Inatsisartut inatsisissaattut siunnersuut'-mut tusarniaanermut akissuteqaasiorsinnaanerminut periarfissinneqarnini qujassutigaa.

IIAN-ip tungaaniit siunnersuummi taarsiiviginninnissamut aalajangersakkat soqutigineqarput, taakkununga ilanngullugit ingammik siunnersuummi § 19-imut tunngatillugu, kiisalu tamatumunnga atatillugu aningaasaqarnikkut kingunerisassai eqqarsaatigalugit.

Tamatumunnga atatillugu ilisimatitsissutigineqarsinnaavoq, Namminersorlutik Oqartussat missingersuusiormut malitassaasa imarisaani Namminersorlutik Oqartussanut sillimmasiissutinik pisinermut akisussaaffik pillugu aalajangersagaqartoq. Tassani Ineqarnermut Naalakkersuisup akisussaaffinut ilaasoq allaqqavoq. Tamanna isumaqarpoq, sillimmasiissutitut tunngatillugu IIANN kisimi isumaqatigiissusiorsinnaasoq.

Tassunga tunngatillugu paasissutissiissutigineqassaaq Naalakkersuisut taakkuummata Namminersorlutik Oqartussat sillimmasiisarnernut politikianut aalajangiisartuullutillu akuersisartut. Naalakkersuisut kingullermik ullormi 1. Januar 2021 aallarnerfigalugu atuutilersussamik Namminersorlutik Oqartussat sillimmasiissutitut politikia atukkatigut allannguutitaqanngitsumik nutarterneqarnissaa 2020-p ukiaanerani akuersissutigivaat. Tamatuma ilaatigut kingunerisaa tassaavoq, immikkoortunut sillimmasiissutit akornanni tamatumunngalu sillimmasiissummut tassunga nammineq akiligassat sorliit attuumassuteqarneri, kiisalu immikkoortut sorliit nammineerlutik imminnut sillimmasiissutinik isumaginnittuussaneri pillugit agguataarinneq allanngortinneqarnikuunnginnera. Taamatuttaaq aalajangiinerup kingunerisaanik tamatumunnga aningaasartuutit immikkoortortaqrfinnit pineqartunit matussuserneqartassapput.

Namminersorlutik Oqartussat sillimmasiisarnermut politikia sillimmasiissutinik arlalinnik pisiarineqarnikunik aammalu Namminersorlutik Oqartussat sillimmasiissutini arlalinni

imminnut sillimmasersimanerannik imaqarpoq. 2021-mut Aningaasanut Inatsimmi, pingaarnertut kontumi 70.10.03-mi allaqqavoq, Namminersorlutik Oqartussat immikkoortortaqarfii sillimmasiissutinut akiliutit akiligassiissutigineqartassasut. Agguataarineq 2016-imiilli akiligassiissuteqartarneq naapertorlugu pisarpoq – taamani sillimmasiissutit tamaasa pisiarineqarnikuupput. Tamanna piviusumik isumaqarpoq, immikkoortortaqarfiit sillimmasiisarnermut aaqqiissutit tamaasa iluini sillimmaseqqasut, sillimmasiissutip allagartaata allaffissornikkut ingerlanneqarneranut aningaasartuuteqarfigneqarneranullu akiliisartut. Immikkoortortaqarfimmi aningaasartuutit ilanngullugit sillimmasiissummut akiligassap akileeqqusissutigineqartarnera immikkoortortaqarfinni imminnut sillimmasiissuteqarfiusuni ingammik atuutsinneqarpoq, taamaasilluni annertuumik ajoqusertoqartillugu Nunatta Karsia artukkerumanagu aningaasat annerusumik ajoqusersimasunut aningaasartuutissanut nuunneqarsinnaaniassammata.

Tamanna aamma 'Kalaallit Nunaannii peqqinnissakkut katsorsaanerup iluani napparsimasut naammagittaalliuteqarnissamut taarsiivigineqarnissamullu periarfissaqarnerat pillugu Inatsisartut inatsisissaattut siunnersuut' naapertorlugu taarsiinissamut akisussaaffimmut atuutsinneqassaaq – sillimmasiissutit pisiarisimasat imaluunniit namminerisamik sillimmasiissuteqarneq pineqarnersut apeqqutaatinnagu. Sillimmasiissutinut aaqqiissummut aningaasartuutit peqqinnisaqarfiup pisussaaffigilissavaa, taamatuttaaq tamatumunnga atatillugu ilaatigut allaffissornikkut attuumassuteqartut ilanngullugit.

Siunnersuummut nassuiaatini aningaasaqarnikkut kingunerisassanut tunngatillugu, sillimmasiissutip uppersaataanut aningaasartuutit eqqarsaatigineqarsimanersut – taamaassappat pisiarineqassanersoq imaluunniit namminerisamik sillimmasiissuteqarneq pineqarnersoq IANN-ip takujuminaatsippaa. IANN-imit taamaalilluni innersuussutigineqarpoq tamanna qulaajarneqassasoq siunnersuummilu atuarneqarsinnaassasoq.

Tassungalu atatillugu paasissutissiissutigineqassaaq qulaajaanissami qanoq iliorluni sillimmasiinerup pisiarisap imaluunniit nammineerluni sillimmasiinerup misissuiffigineranni Namminersorlutik Oqartussani sillimmasiisarnermut aaqqissuussat allat assigalugit aalajangiinerit Naalackersuisunit akuerineqartussaanerat qulaajaaffigineqassasoq.

Siunnersuummi qularnaveeqqusiinissamut akisussaaffimmut tunngatillugu aningaasaqarnikkut kingunerisassat pillugit qulaajaanissamut IAN ikiuussinnaavoq, tassunga ilanngullugit neqeroorusiortitsinernut, aammalu/imaluunniit namminerisamik sillimmasiissutinik naatsorsuineranut. Tamanna kissaatigineqassappat Peqqissutsimut Naalackersuisoqarfik tamanna pillugu naalackersuisoqarfiup sillimmasiinernut mailianut saaffiginequllugu qinnuigineqarpoq: sillimmat@nanoq.gl.

Akissut: Napparsimasut taarsiiffiginissaannut sulianut aningaasartuutit ulloq manna tikillugu Peqqissutsimut Naalackersuisoqarfimmiit tunniunneqartarsimapput, sillimmasiisoqarsimannngilarlu, soorluttaarlu Namminersorlutik Oqartussani suliffiup iluanut tunngatillugu sillimmasiisarnermut aqqissuussisoqarsimannngitsaq. Aningaasartuutaasartut siusinnerusukkut 1,5 mio. kr.-nit missaanniittarsimapput, taakkulu aningaasanut inatsimmi takuneqarsinnaasutut napparsimasut taarsiiffigitinnissaannut suliat tunniuttarnerannut aningaasaliissutinut inatsisitigut pisussaaffiusunut naapertuupput. Siunnersuut manna aqqutigalugu napparsimasut naammagittaalliuutaannut suliassaqarfik annertusineqarpoq, naatsorsuutigineqarporlu taarsiinissanut sulianut aningaasartuutit ukiumut 7 mio. kr.-ninut qaffassasut. Tamakku 2022-mut aningaasanut inatsimmut ukiunullu missingersuusiorfiusunut ilanngunneqarput.

3) Nunatsinni Nakorsaaneqarfik

Napparsimasut Maalaarutaannik Aalajangiisartut suliassaat

Inatsisissatut siunnersuummi peqqinnissamut tunngasutigut suliaritinnermut naammagittaalliuutit Danmarkimi Napparsimasut Maalaarutaannik Aalajangiisartunut tunniunneqartarsinnaaneriniq ilanngussisoqarnikuunngitsaq maluginiarneqarpoq. Peqqinnissamut tunngasutigut sullissisunut ataasiakkaanut naammagittaalliuutinut, Napparsimasut Maalaarutaannik Aalajangiisartut suliassaannik taasartagaannut, naleqqiullugu, Napparsimasut Maalaarutaannik Aalajangiisartunut maalaaruteqarneq pillugu Namminersorlutik Oqartussat nalunaarutaat nr. 14, 24. september 2012-imeersoq atuuttoq innersuunneqassaaq, Peqqinnissaqarfiup aqunneqarnera, aqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersoq naapertorlugu nalunaarutaasoq.

Inatsisissatut siunnersuummi allannguutit ilagiligassaat tassaavoq, aallaaviusumik peqqinnissamut tunngasutigut katsorsaanerit pillugit naammagittaalliuutit tamaasa, peqqinnissamut tunngatillugit suliatigut sulinermik napparsimasut naammagittaalliuutaattut suliarineqartassapput, taamaattorli Nunatsinni Nakorsaanerup peqqinnissamut tunngasutigut suliat Napparsimasut Maalaarutaannik Aalajangiisartunut *suliassanngortissinnaassavai*. Tigussaasumik ima isumaqarpoq, Napparsimasut Maalaarutaannik Aalajangiisartunut maalaaruteqartarneq pillugu Namminersorlutik Oqartussat nalunaarutaanni nr. 14, 24. oktober 2012-meersumi atuuttumi § 1, imm. 1, atorunnaarsinneqassasoq aammalu § 1, imm. 2 suli atuutsinneqassasoq. Tamanna isumaqarpoq naammagittaalliuutit Napparsimasut Maalaarutaannik Aalajangiisartunut tunniunneqarnissaannut inatsisitigut piumasaaqatitaqannginnerat, taamaattorli peqqinnissamut tunngasutigut sullissisumik akuerisamik isornartorsiuinissamut allatigulluunniit kinguneqartitsisoqarsinnaaneraniq tunngavissaqartoqarsinnaaneraniq naliliisoqassappat, taava Nunatsinni Nakorsaaneqarfiup

suliaq napparsimasut naammagittaalliutaannik aalajangiisartunut suliassanngortittussatut sularisinnaavai

Akissut: Ilaanakortumik ilanngunneqarpoq. Inatsisissatut siunnersuusiormi Napparsimasut Maalaarutaannik Aalajangiisartunut maalaaruteqartarneq pillugu Namminersorlutik Oqartussat nalunaarutaanni nr. 14, 24. september 2012-imeersup atorunnaarsinneqarnissaa siunniunneqarpoq. Taarsiullugu siunnersuummi matumani peqqinnissamut tunngasutigut sullissisunut aalajangersimasunut tunngatillugu (naammagittaalliutit taakku Napparsimasut Maalaarutaannik Aalajangiisartunit sularineqartassallutik) aammalu peqqinnissaqarfik pillugu (Napparsimasut naammagittaalliutaannut Aqutsisoqarfimmut) naammagittaalliuteqarsinnaaneq ataatsimoortinneqassaaq. Taamaattorli suli napparsimasup nammineerluni peqqinnissamut tunngasutigut sullissisoq imaluunniit peqqinnissaqarfik pillugu naammagittaalliuteqarnissaminik kissaateqassanerluni aalajangissavaa.

*Nunatsinni Nakorsaaneqarfiup naammagittaalliutinik itigartitsinissaminut tunngavissai Inatsisissatut siunnersuummi § 4, imm. 1 aamma imm. 3, naapertorlugit Nunatsinni Nakorsaaneqarfiup aalajangissavaa inatsit malillugu naammagittaalliuut nalilersorneqarsinnaanersoq (imm. 1) aammalu naammagittaalliuut pisoqalisimasoorsimanersoq pillugu aalajangiisinnaatitaassalluni (imm 3). Suliami paasisutissanik (aqutsisunit aamma/imaluunniit attuumassuteqartunit oqaaseqaatinik noqqaassuteqarneq kiisalu maalaarummik eqikkaanermik) *pissarsinnginnermi*, Nunatsinni Nakorsaaneqarfik maalaarummik ersariinnartumik tunngavissaqanngitsumik aallarniutaasumik nalilersuisinnaaneranik periarfissamik ammaassisoqarsinnaanersoq noqqaassutigineqarpoq.*

Nunatsinnik Nakorsaaneqarfiup misilittagai naapertorlugit, naammagittaalliuutit ilaat ersariinnartumik toqqammavissaqanngitsutut isigineqartariaqarput. Naammagittaalliuutinut atatillugit, naak ersariinnartumik tunngavissaqanngikkaluartut, tamakkiisumik ilisimatitsissutigineqartussanut sularineqartussanullu tunngatillugit isumalluutinik atuinissamik pinaveersaartitsisinnaanermut Inatsisinut maannakkut atuuttunut aammalu inatsisissatut siunnersuummi inatsisitigut tunngavissaqarnissamik periarfissaqartoqanngilaq. Tassungalu ilaavoq tunngavissaqanngitsumik naammagittaalliuutit ersiinnartumik sulerulutsisarnerat maalaartarnermut suliassaqarfimmi sulianik sularinnittarnermut tamarmut sivitsorsaataasarmata.

Akissut: Inatsisissatut siunnersuummi § 6, imm. 4-mi ilanngunneqarput.

Naammagittaalliuutit pillugit sulianut allattoqarfik/Naammagittaalliuteqartarfik

Inatsisissatut siunnersuummi § 3, imm. 2-mi atuarneqarsinnaavoq naammagittaalliuutit sumut tunniunneqarsinnaaneri piareersarneqarnissaallu pillugit malittarisassanik Naalakkersuisut aalajangersaasinnaasut. Taamaattumik, allattoqarfittut isumaliuutigineqartup inatsit naapertorlugu pilersinneqarnissaanik kissaatigineqarpat, pilersinneqarnissaa inatsimmut nalunaarutitigut tunngavissaqarnissaa naatsorsuutigineqarpoq. Nunatsinni Nakorsaaneqarfiup naliliinera tassaavoq, innuttaasut naammagittaalliuuteqarnissamut taarsiivigineqarnissamullu periarfissaat naapertuuttumik inatsisitigullu tunngaveqartumik suliarineqarsinnaaneritut tunngatillugu allattoqarfeqarnissaa piumasqaataasoq, tamatumunnga ilanngullugit aningaasarsiornikkut allaffissornikkullu kingunissai pillugit immikkoortoq takuuk.

Pisortanut aningaasaqarnikkut allaffissornikkullu sunniutissat

Inatsisissamut nassuiaatini (qupperneq 8) taamaallaat allattoqarfimmik pilersitsinermut aningaasartuuteqarnerulerneq kiisalu taarsiissutit tunniunneqartartut qaffariaateqarnissaannik naatsorsuuteqarneq taamaallaat pineqartut maluginiarneqarpoq. Eqqaaneqartoq siullermut tunngatillugu ”naammagittaalliuutit pillugit suliat katersornerisigut assigiiaartumillu suliarinerisigut isumalluutit allamut atugassaalersut sulinermi tassani ilaanissaat”-nnik eqqoriaaneq tunuliaqutigineqarsimaneranik nalilersuisimanertut isumaqarfigineqarpoq, naak aamma suliat amerlinerulernerinik kinguneqarnissaannik naatsorsuuteqarnerup naliliinermut tamatumunnga allangortitsisoqarnaviangitsutut paasineqarluni.

Inatsisissatut siunnersuutip malitsigisaanik nutaanik suleriaaseqalernerme isumalluutit amerlanerulernissaannik oqariartuuteqartoqarnera Nunatsinni Nakorsaaneqarfiup isumaqataaffiginngilaa. Akerlianilli sulianik innersuussisarnerup ilisimatitsissuteqartarnerullu malitsigisaannik, taakkununnga ilanngullugit taarsiisussaanermut akisussaaffimmut ilaasutut suliat amerlassusiisa amerleriarnissaat, allaffissornikkut nammatassat annertuseriassapput. Tassunga ilaapput naatsorsuutigisatut suliassat amerlassusiisa amerleriarnissaannut tunngatillugit, inatsisissatut siunnersuutip nassuiaataani oqaatigineqartut.

Una eqqarsaatigineqarsimanngissorineqarpoq, ukiuni qulini kingullerni naammagittaalliuutit amerliartuinnartut suliarinissaannut isumalluutinik amerlanerusunik aningaasaliisoqarsimannginnera.

Nakorsaaneqarfiup 2016-imit ukiumoortumik nalunaarutaani atuarneqarsinnaavoq, 2012-imiilli naammagittaalliuutit ukiumut 80-100-t tungaanut qaffariangaatsiarsimasut. Suliat amerlassusii suli qaffakkiartorput, pissutigalugu 2019-imi aammalu 2020-mi naammagittaalliuutit 120-iunikummata.

Ukioq manna 1. juuni aallarnerfigalugu naammagittaalliuutit 62-it Nunatsinni Nakorsaaneqarfimmut toqqaannartumik nassiunneqarsimalereerput. Taakku saniatigut sullinneqarnermut naammagittaalliuutit amerlassutsikkut kisitsisit ilisimaneqanngitsut

Peqqinnissaqarfimmi aqutsisunut toqqaannartumik nassiunneqarsimanissaat ilimagineqartariaqarpoq.

Ingammik nappaalanersuup nalaani naammagittaalliutitut tunngatillugit sulianut suliarinninniarnermi siunnersortinik avataaneersunik attartortoqartariaqarnikuunera eqqarsaatigalugu, taamaattorli aamma atukkat nalinginnaasuugaluarpataluunniit suliassat amerlassusaat taakkuuginnartarput aammalu sulianik suliarinninnermi suliatigut immikkut ilisimasanik pilersitsinissaq piunasaqaataasoq eqqarsaatigalugu Nunatsinni Nakorsaaneqarfimmut unamminartorujussuovoq. Suliat amerlassusiisa annertusiartoraluttuinnarnerisa kingunerisaannik, sulianik suliarinnittarnermut piffissaq annertunerusup atorneqartalerpoq kiisalu suliat suliarinissaannut kinguaattoortoqakkajuttarpoq. Nunatsinni Nakorsaaneqarfiup nalilerpaa, AC-mi ukioq naallugu sulisussamik pisariaqartitsisoqartoq, sulilu aamma Nunatsinni Nakorsaaneqarfimmi sulisut maanna amerlassusiligaanerat aammalu inatsisissamut nassuiaatini eqqaaneqartutuulli allattoqarfimmi sulisussamut (allattoqarfimmik pilersitsinissamut) naleqqiullugit naammagittaalliutinik sulianik suliaqarnissamut pisariaqartitsisoqarnerulernissaa nalilerneqarluni.

Akissut: Peqqissutsimut Naalackersuisoqarfiup qulaani allaqqasut tusaatissatut tiguai.

4) Kalaallit Nunaanni Peqqissaasut Peqatigiiffiat

Peqqinnissaqarfiup iluani maalaarnissamut taarsiivigitinnissamullu periarfissat pillugit inatsisitigut atortussanngortitsisoqarnissaa PK-p pingaartitaraa.

PK Inatsisissatut siunnersuummut nassuiaatini immikkoortunut tulliuttunut nassuiaatissaqarpoq *2.3.1 Inatsisit atuuttut Peqqinnissamut tunngasutigut naammagittaalliutit.*

Kalaallit Nunaanni naammagittaalliuteqartoqartarnerata ingerlarnga: Nunatsinni Nakorsaanerup Namminersorlutik Oqartussat nalunaarutaat naapertorlugu¹ napparsimasut naammagittaalliutaat Danmarkimi Napparsimasut Naammagittaalliutaannik Aalajangiisartunut innersuussinnaavai. Nalunaarummi matumani allassimavoq, Kalaallit Nunaanni peqqinnissamut tunngasutigut sullissisut peqqinnissamut tunngasutigut sulinerat pillugu napparsimasuniit naammagittaalliutit Danmarkimi Napparsimasut Maalaarutaannik Aalajangiisartunut suliassanngortinneqarsinnaasut, tak. § 2 imm. 1. Nalunaarummi tassani aamma allaqqavoq, Kalaallit Nunaanni ilinniarsimaneq akuersissuteqarnerluunniit tunngavigalugit peqqinnissamut tunngasutigut suliamik ingerlataqartut tulliuttut pillugit

¹Napparsimasut Maalaarutaannik Aalajangiisartunut maalaaruteqartarnek pillugu Namminersorlutik Oqartussat nalunaarutaat nr. 14, 24. september 2012-imeersumi § 2, imm. 4 takuuk.

Nunatsinni Nakorsaanerup Napparsimasut Maalaarutaannik Aalajangiisartunut suliassanngortitsisinnaasoq: Peqqissaasut, kigutigissaasut, kigutit nakorsaasa ikiortaat, peqqissaasumut ikiortit, peqqinnissamut assistentit, isumaginninnermi peqqinnissamullu assistentit, peqqinnissalerisut, peqqinnissamut ikiortit, aammalu portøritut annaassiniartartut, takuuk

Nunatsinni Nakorsaanerup Namminersorlutik Oqartussat nalunaarutaat naapertorlugu², peqqinnissamut tunngasutigut sullissisunut akuersissuteqanngitsunut tunngatillugit aalajangiisinnaatitaavoq, takuuk § 12, imm. 2, tak. § 8, imm. 2. Inatsisartut Inatsisissaannut aallarniutaasumik suliaqarnermi nalunaarsorneqarpoq, siusinnerusukku ingerlaaseq, matumani Napparsimasut Maalaarutaannik Aalajangiisartut suliassaasa avataaniittut Nunatsinni Nakorsaanerup sulianik aalajangiisarnikuunera, inatsisitigut atuutsinneqalernissaa kissaatigineqartoq, taamaasilluni inuit danskit akuersissutaannik peqanngitsut naammagittaalliuutigisinaanissaat periarfissanngorniassammat.³⁴

Danmarkimi naammagittaalliuuteqartarnermi suliassap ingerlanneqarnera:

Danmarkimi napparsimasut naammagittaalliuutaat Napparsimasut naammagittaalliuutaannut Aqutsisoqarfimmi suliarineqartarput, tak. peqqinnissaqarfiup iluani naammagittaalliuuteqarnissamut taarsiivigineqarnissamullu periarfissat pillugit danskit inatsisaat⁵. Naammagittaalliuut suliarinniffimmut tunngassuteqarpat maalaarummik aqutsisoqarfik suliaqartussaavoq. Inatsimmi § 2, imm. 2 naapertorlugu, maalaartarfiup sullissinerani, peqqinnissaqarfiup iluani inuit eqimattat aalajangersimanerusut peqqinneq pillugu inatsisit malillugit akuersissuteqanngitsunut annerusumik ilanngullugit suliaqarnissaanik peqqissutsimut ministeri malittarisassanik aalajangersaasinnaavoq. Inatsisissamut aallarniutaasumik suliaqarnermi nassuiaatini nalinginnaasuni⁶ immikkoortoq 2.1.1-imi allassimavoq, maanna Napparsimasut Maalaarutaannik Aalajangiisartunik, nakorsat akuersissuteqanngitsut inatsimmi § 2, imm. 2-mut ilaatinneqanngitsut.

Danmarkimi Napparsimasut Maalaarutaannik Aalajangiisartut peqqinnissamut tunngasutigut sullissisut danskinit akuersissuteqartut, danskit peqqissutsimut inatsisaat naapertorlugu kapitalit 4-7-ikkut aammalu 9 kiisalu immikkoortoq IV malillugit atuuffeqartut, pillugit napparsimasut naammagittaalliuutaannik taamaallaat suliaqarsinnaapput, tak. peqqinnissaqarfiup iluani naammagittaalliuuteqarnissamut taarsiivigineqarnissamullu periarfissat pillugit danskit inatsisaanni⁷ § 2, imm. 1.

²Nunatsinni Nakorsaaneqarfiup sulinera pillugu Namminersorlutik Oqartussat nalunaarutaat nr. 7 15. juni 2017-imeersoq.

³Inatsisissatut siunnersuummut nassuiaatit 17. Septembari 2010-mi UKA2010/20-mut siunnersuuteqarnermut Nassuiaatit nalinginnaasut.

⁴Peqqinnissaqarfiup aqunneqarnera, aqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersoq.

⁵Peqqinnissaqarfiup iluani maalaaruteqarnissamut taarsiiffigitinnissamullu periarfissat pillugit danskit inatsimmik nalunaarutaat nr. 995, 14. juni 2018-imeersoq

⁶Inatsisissatut siunnersuummut nassuiaatit 17. Septembari 2010-mi UKA2010/20-mut siunnersuuteqarnermut Nassuiaatit nalinginnaasut.

⁷Peqqinnissaqarfiup iluani maalaaruteqarnissamut taarsiiffigitinnissamullu periarfissat pillugit danskit inatsimmik nalunaarutaat nr. 995, 14. juni 2018-imeersoq

Tamatuma kingunerisaanik Nunatsinni Nakorsaanerup inuit Kalaallit Nunaanni kisimi akuersissuteqartunik Danmarkimi Napparsimasut Maalaarutaannik Aalajangiisartunut suliassanngortitsisinnaanngingilaq.

Kalaallit Nunaanni inatsisitigut atuutsinneqartut aammalu Danmarkimi inatsisitigut atuutsinneqartut akornanni naleqqutinngitsut qulaajarneqarnissaat ersarissarneqarnissaallu PK-p innersuussutigivaa.

Akissut: Tusarniaanermut akissuteqaammi ersereersutuulli napparsimasut naammagittaalliutaat Napparsimasut naammagittaalliutaannut Aqutsisoqarfimmit suliarineqartarput, tak. Peqqinnissaqarfiup iluani naammagittaalliuteqarnissamut taarsiiffigitinnissamullu periarfissat pillugit danskit inatsimmik nalunaarutaat. Katsorsaavik pillugu maalaartoqartillugu, taava Napparsimasut naammagittaalliutaannut Aqutsisoqarfiup naammagittaalliut suliarissavaa, paarlattuanilli Peqqinnissaqarfimmi peqqinnissamut tunngasutigut sulinermut naammagittaalliutaappat Napparsimasut Maalaarutaannik Aalajangiisartunit suliarineqassalluni. Danskit Naammagittaalliornissamut taarsiissuteqartarnermullu inatsisaanni § 2, imm. 2-mi allaqqavoq, maalaartarfiup sullissinerani, peqqinnissaqarfiup iluani inuit eqimattat aalajangersimanerusut peqqinneq pillugu inatsisit malillugit akuersissuteqanngitsunut annerusumik ilanngullugit suliaqarnissaanik peqqissutsimut ministeri malittarisassanik aalajangersaasinnaasoq. Malittarisassat taakku peqqinnissaqarfiup iluani inuit ilaat sulinissamut akuerineqarsimannngitsut pillugit nalunaarummi nr. 1448, 15. december 2010-meersumi nalunaarut nr. 1064, 9. november 2012-imeersumi allanngortinneqartumi Napparsimasut Maalaarutaannik Aalajangiisartut suliaannut ilaatinneqarput. Nalunaarummi § 1, nr. 10-mi allaqqavoq Napparsimasut Maalaarutaannik Aalajangiisartut sulinerini inuit eqimattat tulluuttut ilaatinneqartut: Peqqissaasut, kigutigissaasut, kigutit nakorsaasa ikiorta, peqqissaasumut ikiortit, peqqinnissamut assistentit, isumaginninnermi peqqinnissamullu assistentit, peqqinnissalerisut, peqqinnissamut ikiortit, aammalu portøritut annaassiniartartut Kalaallit Nunaanni ilinniarsimaneq akuersissuteqarnerluunniit tunngavigalugit peqqinnissamut tunngasutigut suliamik ingerlataqartut. Taamaammat peqqinnissamut tunngasutigut sullissisut Kalaallit Nunaanni akuersissuteqartut pillugit naammagittaalliutit Danmarkimi Napparsimasut Maalaarutaannik Aalajangiisartunut suliassanngortinneqarsinnaapput, taamaammat daskit kalaallillu inatsisaasa akornanni naleqqutinngitsoqarneranik oqarnermut naleqqiullugu Peqqissutsimut Naalackersuisoqarfik taama misigisimannngilaq.

Tusarniaassut pillugu allakkiaq piffissami 18. januar 2024-miit 16. februar 2024-p tungaanut tusarniaatigineqarsimavoq

Siunnersuut piffissami 18. januar 2024-miit 16. februar 2024 ilanngullugu tusarniutigineqarsimavoq. Tusarniaanissaq sioqqullugu siunnersuut Nunamut Namminermut Peqqissutsimullu ministereqarfikkut, Napparsimasut Maalaarutaannut Aqutsisoqarfimmut, Napparsimasunut Taarsiissuteqartarfimmut aamma Napparsimasunut Taarsiissuteqartarfimmut Suliareqqitassanngortitanik Aalajangiisartunut saqqummiunneqarsimvoq, isummersuutillu ilanngunneqarlutik.

Siunnersuut piffissami tassani Naalackersuisut tusarniaanermut nittartagaaniissimavoq.

Tusarniaanermi akissutinik tigusaqartoqarsimanngilaq.